

مشروع طفل

قصص و مواقف تربوية

شيهاة عادل





مشروع طفل



الطبعة الأولى
1440 هـ / 2018 م

اسم الكتاب: مشروع طفل (قصص ومواقف تربوية)
المؤلف: شيماء عادل
رسوم داخلية: نجلاء عادل
موضوع الكتاب: تربية أطفال
عدد الصفحات: 192 صفحة
عدد الملازم: 12 ملازمة
مقاس الكتاب: 14 x 21
عدد الطبعات: الطبعة الأولى
رقم الإيداع: 2018 / 22870
التقييم الدولي: 2 - 730 - 278 - 977 - 978
ISBN:

التوزيع والنشر

القاهرة - جمهورية مصر العربية
هاتف: 01012355714 - 01152806533

E-mail: elbasheer.marketing@gmail.com
elbasheernashr@gmail.com

دار النشر
للثقافة والعلم

جميع الحقوق محفوظة

دار النشر
للثقافة والعلم

جميع حقوق الطبع والنسخ والترجمة محفوظة لدار
البشير للثقافة والعلوم. حسب قوانين الملكية الفكرية، ولا
يجوز نسخ أو طبع أو اجتزاء أو إعادة نشر أية معلومات أو
صور من هذا الكتاب إلا بإذن خطي من الناشر.



مشروع طفل (قصص ومواقف تربوية)

بِسْمِ اللَّهِ الرَّحْمَنِ الرَّحِيمِ
لِلتَّقَاةِ وَالْعُلُوفِ

إهداء

إلى كل أم و أب يؤمنون
أن تنشأه جيل سوي تبدأ من عندهم



ليه اتجهت للتخصّص في مجال تربية الأطفال؟

* مُمكن حدّ يستغرب أنا ازاي صيدلانية، وكتب كتاب في تربية
الأطفال!!

الحكاية بدأت من حوالي ثلاث سنين، في يوم زوجي كان بيحكيلي
إنه حضر محاضرة في مؤتمر، وكانت بتتكلم عن طريقة وضع
المناهج للطلاب في الجامعة، فأول حاجة بيعملوها إنهم بيشفوا
إيه الأهداف اللي عايزين يوصلوا لها، يعني عايزين الطالب لما
يتخرّج من الكلية يبقى عارف إيه بالضبط؟ وإيه كفاءته؟ وعلى
أساس كده بيختاروا الكورسات اللي هيدوهالهم وتؤدّي للهدف
اللي عايزين يوصلوا له.

فبعدها بصّيت على أطفالي، وقلت: هل وانا بريهم أنا حاطه هدف عايزه
أوصل له برضه وبسعى ليه؟ وهل حتى لو كان فيه هدف معين، هل أنا عارفه
الطريقة اللي أوصل بيها للهدف ده؟ وكمان هل اللي أنا بعمله معاهم بيؤدّي
للهدف اللي انا عايزاه واللا ماشيه كده وخلص؟
فقرّرت ساعتها إنّي أعتبر أطفالي دول همّا مشروع حياتي، ولازم

أحطّ له أهداف أحاول أحققها...

يعني مثلاً من الأهداف اللي أنا شايفه إنَّها مهمّة إنَّهم يكونوا شخصيتهم سليمة، فيكون عندهم ثقة بنفسهم، صادقين، شجعان، وهكذا.... ويكونوا متفوقين دراسياً ودينياً.

فكّبت كلّ الصفات اللي عايزاها في ورقة، وبدأت أفكرّ ازاي هوصل للأهداف دي؟ هل عندي خطة همشي عليها؟! أو عارفة طريقة التّعامل الصحيحة اللي بتؤدّي للنتيجة دي؟! فبدأت أدورّ ازاي أوصل لكلّ هدف من الأهداف دي، وأكتب الطرق اللي بعرفها، فقرأت كثير وأخذت كورسات في التربية علشان أحاول أوصل لهدفي.

بعد ما جمعت معلومات في التربية، وشفّت ناس كثير حوالياً بيعانوا مع أولادهم ومش عارفين يصلحوا سلوكهم، وفي نفس الوقت معندهم مش الوقت الكافي إنهم يقرؤوا كثير في التربية، ففكرت أفيدهم بطريقه سهله عن طريق كتابة الكتاب ده.

أنواع التربية

* بنسمع كثير...

- ابني مببسمعش الكلام أبداً، حتى تعالي مكاني ووريني هتتصرّفي معاه ازاي؟!
 - ابني بيقول ألفاظ وحشة مع إني بضربه على أي كلمة بيقولها!

- بنتي حسّاسة قوي مبتستحملش أي كلمة.
- ابني بيحسّس الناس إنّه محروم مع إني مش حارماه من حاجة،
وبجيب له اللي نفسه فيه!!
- بنتي بتخاف من خيالها مع إني ميت مرّة أقول لها مفيش حاجة
بتخوّف!

أمّهات كتير بيقوا حاسّين إنّ فيه مشكلة في شخصية أطفالهم ومش عارفين
سببها إيه، وبيقولوا «أنا عملت كلّ اللي عليّا، ومش عارفه أعمل إيه تاني»!!

* هقولك إيه هو سبب المشكلة...

الطفل بيتولد زيّ الصفحة البيضاء، وبيتعرّض لمواقف كتيرة طول
الوقت، المواقف دي بيترتّب عليها ردّ فعل تجاه الطفل من اللي
حواليه، خصوصاً الأبوين، ردّ الفعل ده بيكوّن شخصية الطفل
ويبني فيه قيم ومبادئ وقناعات مهما كان الموقف بسيط. زيّ
بالظبط اللي ببني بيت، بيحطّ طوبة فوق طوبة لحدّ ما يكمل
بناء البيت.

يعني مثلاً.. لو ولد بيشرب عصير ووقع منه شوية عصير على الأرض، فيه أمّ ممكن
تمسكه تزعق له وتضربه، وأمّ تانية ممكن تنزل على الأرض من غير أيّ تعليق وتمسح
العصير، وأمّ تالثة ممكن تقول له هات فوطّة وامسح اللي وقّعته...

كلّ أمّ من الأمهات دي اتعرّضت لنفس الموقف، بسّ كلّ أمّ منهم حطّت طوبة مختلفة في شخصية ابنها...

الأمّ الأولى مبتسمحش لابنها إنه يغلط غلطة بسيطة علشان عايزه توصله للكمال، ولو حصل وغلط مرّة بتعاقبه عقاب شديد، والنوع ده من التربية اسمه **authoritarian parenting** أو التربية المتسلّطة، وده بيبيني طفل شخصيته مهزوزة، ومعهدهوش ثقة بنفسه، وبيخاف يجربّ علشان خايف من الخطأ.

الأمّ الثانية بتعتقد إنها علشان توصل حبّها لابنها وتربّيه على الحرية؛ فتسيبه يعمل اللي هوّ عايزه من غير أيّ ضوابط، والنوع ده من التربية اسمه **permissive parenting** أو التربية المتساهلة، وده بيبيني طفل مهمل وسليبي، ومش مهتمّ إذا كان خطأ أو لا، ولا حتى عنده استعداد يصلح أخطاؤه.

الأمّ الثالثة اختارت إنها بدل ما تعاقب طفلها على خطأه علّمته ازاي يصلحه بنفسه ويتحمّل نتيجة أفعاله، فبالتالي هي عملت مزيج بين الحبّ والحزم في نفس الوقت، والنوع ده من التربية اسمه **authoritative parenting** أو التربية الوسطيّة، وده بيبيني طفل شخصيته قوية، ومعهدهوش مانع إنه يجربّ علشان عارف إنّه لو أخطأ هيعرف يصلح أخطاؤه.

طبعاً طريقة التربية المثالية هي الطريقة الوسطية، بسّ بما إننا بشر فمفيش أمّ هتفضل تتعامل بالشكل ده في كلّ موقف طول الوقت.. بسّ

9 مشروع طفل

الطريقة الغالبة الّتي بتتعامل بيها الأمّ معظم الوقت هي دي الّتي بتأثر على شخصية الطفل، فلو معظم الوقت بتتعامل بالشّدّة هيكون الطفل ضعيف الشخصية، ولو بتتساهل طول الوقت هيكون الطفل مهمل وسليبي. فعلى حسب نوع الطوب الّتي بتستخدمه الأمّ علشان تبني شخصية الطفل هيطلع الطفل بنفس شكل الطوب، فبالتالي المواقف المختلفة الّتي بيتعرض لها الطفل لازم نتعامل معاها بشكل سليم يخلي البناء يكتمل في أجمل صورة. وطبعًا في تأثيرات تانية خارجية كثير بتأثر على شخصية الطفل، ودي لازم الوالدين يتابعوها علشان متأثرش عليهم سلبياً.

فالكتاب ده مخصوص لكلّ أمّ ولكلّ أب نفسهم يربّوا ولادهم كويس، ويشوفوهم أحسن حاجة، ويحاولوا طول الوقت، بس حاسين إنّ فيه حاجة غلط في الطريقة الّتي بيتعاملوا بيها مع أولادهم بتخليهم يبعدوا عن هدفهم، وبالتالي بيبدأوا يستسلموا. فالكتاب بيعرض طرق التربية المختلفة من خلال مواقف عادية بنعملها في حياتنا اليومية من غير ما ناخذ بالنّا إذا كان ليها تأثير بعد كده على شخصية الطفل أو لا، ومعاملات مع ولادنا بنعملها بحسن نيّة ونلاقي بعد كده ولادنا عندهم مشكلة في شخصيتهم واحنا مش عارفين السبب.

اخترت إنّّي أكتب الكتاب باللّغة العاميّة علشان يكون سهل في القراءة، وعلشان أعرض المواقف الّتي بنمرّ بيها زيّ ما هي بنفس

الكلام اللّبيّ بنسخدمه في حياتنا اليومية، وبالتالي مُمكن يدخل القلب أكثر، ومُمكن تشوفوا نفسكم فيه.

فهتلاقي في الكتاب نفسكِ وانتِ بتشتكي من بنتك قدّام الناس وهي قاعدة وسامعاكِ، وهتلاقي نفسك وانتِ بتسكّتي ابنك وبتجيبِي له الشيكولاتة اللّبيّ عايزها في المحلّ علشان يبطل عياط، وانتِ هتلاقي نفسك وانتِ بتكلّم صاحبك وبتقول له أنا خلاص أهو في الطريق وانتِ لسه ملبستش أصلاً، وهتلاقي صاحبك اللّبيّ مدلّعة ابنها وطلباته كلّها أوامر، وهتلاقي أختك اللّبيّ بتتزيق على ابنها لما يقول لها أنا خايف من العفريت... هتلاقي موافق كثير شفّتها قدّامك أو بتعملها وهتعرف قدّ إيه الموافق البسيطة دي مُمكن تأثر تأثير كبير على شخصية الطّفل. الكتاب متقسّم لـ 15 صفة نتمنّى تكون في أولادنا، الصفات دي أنا اخترّتها على سبيل المثال لا الحصر، كلّ صفة من الصفات فيها..

* قصّة بتبيّن تأثير معاملة الأمّ والأب على نقص الصفة دي من الطّفل، وكمان

حلول لتنمية الصّفة دي في شخصية الطّفل، وبعد القصّة هتلاقي..

* الخلاصة اللّبيّ مكتوب فيها تلخيص بسيط للأخطاء اللّبيّ وقع فيها الأمّ

والأب، وبعده هتلاقي..

* الواجب العملي وده بقى الواجب اللّبيّ المفروض تعمله لو لقيت نفسك

في القصّة، أو ابنك عنده نقص في الصفة دي.



اسمعي لطفلك بقلبك قبل أذناك

* الثقة بالنفس

السّاعة سبعة الصّبح، نهى صحيت وعملت الفطار، وجّهزت
اللانث بوكس بتاع أحمد، وراحت تصّحيه.

- اصحى يلاً يا أحمد بسرعة علشان متأخّرش على الحفلة!

- مش قادر!

- يلاً.. إيه الكسل ده! ده لسه أوّل يوم في المدرسة، وكمان حفلة وتقوللي مش

قادر!! أمال هتعمل إيه بعد كده؟ إنت فاشل كده على طول!!؟

نهى أخذت أحمد وشالته من على السرير وودّته الحمام، وغسلت له وشّه،

وطلّعت له اللبس، أحمد جه يغيّر هدومه راحت نهى قالت له:

- إنت لسه بتلبس؟! تعالى يلاً بسرعة ألبسك أنا علشان انت بطيء، وهتأخّرنّا

لو استنيتك تلبس لوحداك!

أحمد إدّاها الهدوم وراح لها، ولبّسته على طول ومأخدتش وقت طبعاً،

وخلص وراح ياخذ اللانث بوكس بتاعه علشان يحطّه في الشنطة، راحت مامته

قالت له:

- استنّى متحطهوش في الجيب ده! هاته أحطهولك أنا علشان
مش هتعرف تقفل السوستة بتاعته.

- إيه ده؟ ده سندوتش جبنة! محبوبش!

- لا.. لازم تاكله علشان ده مفيد. لو أكلته ماما هتحبّك خالص.

زعل أحمد واعترض، مامته كمّلت:

- هزعل منك لو رجعت بأى أكل، ومش هحبّك.

نزلت نهى وأحمد من البيت، وركبوا العربية، وطبعًا هي اللي بتفتح له
الباب وتقعّده، وتربط له الحزام علشان حاسّه إنه مش هيعرف يعمل أي حاجة
لو حده، وكمان علشان خايفة يتأخروا.

وصلوا المدرسة، وبدأت حفلة بداية التيرم، وفيها الأمهات وأولادهم، نهى قابلت
أمّ عمر صاحب أحمد ووقفت تتكلم معاها شوية..

جه أحمد وناداه، مردّتش عليه وفضلت تتكلم مع صاحبته.. شدّ هدمها
علشان يلفت انتباهها، راحت بصّت له وهي متنزفة، وقالت:

- إيه؟! إيه؟! عايز إيه؟! مش شايفني بتكلم؟!!

-عايزك تفتحيلي إزارة العصير.

- يعني مش عارف تفتحها لوحداك! ليه؟! إنت لسّه بيبي؟!!

وبصّت لصاحبته وضحكت، وقالت لها:

- شفت زبيّ ما كنت لسّه بقولك، مبيعرفش يعمل أي حاجة

لوحده، وتاعبني على طول، ومخليني أعمل له كل حاجته.

اتكسف أحمد، وحطّ وشّه في الأرض، وأخذ إزازته ومشي.

بعد شوية، جهّ عمر يشتكّي من أحمد إنه لوّن في الورقة بتاعته.

نهى نادت أحمد، وقالت له:

- إنت لوّنت في ورقة عمر؟

- مش قصدي، كنت بحسبها بتاعتي.

- يا سلام!! منا عارفه حركاتك دي اللي بتعملها مع أختك في

البيت، اتعدل أحسنك!

عمر انبسط قوي بدفاعها عنه، وأحمد اتكسف من زعيقها ليه قدام كل أصحابه.

خلصت الحفلة، وبدأت أيام الدراسة العادية.

في الفصل أحمد هادي ومطيع بسّ مشكلته إنه مبيحبّش يتجاوب مع

المُدْرَسَه، هو ده طبعًا مش عامل لها مشكلة طول ما هو هادي، ومبيعملش

مشاكل، تيجي تسأله سؤال ميرضاش يجاوب كإنه خايف يجاوب أحسن يغلط قدام

الفصل. ييجوا يجربوا لعبة جديدة أو نشاط جديد مبيجربش معاهم، وحاسس

دائمًا إنه مش هيعرف. وزيادة على كده معندهوش أصحاب في المدرسة خالص،

بيتفرّج عليهم بسّ وهما بيلعبوا، وطول الوقت ماشي ورا عمر، يشوفه بيكتب إيه

يكتب زيّه، بيلوّن بلون إيه يلوّن بنفس اللون، يلعب لعبة يلعب زيّه، ومع نفس

الأطفال وبنفس الطريقة.. يعمل زيّ ما يعمل، عمل صحّ يعمل صحّ، عمل غلط يعمل زيّه.. مبيحاولش يفكرّ يعمل حاجة من نفسه.

بعد شهر في المدرسة على الحال ده، الميس كلّمت نهى، وقالت لها على المشاكل بتاعة أحمد، وقدّ إيه هو مش مستمتع بالمدرسة. طبعًا نهى مش مصدّقة كإنها بتحكي عن واحد تاني، علشان أحمد في البيت قايم بدور البلطجي على سلمى أخته. عامل الـ Boss عليها، ممشيها وراه، ومينفّش تمسك حاجته غير لما تستأذن، وموريها الويل فهي مش متخيّلة إنّه ضعيف كده في المدرسة. لما رجع من المدرسة قالت تتأكّد من الكلام ده بنفسها، فقالت له:

- الميس كلّمتني بتشتكي منك إنك مبتجاوبش على أيّ سؤال ليها!!

- هي مبتدّيش فرصة أجاب خالص ومستقصدايني.

- ومستقصداك ليه بقى إن شاء الله!!

- معرفش، هي ميس غلسة وأنا مبيحبّهاش.

- اتكلّم عدل أحسن انتّ عارف أنا مُمكن أعمل إيه!!

- أنا مش عايز أروح المدرسة دي تاني (قال الكلام ده بصوت

عالي).

هشام أبو أحمد سمعه من جوّه وهو بيزعّق، ويقول إنّه مش عايز يروح المدرسة تاني. هشام علاقته بأحمد مش كويسة قوي، مبيتكلّمش

معاه كثير، لما بيتكلم معاه بيديله دروس ومحاضرات في التربية، ولو غلط قدامه وهو مش رايق وقتها (وده أغلب الوقت علشان هو دايمًا بيقول إنه مضغوط في الشغل) بيضرب على طول من غير تفاهم. فأحمد أول ما يشوفه يهرب على طول ويبخاف منه.

لما سمعه في الوقت ده طلع طبعا ضربه علقه، وقال له:

- إحنا مش موديينك مدرسة وبندفع فيها بالآلافات علشان تقول مش رايق

تاني، مش عايز أسمع الكلام ده تاني! إنت فاهم؟!

دخل أحمد جوّه أوضته وعييط شوية صغيرين، وراح يلعب ويغلس على

أخته، مهو متعود على الضرب ومبيتأثرش بيه قوي.

نهى قالت لهشام:

- حرام عليك، إنت كل شوية تضربه؟

- أه، لازم يتضرب علشان يتربى، إنت مش عارفه تربيه كويس ومدلعا!

- مين قال إني لازم أضربه علشان يتربى؟

- أه طبعا لازم، ما احنا اتريننا كده كلنا.

- إنت مش عارف الميس قالت لي عنه إيه النهارده! وقد إيه هو كاره المدرسة!

- خلاص السنة الجاية نغير له المدرسة.

- العيب مش في المدرسة، المشكلة في أحمد، أنا حاسة إن فيه حاجة غلط

ومش عارفة إيه هي!!

- يووه بقي، أنا مش فاضي للكلام ده، أنا هدخل أنام؛ ورايا شغل الصبح.
دخل هشام ينام ونهى قاعدة في الصالة بتفكر في كلام ميس هبة، وهي
قاعدة جرس التليفون رن؛ كانت هدى أختها.

- إزيك يا هدى؟

- إزيك يا نهى، ما لك صوتك عامل كده ليه؟

- مفيش، متضايقة شوية.

- خير! حصل إيه؟

- ميس هبة مُدرّسة أحمد كلمتني النهارده، وقالت لي إن أحمد مبيرضاش
يشترك في أي حاجة ولا بيجابو على حاجة ومعدوش أصحاب. مش عارفة ما له؟
وإيه مشكلته؟! نفسي حدّ يساعدني!! وهشام مش مهتمّ أصلاً، ومش شايف إن
فيه مشكلة خالص.

- هقولك، أنا عرفت إن فيه دكتور كويس اسمه الدكتور أسامة بيحلّ مشاكل
الأطفال، وممكن يساعدك، إيه رأيك نحجز معاه وأجي معاك.

- يا ريت.

في عيادة الدكتور..

نهى حكّت للدكتور على سلوك أحمد الغريب، وكلّ مخاوفها، وكمان معاملة
هشام ليه..

- مشكلة أحمد الكبيرة هي قلة ثقته بنفسه، وعلشان يعوّض النقص ده
بيحاول يمارس القوّة اللي مفقدها دي في البيت على اللي أضعف منه زيّ أخته
الصغيرة، فبيحاول يبقى bossy عليها.

- طيّب أعمل إيه يا دكتور؟ فيه حلّ للمشكلة دي؟
- أكيد طبغاً كل حاجة وليها حلّ، بس المهمّ إنّ الواحد يبقى عنده إرادة
وينفّذه.

* أولاً كده فيه شويّة أخطاء في التربية بيقع فيها الآباء والأمهات وهما مش
حاسين، اعتقاداً منهم إنّ دي التربية الصحيحة لكن بالعكس الأخطاء
دي مدمرة وتكسّر الطفل وتلغي ثقته بنفسه مش بس بتقلّلها.

- زيّ إيه يا دكتور؟ أكيد الضرب حاجة منهم!
- أكيد طبغاً، الضرب ده حاجة قاتلة لشخصية الطفل، مش بس الضرب هو
اللي خطر، ده كمان الإهانة والاستهزاء والتّهديد، كفاية بس إنّك تخلي حدّ يصورك
وانت بتضري ابنك، أو بتزعّقيه أو بتشتّميه وتهدّديه، وشوفي شكلك في الفيديو،
وشكل ابنك عامل ازاي!! والرعب اللي هوّ فيه، وشوفي عينه مكسورة ازاي وانّت
هتعرفي تأثير الحاجات دي لوحدهك! وتخيّلي كمان لو الإهانات دي حصلت قدّام
الناس وخصوصاً أصحابه، متخيّلة إحساسه هيكون إيه؟!
بس تفتكري إيه اللي بيخليّ الأب أو الأم يهينوا الطفل؟

- علشان بيعصّبهم ومبيسمعش كلامهم.
- بالطبط، الخطأ الأوّل هو إنّ الأهل بيبقوا عايزين أولادهم
يسمعوا كلامهم زيّ ما هو، عايزين لو طلبوا منهم حاجة ينفّذوها على
طول (طاعة عمياء) بدون تفكير وبدون مناقشة، وبينسوا إنّ الطفل ده

بني آدم، وله مشاعر، وله أحاسيس ورأي. يعني تخيّلني مثلاً إنّ جوزك جهّ في يوم وقال لك عايزك تطبخيلي النهارده مكرونة بالبشاميل وانتِ تعبانة يومها ومش قادرة، جيتِ تقولي له إنّك تعبانة مش عايز يسمعك، ويقول لك لازم تسمعي كلامي غضب عنك ومن غير مناقشة، ومش عايز كلام كثير. هيكون إيه إحساسك؟! الطفل برضه بني آدم، وله متطلبات، وله مشاعر ورأي، ساعات بتطلبني منه حاجات في وقت غير مناسب بالنسبة له (زيّ لما تؤمريه إنه يقفل التابلت وهو في نصّ الكارتون، وعايز يخلصه) ولما يعترض ويقول لأ؛ يبقى كده مش بيسمع الكلام وقليل الأدب ويستاهل الضرب والإهانة. اسمعي لطفلك وحسيّ بالليّ يقوله، واسمعيه للآخر بقلبك قبل أذنك، اسمعي هو ليه معترض وقدّري مشاعره، وحطّي نفسك مكانه (إنتِ أكيد متحبّيش إنّ حدّ يشدّ منك الموبايل وانتِ بتعملي شات مثلاً).

اسمعيه كويس وهو بيتكلّم، مش يبقى قاعد بيتكلّم وانتِ ماسكة الموبايل وتقولي له: سامعك سامعك... حسّسيه إنّ له أهمية، كلميه واسمعيه زيّ ما بتكلّمي صاحباتك.

- طيّب كده لما اسمع له وأحسّ بيه معناها إنّني أسيبه ميسمعش كلامي، ويعمل الليّ عايزه براحته؟

- لا طبعاً، لازم يكون فيه قواعد وحدود في البيت وفي المعاملة وإلاّ الطفل هيبقى أسوأ كمان، بسّ خليّ طفلك يفهم القواعد دي ويقتنع بيها، ويا ريت كمان لو يشترك في وضعها، وتراعي كمان متطلباته وانتوا

بتحطوا القواعد دي، يعني قبل ما تقولي له اقل التابلت وتاخذيه منه، قولي له «إنت كده اتفرجت كثير على التابلت، خلص الكارتون اللي بتتفرج عليه، واقل التابلت وتعالى نعمل حاجة تانية» كده هتبقى راعيتِ مشاعره وإنه عايز يكمل الفيديو للآخر، وفي نفس الوقت حطيتِ القواعد المظبوطة، يعني جمعتِ بين الإحساس بالمشاعر والحزم.

- طيب وازاي أخليه يحط القواعد معايا؟

- يعني مثلاً من قواعد البيت إنه المفروض يتفرج على الكارتون ساعتين

مش معنى إنك تسمع
وتحس بطفلك إنك تلغي
كل القواعد وتنفذ كل
رغباته

بس في اليوم، خدي رأيه وقولي له تحب الساعتين دول نخليهم إمتى؟ وهو اللي يحدّد معاك إمتى بالظبط يتفرج على الكارتون فهيحاول ساعتها يلتزم بالقواعد اللي حطها لنفسه من غير ما يحس إنها أوامر عسكرية.

- طيب وإيه الغلطات التانية اللي قلت عليها في التربية؟

- من الغلطات برضه اللي بتأثر على الثقة بالنفس هي رغبة الأهل في الكمال وده بيسمّوه الـ **perfectionism** وده لما الأهل مبيستحملوش إن ابنهم يغلط غلطة واحدة، عايزينه شاطر في المدرسة على طول، مينقصش ولا درجة، مؤدّب، ميغلطش ولا غلطة من الآخر. ولو غلط غلطة صغيرة يكبروها ويدّوله دروس ومحاضرات، ويحسّسوه إن الطبيعي إن الواحد ميغلطش أبداً وهو كده مش طبيعي.

طبعاََ الطفل يعمل حاجة من الاتنين: يا إما يحاول يرضيهم بأي شكل فعلشان يرضيهم يبطل يعمل حاجة أو يجرب حاجة أو يتكلم علشان يفضل **perfect** على طول وميغلطش أبداً، فأحسن حاجة يعملها إنه يمشي جنب الحيط. يا إما الطفل يفشل خالص إنه يرضي أهله مهما عمل فيفقد الأمل ويتمرد عليهم، ويعمل اللي عايزه وميمشيش على أي قواعد، مهو كده أو كده مش عاجب. وفي الحالتين الطفل بيطلع شخصيته مهزوزة وثقته بنفسه ضعيفة.

- آه أنا فعلاً بعمل كده مع أحمد علشان كده بيخاف يعمل أي حاجة أحسن يغلط.

- من الغلطات المشهورة برضه اللي الأهل بيفتكروا إنها تشجيع لأولادهم هي المقارنة. إنك تقارني طفلك بأي طفل تاني بالذات لو أخوه أو أخته. إنك تقولي له «شايف أخوك خلص الواجب قبلك ازاي؟! خليك شاطر زيّه» أو «نصف أوضتك زي أختك» الطريقة دي مش بتضعف الثقة بالنفس بس، لا.. دي كمان بتخلق جو من الحسد والكره بين الإخوات، بتلاقي كل واحد مستني غلطة للتاني.

- أه عندك حق، أنا هاخذ بالي من النقطة دي.

- كده أنا خلصت الغلطات المشهورة اللي بيقع فيها الأهل في التربية وتقل ثقة الطفل بنفسه، بس فيه بعض الطرق اللي ممكن تعملها بقى علشان تزود ثقة طفلك بنفسه.

وأول طريقة هي إنك تسيبي الطفل يجرب بنفسه ويغلط ويجرب ثاني، ميفضلش معتمد على إن فيه شخص هيحلّ له أبسط مشاكله، يعني خليه يلبس لوحده، يأكل لوحده، ينضف أوضته، يحلّ واجباته لوحده مع التوجيه طبعاً، ولو كبير شويّة خليه يعمل حاجات أكبر، يصحى لوحده بالمنبه، يعمل فطاره، يغسل طبقه، وهكذا... مش بس كده، خليه كمان يساعدك في الحاجات اللي بتعملها علشان حتى يتعلم المشاركة وميكونش أناني، يساعدك في تجهيز الأكل والسفرة، في التنظيف، يشتريك حاجات من برّه لو كبير..... متقوليش ده لسّه ابني صغير، أو أنا كده هتعبه حرام، لا.. إنتِ كده بتساعديه إنه يحسّ إنه مهمّ وإنه له لازمة في البيت (بسّ طبعاً بلاش مبالغة في طلب المساعدة منه).

- عندك حقّ يا دكتور، أنا على طول بعمل له حاجته ومبدّلوش أيّ فرصة يعمل حاجة لحدّ ما هو استسلم ومبقاش يجرب.
- ومهمّما كان سنّه خليه يختار بنفسه القرارات اللي تخصّه، ياكل إيه، يشرب إيه، يلبس إيه...

- بسّ هو مُمكن يختار اختيارات مش مناسبة يعني مثلاً، لو سألته تاكل إيه هيختار شيكولاتة أو حلويات، عمره ما هيختار حاجة مفيدة!
- لو طفلك صغير، وخايفه يختار اختيارات مش مناسبة، إدّيله اختيار بين حاجتين مُناسبين. يعني بدل ما تقولي له تاكل إيه؟ قولي له تاكل تفاح ولا موز؟ تلبس التيشيرت الأخضر ولا الأزرق؟

وهكذا.. متسيبش الاختيار مفتوح. بالطريقة دي إنتِ كده تقريباً اللي بتختاري بس بتديله فرصة يختار معاك، وبتعوديه على اتّخاذ القرار من صغره، وطبعاً كل ما هيكبر تديله خيارات أكثر لحدّ ما يبجي الوقت اللي يعرف يختار اختيارات سليمة لوحده.

- آه فهمت.

- من الحاجات المهمّة في زيادة الثقة بالنفس هي إنك تدي لطفلك حبّ

غير مشروط.

- إزاي؟

- يعني تعرّفه إنك بتحبّيه على طول مهمّما عمل، مش لازم يبقى شاطر علشان تحبّيه، مش لازم يخلّص أكله علشان تحبّيه. إنتِ بتحبّيه وخلص علشان هو أحمد مش علشان عمل تصرّف معيّن، يعني بلاش كلمة «لو خلّصت طبقك هجبك». وبرضه لو غلط إنتِ هتفضلي تحبّيه، بس مبتحبّيش التصرّف والغلط اللي عمله، بس جبك له مش هيتغير. لازم توصليله الكلام ده ويفهمه كويس، ويحسّ بيه في كل تصرفاتك معاه.

* - طيب إزاي أعرفه إني بحبه؟

- فيه طرق كثير تعرّف طفلك إنك بتحبّيه، فيه كتاب بيتكلّم بسّ عن الموضوع ده اسمه (لغات الحبّ الخمسة التي يفهمها الأطفال لجاري تشامان ود) بيقول إنّ كل طفل يفهم حبّ والديه له بطريقة مختلفة عن الطفل الثاني على حسب شخصيته.

فيه طفل يعرف إنك بتحبّيه عن طريق التلامس الجسدي زيّ لو قعدت تبوسي فيه وتحضني فيه طول الوقت، فيه طفل تاني يعرف إنك بتحبّيه لو قعدت تشجّعيه وتقدري كلّ المجهود اللي بيعمله، فيه طفل ثالث يعرف إنك بتحبّيه لو إديتاه وقت خاص به لوحده من غير ما تشغلي بحاجة تانية، وطفل رابع يعرف إنك بتحبّيه لو جبتيه هدية، ونوع أخير يفهم حبكّ ليه لما تساعديه وتخدميه خدمات هو محتاجها زيّ إنك مثلاً توّديه التدريب، تساعديه في حلّ واجباته وهكذا. طبّعاً كلّ واحدة مُمكن تستنتج إيه هي طريقة الحبّ اللي يفهمها طفلها وتستخدمها معاه علشان تبين حبّها له، ومفيش مانع طبّعاً.. بل مستحبّ كمان إنك تستخدمي كلّ الطرق مع طفلك، وتركزي أكثر على الطريقة المناسبة له.

قدّر مجهود طفلك مش

النتيجة النهائية

- أه فعلاً، أحمد بينبسط قوي لما بنشجّعه، بسّ إحنا مش بنشجّعه كثير للأسف، بنبقى عايزين الحاجة اللي يعملها تبقى perfect وده طبّعاً مش بيحصل على طول.

- قدّري طفلك على حسب مجهوده، مش على حسب نتيجته. يعني لو دخل مسابقة واجتهدت في التدريب ليها والاستعداد بسّ منجّش في المسابقة في الآخر، قدّري مجهوده، وافرحي به، مش تزعلي علشان النتيجة. لو ذاكر كويس بسّ مأخذش درجات كويسة قدّري تعبته ومجهوده وشجّعيه إنّه يكون أحسن المرّة الجاية. طبّعاً بشرط إنه يكون عمل اللي عليه وذاكر وإجتهد.

ولمَّا تيجي تشجّعيه وتمدحي مجهوده، إمدحيه بسّ على الحاجة اللي عملها، متبالغيش في المدح.. فيه ناس كثير بتفتكر إنّها لما تمدح ابنها بزيادة ولو حتى على حاجات معمولهاش يبقى هي كده بتشجّعه وبتديله ثقة بنفسه.. لكن بالعكس هي كده بتقلله ثقته بنفسه وهي مش حاسّة.

- إزاي؟

- هقولك، مثلاً أحمد رسم وردة ولونها حلو، ورسم جنبها شخايبط على إنّها بيت وشخايبط تانية على إنّها شجرة، إنت عايزة تشجّعيه علشان يرسم كويس بعد كده، أو علشان يحبّ الرّسم أو علشان تديله ثقة في نفسه فهتقولي له «إيه الرّسمة الحلوة دي! دي أحسن رسمة في الوجود، إنت أشطر رسّام على الأرض» هيبجي في بال أحمد حاجة من ثلاثة:

أول حاجة هي «أنا برسم حلو، وماما عاجبها الرسم ده، فخلاص خلّيني على المستوى ده أدام عاجبها، واعتبرتني أحسن رسّام، ليه أتعب نفسي وأحاول أرسم أحسن؟»

الحاجة التانية اللي ممكن تيجي في باله هي «إزاي ماما بتقول إنّ الرسمة حلوة قوي كده؟ أنا كنت بحسبها مش حلوة قوي، وبعدين إزاي أنا أحسن رسّام؟ أنا لسّه شايف سارة اللي معايا في الفصل، كنت فاكرها رسمت رسمة أحسن من دي! أكيد أنا لسّه صغير ومبعرفش قوي أميّز بين الرسم الحلو والوحش» وكده على عكس المتوقّع ثقته بنفسه هتقلّ.

الحاجة الثالثة الليّ مُمكن تيجي في باله هي «أنا عارف إنّ ماما بتجاملني، بسّ علشان تشجّعني» ومش هيهتمّ بالليّ بتقوليه مع الوقت، ويمكن ميسمعكيش أو مياخدش رأيك تاني علشان عارف إنّه مش مفيد.

- طيّب أقول له إيه يا دكتور؟ أقوله الرسمة وحشة؟

- لا طبعًا، بسّ خليكِ محدّدة في المدح، قولي له «حلوّة الصّورة، وأكثر حاجة عجبتي هي الوردة وألوانها الجميلة»، ومفيش مانع إنك توجّهيه، وتقولي له إنّ الشجرة دي كانت هتبقى أحسن لو مخرجتش اللون البني ده برّه، وزوّدت اللون الأخضر أكثر شوية. كده إنت بتشجّعيه وتمدّحيه، وفي نفس الوقت بتوجّهيه وتعزّفيه نقاط الضعف عنده.

ومن الحاجات الكويسة كمان، واللي بتزوّد ثقته بنفسه هي إنك تكتشفي موهبته، شوفيه هو شاطر في إيه؛ في الرسم؟ في التّأليف؟ في الكتابة؟ في الابتكار؟ وحاولي تنمي له موهبته وتخليه متميّز فيها.

وحاولي تخلي عنده هدف حاطّه قدامه، وبيحاول يوصل له، زيّ مثلاً في الأجازة دي الهدف إنّه يحفظ جزء من القرآن، أو إنّه يدخل مسابقة السباحة، وأعمليله مكافأة لو حقّق هدفه. الهدف ده بيخليه عنده إرادة وعزيمة وإصرار على تحقيقه، وبالتالي يزوّد ثقته بنفسه.

الخلاصة

أحمد محدّش بيسمع له، وبيستخدموا معاه دايماً الزعيق والضرب، وكمان مامته مبتديلوش فرصة يعتمد على نفسه، ودايمًا رابطة حبّها له باللي بيعمله، كل ده أثر في شخصيته وخلاه معندهوش ثقة بنفسه.

* * *



* أسألي نفسك الأسئلة دي، وجاوبي عليها بصراحة:

- لما بتطلبي حاجة من طفلك بتبقي عايزاه يعمل اللي بتقوليه بالضبط على طول، ومن غير أي مناقشة؟

- لما طفلك بيتكلم بتسمعيه وانتِ باصه في الموبايل أو التلفزيون؟

- مبتسمحيش لطفلك يغلط غلظه بسيطة وتقعدي تأنبي فيه وتديله دروس؟

- بتقارني ولادك ببعض أو بأصحابهم؟

- بتسيبي طفلك الصغير يجرب يعمل حاجته بنفسه؟

- بتخلي طفلك يختار اختياراته البسيطة بنفسه؟

- بتقولي لطفلك دائماً «اعمل كذا علشان أحبك»؟

- بتمدحي طفلك عمال على بطال، أو متمدحيهوش ولا بتشجعيه خالص؟



ما تفعله صوته أعلى مما
تقوله

الأدب واحترام الآخرين

في السوبر ماركت، أسماء كانت بتعمل شوبنج ومعاها ياسين
ابنها. ياسين زهقان من الشوبنج فيجري في المحلّ من هنا لهنّا،
ويمسك كلّ حاجة على الرفّ، ويلعب بيها شوية ويحطّها في
مكانها أو مش في مكانها حتى، يمسك إزازة الزيت شوية، كيس
السّكر شوية، كيس الأرز شوية، ومامته كلّ شوية تقول له:

- بسّ يا ياسين متلعبش في حاجة، وتعالى هنا جنبي.

ياسين مبيسمعش أسماء بتقول إيه أصلاً، ولا هي حتى بتبصّ تشوفه بيلعب
لسّه في الحاجات ولا لأ، ومكّملة شوبنج عادي. بسّ كلّ ما تشوف حدّ بيقربّ من
ياسين أو يبصّ على اللّي بيعمله تناديه برضه، وتقول له بطلّ لعب في الحاجات.

فجأة وقع كيس الأرز من ياسين، واتفتح على الأرض، جهَّ العامل بصَّ على
اللي حصل، أسماء قالت له:

- أنا آسفة جدًّا، أنا هحاسب عليه!

- طيب خدي بالك يا مدام من ابنك علشان مُمكن يكسر حاجة
في المحلّ.

- حاضر.. حاضر.

ياسين قال له بقلّة ذوق:

- إنت ما لك انت؟ ما حنا هندفعه!!

أسماء قالت لياسين وهو لسه يلعب في الحاجات ولا فارق معاه اللي حصل:
- بس عيب.. مش كفاية جبتلنا الكلام؟! يلا تعالي معايا واقعد في عربيّة
الشوبنج ومنتزلش منها أبدًا!

قعد في العربية وبيصّ حواليه ويضحك ومش حاسس إنَّ فيه حاجة حصلت
أصلاً، وصلوا قسم الحلويات، قال لها:

- ماما.. ماما.. نزليني بسرعة، بسرعة!!

- لا مفيش حلويّات النهارده، إنت أكلت حلويات كتير النهارده، وبعدين

إنت نسيت دكتور الأسنان قال لك إيه؟

- نزليني بسّ وانا هتفرّج بسّ، مش هشتري.

نزلته أسماء، قعد يتفرّج، ويمسك طبعًا كل حاجة، وأخذ شيكولاتة كندر.

- أنا عايز بسّ الشيكولاتة دي وخلص مش هاكل حاجة ثانية!

- لا، أنا قلت لأ يعني لأ، مفيش حلويات النهارده!

- بليبيبيز.. أنا هاخذ دي بسّ، ومش هاكلها النهارده، هشوف اللعبة اللي

جوه بسّ وهسيب الشيكولاتة ل بكره..

- لا خلاص قلت.

ياسين فتح في العياط، جت مامته تمسكه راح رمى نفسه على الأرض، وقعد

يصوت كأنها بتعذبه. طبعًا لما أسماء لقت الناس بتبصّ عليها أتكسفت منهم

أحسن حدّ يقول عليها بتضربه أو بتحرمه من حاجة! وفي الآخر جابتله الشيكولاتة

اللي هو عايزها، وقالت له:

- خلاص قوم يلا، أنا جببتك اللي انت عايزه! استريحت؟ بسّ

متاكلهاش النهارده! فهمت؟

- حاضر.. حاضر.

مشيوا شوية في المحلّ، وياسين فتح الشيكولاتة، وشاف اللعبة وبعدها بشوية

أكلها، وأسماء شافته بسّ طنّشت وعملت نفسها مش شايفاه علشان تتجنّب

المشاكل. وصلوا عند قسم الألعاب، قال لها:

- ماما، أنا عايز العربية دي.

- لا.. إنت عندك عربيات كتير.

- لا معنديش الشّكل ده، ونفسي فيها من زمان.

- لا خلاص بقى، إنت تعبتني قوي في الشوبنج.
- إنت مبتجيبيليش حاجة خالص، إنت أوحش أم.. إنت مبتحببيليش (وبدأ يعيِّط بدموع وبشكل مؤثر يمكن يصعب عليها).
- ليه بس بتعيط؟ أنا بحبك جدًّا، وبعدين مش أنا لسّه جايالك شيكولاتة دلوقت؟ يبقى بحبك...
- مش عايز شيكولاتة، أنا عايز العربية دي (بنفس الدموع المؤثرة).
- خلاص هجيبها لك، متزعليش.
- هيبيبيبيبه.....
- راحت أسماء عند الكاشير، وحاسبت على المشتريات اللي اشترتها وزيادة عليها طبعًا الأرز اللي اتفتح والشيكولاتة اللي اتأكلت، والعربية اللي عندهم في البيت منها كثير، وهي بتحاسب.. رنّ الموبايل، ردّت وقالت:
- حاضر يا شريف خلّصت وطالعة أهو، يووووه!!
- طلعت أسماء وباسين، وركبوا عربيّة شريف جوزها، أول ما ركبت قال لها:
- إيه!! ساعة علشان تطلعي؟
- ساعة إيه؟! إنت لسّه جاي ومكلمني!!
- لا بقالي كثير وواقف غلط بالعربية، وبعدين دي مش أول مرّة، إنت على طول بتسيبيني ملطوع برّه.
- يووه.. هتقعّد تقول لي على طول ومش على طول، ما انتّ على طول

بتسبيني أعمل الشوبنج لوحدي، وتروح تقعد مع أصحابك على القهوة!

- كلّ شوية هتقوليلي أصحابك.. أصحابك، مش عايزاني أفكّ شويّة بدل النكد

اللي أنا فيه ده؟ دي بقت حاجة تخنق!

- خلاص وأنا هروح عند ماما بالليل، مش لازم تيجي معايا، خليك مع

أصحابك، خليهم ينفعوك.

بالليل راحت أسماء وياسين عند مامتها، وطبعًا شكلها متضايق، شويّة تتنرفز

على ياسين، وشويّة ياسين يتعصّب عليها.

أمّ أسماء ستّ عاقلة وذكية، وبتحبّ دايماً تنصح بنتها، فقالت لها:

- ما لك يا أسماء النهارده؟

- مفيش حاجة يا ماما، أنا كويسة أهو...

- اتخانقتِ مع شريف تاني؟

- هو اللي بدأ.

- وبرضه طبعًا اتخانقتوا قدام ياسين زيّ كلّ مرّة!

- هو اللي نرفزني ومعرفتش أسكت!

- أنا قلت لك كام مرّة قبل كده إنك مينفعش تشدّي مع جوزك قدام ياسين،

يا بنتي كده خطر عليه. إنتِ مش شايفه بقى بيزقّ في الكلام ازاي على طول

وعصبي؟! مع الوقت كده هيخاف منكوا إنتوا الاتنين.

- معرفش بقى يا ماما! إقفل يا ياسين التابلت علشان هنمشي.

طبعًا ياسين ولا هنا ولا سمعها، ولا ردّ عليها، وهي كمان طنّشت

طلبها بعدها كالعادة وكَمَلت كلام مع مامتها، بعدها بنص ساعة فجأة كده راحت لياسين وشَدت منه التابلت، وقالت له بزعيق:

- أنا مش قلتك إقفل التابلت بقالي ساعة؟! إنت مبتسمعش الكلام ليه؟!

ياسين اتنرفز وراح قعد يضرب فيها، راحت مسكته وضربته هي كمان. مامتها

أخذت ياسين ودخلته جوّه الأوضة وهدّته وطلعت لأسماء، وقالت لها:

- فيه إيه يا أسماء؟ إنتِ حاسّه إنَّ طريقتك دي هتريّ الولد؟

- ما انتِ مش شايفة بيعمل إيه وبيكلمني أزاى من الصبح؟

- بسّ مش هو ده الحل، إنتِ علشان متخافقة مع جوزك هتطلعليه على

ابنك؟ هو ذنبه إيه؟

- خلاص أنا زهقت، ومش عارفة أعمل معاه إيه!

- هقول لك، عارفه نادية جارتنا؟ ابنها كان عامل مشاكل على طول، وكانت

بتشتكي منه دائماً. راحت عند دكتور متخصص في تربية الأطفال، قال لها أزاى

تتعامل مع ابنها كويس ودلوقتِ بقى مؤدّب جدًّا ما شاء الله، وهي كمان بقت

هادية ومبقتش تتعصب عليه خالص.

- اسمه إيه الدكتور ده وأنا أروح له؟ أنا محتاجاه فعلاً.

- اسمه الدكتور أسامة.. استنّي هكلمها وأجيلك رقمه وعنوانه.

عند عيادة الدكتور..

- ياسين ابني يا دكتور عنده سبع سنين، قليل الأدب، ومبسمعش كلامي خالص، ولا بيردّ عليّ أصلاً لما أكلّمه، بيعيِّط ويصرخ لما بيكون عايز حاجة، ولو ماجبتهاش يرمي نفسه على الأرض، ويمكن كمان يضربني لو معملتلهوش اللي عايزه. والمشكلة كمان إنّي حتى لو جبتله اللي عايزه مبيشكرنيش ولا بيقدرّ اللي جايباه، وميرضاش بيه ويطلب حاجة تانية، وهكذا.... أعمل إيه يا دكتور؟ أنا مش عارفه أتعامل معاه خالص، والكلّ كمان بيشتكي منه، وباباه كمان شايل إيده من الموضوع، ولا كإنه ابنه.

* - أكبر حاجتين بيشاركوا في إنّ الطفل يتصرّف التصرفات دي هي:

أول حاجة إنّ الأمّ بتتعامل مع الطفل بطريقة والأب بيتعامل بطريقة تانية خالص عكسها، ومختلفين في طريقة التربية، وكلّ واحد بينتقد طريقة الثاني، وبيبينّ ده في معاملته مع الطفل.

تاني حاجة إنّ الأمّ والأب بيبيّنوا مشاكلهم، وبينتقدوا بعض، أو بمعنى أصحّ بيتخانقوا كثير قدامه.

في الحالة الأولى اللي هي كلّ واحد له طريقة في التربية عكس طريقة الثاني، يعني واحد بيدلّع قوي وواحد بيضرب، أو واحد بيسييه

يعمل اللي عايزه، والثاني بييجي يقول له غلط على اللي بيعمله ده، الطفل ساعتها مش هيبقى عارف الصح من الغلط. هيبقى تايه في النص، ومع الوقت كمان بيعرف طريقة كل واحد، فيبقى عارف إنه لو عايز حاجة يروح للي بيوافق على طول، ويخبّي على الثاني، مهو عارف إن فيه بينهم خلاف في التربية ومحدش هيفتن عليه.

الصفة اللي عايزاها تكون
في طفلك لازم تتأكد
الأول إنها فيك

في الحالة الثانية اللي هي لو بيتخانقوا مع بعض قدامه، الموضوع ده بيخلي الطفل عصبي ومش حاسس بالأمان، والأخطر من كده إنه بيتعلم عدم الاحترام.

الأم والأب بالنسبة للطفل قدوة، لو شتمت هيشتم، لو بتتعامل بالزّعيق هيتعامل بالزّعيق، لو تعاملت بهدوء هيبقى هادي. من الآخر الصفة اللي عايزاها تكون في طفلك لازم تكون فيك أولًا.
- عندك حق يا دكتور، أنا محاول أغير نفسي الأول فعلاً.

- الخطأ الثاني اللي ممكن يكون سبب كبير في تصرفات ابنك، وكثير من الأمهات والآباء يقعوا في الخطأ ده، هي عدم الثبات على الكلام، وعدم التناسق، واللي بيسمّوها الـ **consistency**، ودي لما تيجي تطلبي حاجة من ابنك أو بتقوليله على قاعدة يعملها أو يمشي عليها يبقى لازم تتأكد إن عملها مش تقولي له على الحاجة ومشي وتطنّشي بعد كده. يعني لما تقوليله مش هجيب حلويات النهارده من السوبر ماركت يبقى لازم يعرف إنك تقصدي فعلاً إنك مش هتجيب حلويات من

السوبر ماركت مش يبقى عارف إنه المفروض يضغط عليكِ أو يتحايل عليكِ شويّة علشان توافقي، لو انتِ ناوية تجيبي يبقى متقوليش لأ من الأول.. لما تقولي متاكلش الشيكولاتة دلوقتِ يبقى معناها إنه مياكلش الشيكولاتة دلوقتِ، مش معناها إنه مُمكن ياكلها على جنب بعيد عنك، وإنك هتشوفيه ومش هتقولي له حاجة علشان هيصعب عليكِ.

الطفل ذكي وعارف آخرك، لما بتطلبي منه حاجة يبقي عارف إنكِ تقصديها فعلاً، ولا كلّها كام دقيقة وتنسي وتنشغلي عنه ويعمل اللي ايزه! وساعتها هتلاقيه مش مُنتبه أصلاً وقت ما بتطلبي منه حاجة علشان عارف إنه مش مهمّ يسمع علشان مش مهمّ ينفذ.

-أصله لما بيطلب مني حاجة وأنا رفضتها في الأول، زيّ مثلاً ايز حلويات في السوبر ماركت، وقلت له لأ بيرمي نفسه ويتمرمخ على الأرض، وبيعيّط عياط هستيري كإني بعدّبه، والناس كلّها بتتفرّج عليّا، مبيسكتش غير لو نفّذت له طلبه!
- لو طلب منك حاجة وانتِ مش موافقة فقعد يعيّط، خديه برّه المحلّ بهدوء وهو بيعيّط، مُمكن تشيليه لو مش ايز يمشي معاك، وتقعدي معاه وتقولي له بهدوء «أنا مش هكّمّل شوبنج لحدّ ما تهدي، أوّل ما تكون جاهز قل لي»، وممكن ساعتها تطلّعي حاجة تقريها أو تنشغلي بيها زيّ الموبايل مثلاً لحدّ ما يهدى، ويقول لك نرجع نكّمّل شوبنج، وساعتها اشكره بهدوء إنه عرف يهدّي نفسه ويسيطر على

مشاعره علشان تعرفوا تكملوا الشوبنج.

في حالة إنه مسكتش وفضل يعيِّط ويتشنج ومش عايز يهدى قولي له «إنت مش عارف تهدي يبقى الحلُّ إننا نروح البيت دلوقتِ، وهنزل أعمل أنا شوبنج لوحدي مرّة تانيه» وفعلاً نفَّذي ده، تروحي البيت وتسيبيه مع حدّ، وترجعي أنتِ

في نفس اليوم أو يوم تاني للشوبنج لوحده، ولو شَبِط وعايز ينزل معاكِ تقولي له بكلِّ هدوء «أنا آسفة قدّام هعرف آخدك معايا المرّة دي زي ماقلتلك، ممكن آخذك المرّة الجاية».

اتصرّفي مع طفلك
بالطريقة الّلي إنتِ
شايفها مناسبة قدّام
الناس أو من وراهم،
متخلّيش دي نقطة
ضعف تعوق تربيتك
لابنك

أنا عارف إنّ ده تعب عليكِ، وممكن تحسّي إنه مستحيل يتنفَّذ بسّ هي دي التربية، لازم الطّفّل يعرف عواقب فعله مش يعمل أيّ حاجة هو عاوزها في أيّ وقت وعارف ازاي يعرف يضغط عليكِ كويس.

وبالنسبة لكلّمة «الناس هتقول»، متخلّيش دي نقطة ضعفك قدّام ابنك، اتصرّفي مع طفلك بالطريقة الّلي إنتِ شايفها مناسبة قدّام الناس أو من وراهم، متخلّيش دي نقطة ضعف تعوق تربيتك لابنك، محدّش من الناس دول هينفعك لو معرفتيش تريّ ابنك كويس.

- طيّب أنا ساعات بنادي عليه وأطلب منه حاجة يعملها مبيعبّرنيش أصلاً كإني متكلّمتش، أطلب منه يقفل التابلت يفضل يلعب ولا كإني اتكلّمت.

- هو اتعوّد خلاص إنك لما بتناديه، وتطلبي حاجة منه بتنسي بعدها ومبتصرّيش عليها، فمبتركز فيها علشان بالنسبة له الكلام ده مش مهم قوي.

لو عايزه ترجعي تفهميه إنك لما بتطلبي منه حاجة إنك بتعنيها مش بس كلام وهي تنسى.

أولاً اطلبي منه حاجة منطقية يقدر يعملها (إن أردت أن تُطاع أو أمر بالمستطاع) يعني مش يبقى في نصّ اللعبة وتقولي له أقفل دلوقت، قولي له «خلّص اللعبة دي للآخر، وبعدين أقفل».

تاني حاجة لما تناديه وميردّش عليك، تروحيه وتقولي له بهدوء «أنا كنت بناديك وبقول لك تقفل التابلت بعد اللعبة دي»، لو مردّش عليك برضه وطنّش، يبقى تعلمي pause للعبة، وتقولي له بهدوء «أنا وقفت للعبة علشان لقيتك مش سامعني وأنا بقول لك أقفل التابلت بعد اللعبة دي»، وخليه يفتحه تاني ويكمل الدّور بتاعه، وتبقي واحدة بالك لما يخلص اللعبة إن المفروض ينفذ اللي اتفقتوا عليه، وشجّعيه واشكريه لما ينفّذه، معلش مُمكن تتعبي في الأوّل، بس لحدّ ما يتعوّد إنه يسمع اللي قدّامه كويس ويركز معاه، والموضوع ده هياجد وقت، و محتاج صبر.

ناقص حاجة واحدة في موضوع الـ **consistency** وهي إنك لما بتقولي على حاجة غلط يبقى تفضل غلط في كل المواقف وكل الظروف، وباباه كمان يقول له عليها غلط في كل الأحوال، يعني مثلاً مينفعش يقول لفظ مش مناسب فتضحكي في يوم وتزعليه على نفس اللفظ في يوم تاني، أو باباه يقول له غلط على تصرف معين، وانت لما يعمل قدامك نفس التصرف يبقى عادي بالنسبالك. وعلشان عملي كده لازم تبقي متففة إنت وزوجك على إيه الصح وإيه الغلط، وقبل ده كمان تكوني انت مقررة إيه الصح وإيه الغلط بالضبط. لما مبيكونش فيه **consistency**، الطفل بيتلخبط ومبيعرفش الصح من الغلط، ويحدّد هو الصح والغلط همزاجه.

لما مبيكونش فيه
consistency الطفل
بيتلخبط ومبيعرفش
الصح من الغلط، ويحدّد
هو الصح والغلط همزاجه.

- حلو يا دكتور، طيب مفيش حاجة أعملها قدامه حتى لو بتكلف تخليه يتربى شوية مادام أنا قدوة بالنسبة له؟

- آه فيه، بس مش لازم بتكلف، اعملها عادي واتعودي عليها. مثلاً لما يديك حاجة قولي له شكرًا،

لما يطلب منك حاجة تقدري تعملها قولي له حاضر، وردّي عليه على طول.

لما يكلّمك إديله انتباهك كله، متبقيش بتردّي عليه وانت بتعملي شات ومش باصّه له، لما تتكلّمي معاه أو تطلبي منه حاجة انزلي لمستواه،

وحطّي إيدك عليه، ودي حاجة اسمها لغة الجسد، وبتخلّي الطفل يتقبّل كلامك أكثر من إنك تكلميه من فوق وانتِ بعيدة عنه.

علميه المرونة، لما يحصلك حاجة عكس اللي انتِ كنتِ مخطّاه إرضي باللي حصل وقولي "قدّر الله وما شاء فعل"، وعلّميه يعمل زيّك.

لما يعمل تصرف غريب علشان يجذب انتباهك، قولي له التصرف ده غلط، لو انت حاسس إنّي مشغولة عنك، وعايزني ألعّب معاك قول لي وأنا هلعّب معاك من غير ما تعمل التصرفات دي، وقومي العبي معاه فعلاً.

وطبعاً لازم تتأكّدي من أخلاق أصحاب طفلك، واللي بيقعد معاهم، ومن الحاجات اللي بيتفرّج عليها في التلفزيون وعلى اليوتيوب علشان الحاجات دي ليها تأثير كبير على شخصيته.

الخلاصة

أسماء مبتهّمش إن يكون كلامها لياسين مسموع. فلما بتطلب منه حاجة مبتهّمش إذا كان نفذها أو لأ، وبتخاف تتعامل معاه بطريقتها قدام الناس ده غير خناقاتها المستمرة مع شريف جوزها قدامه، كل ده أثر في شخصية ياسين وخلاه مبيحترمش حدّ، ولا بيهتمّ بكلام حدّ.



الواجب العملي

لو شفتِ نفسك في أسماء إبدائي إديّ لنفسك فرصة لتغيير معاملتك مع ابنك،
واتأكدّي إنك بتعملي الثلاث حاجات دول:

- * أنفقي مع زوجك على وسيلة تربية واحدة، مش كل واحد يبقى ماشي بطريقته.
- * متشديش مع زوجك أبداً قدام ابنك.
- * لما تطلبي حاجة من ابنك لازم تفضلي وراه لحدّ ما تتأكدّي إنه نفذ طلبك، يا إمّا متطلبيهاش من الأول.



مفيش حاجة تخوف

الشجاعة

* السّاعة تسعة بالليل، وجه وقت نوم سارة، هي ومامتها وبابها قاعدين في الصّالة، مامتها نادتها:

- يلا يا سارة علشان ننام، غسليّ أسنانك؟
- لا لسّه..
- طيّب يلا روحي اغسليّ أسنانك علشان متتأخريش في النوم.
- طيّب تعالي معايا.
- آجي معاكِ ليه؟ ما انتِ بتعرفي تغسليّ أسنانك لوحداك.
- تعالي بسّ افتحيلي نور الحمام وأنا هغسل.
- لا مش قادرة أقوم دلوقتِ، يلا بقى ادخلي الحمام بسرعة.
- أنا خايقة.
- خايقة من إيه؟ مفيش حاجة تخوّف، بطليّ جُبن.
- عايزة حدّ يدخل معايا.
- يووووه.. وبعدين معاكِ؟! إنتِ كبيرة على شغل البيبيها ٥٥.

سارة فضلت واقفة مكانها ومخنوقة، وعينها مليانة دموع، مامتها قالت لها:
- خلاص هاجي معاك أفتحلك النور (وقامت وهي متنزفة) مش معقولة
الطريقة دي، مش عارفه إيه اللي بيخوف يعني!
سارة لسه مخنوقة من كلام مامتها، وغسلت أسنانها، خلصت ودخلوا الأوضة.

* مامتها نيّمتها في سريرها وغطيتها، وقالت لها تصبحي على خير،
ومشيت، وهي على باب الأوضة سارة نادت لها:

- ماما، سببي النور مفتوح، أنا مش هاعرف أنام في الضلمة.
- نعم!! فيه حدّ بينام في النور؟! مينفعش طبعا.
- أنا خايفة أنام في الضلمة.
- بسّ بلاش دلح، يلا نامي علشان فيه مدرسة الصبح.. تصبحي
على خير.

* قفلت النور والباب كمان وطلعت الصالة، جوزها شافها متنزفة،
قال لها:

- ما لك يا نهلة؟

- إنتِ مش سامع سارة؟ بقت بتدلّع ومش عارفة حصلها إيه اليومين دول!
كلّ حاجة خايفة.. خايفة.
- معلش بالراحة عليها.
وهما بيتكلّموا، جتْ سارة ووشها أحمر، وشكلها معيطة.
- ما لك؟ حصل إيه؟
- مش عارفة أنا، خايفة.
- مفيش حاجة اسمها خايفة.. إنتِ كبرتِ خلاص، وإيه بقى اللي مخوفك إن شاء الله؟

- خايفة من الـ **monster**!!

- ههههههه... **monster** إيه وكلام فارغ إيه؟! مفيش حاجة اسمها كده، ويلا بسرعة ادخلي نامي. هأعدّ واحد... اثنين...

لسه بتقول ثلاثة، لقت صرصار ماشي على الأرض.. أوّل واحدة خافت هي نهلة، وطلعت بسرعة فوق الكرسي واترعبت ورعبت سارة، وهي أصلاً مش ناقصة، هي خايفة لوحدها!

- آآآآآآه، الحق يا أحمد صرصار، أقتله بسرعة!!

بعد ما أحمد قتل الصرصار، أخذ سارة ودخلها أوضتها علشان تنام. وكلّ شوية تطلع ويدخلوها، وبعد محاولات كثير نامت سارة أخيراً.

سارة صحيت الصبح، ورايحين المدرسة، قالت لمامتها:

- ماما، أنا بطني وجعاني.

- إنتِ كلِّ يومِ الصبحِ تقولي لي بطني وجعاني قبل المدرسة!! فيه إيه؟!!

- أنا مش عايزه أروح المدرسة! خيفة.....

وبعد محاولات لإقناع سارة إنَّها تروح المدرسة بالذوق وبالعافية،

نزلوا أخيراً.

المدرسة قريبة من البيت، فبتتمشِّي نهلة وسارة لحدِّ المدرسة.

الأتنين ماسكين إيد بعض جامد جداً كإنَّ حدَّ فيهم هيهرب. يبجوا

يعدّوا الشَّارع، نهله تقول لسارة:

- خدي بالك من العربية، حاسبي!!

وطول الطريق سارة خايفة من الشَّارع، وفي نفس الوقت نهلة كلِّ شوية

تقولها: حاسبي العمود، حاسبي الطَّوبة، حاسبي العربية، هتخبطي في عمو..

وهكذا كأنَّها مش شايفة الطريق، لحدِّ ما وصلوا المدرسة بالسلامة الحمد لله.

نهلة سابت سارة على باب المدرسة، بسَّ بتبصَّ عليها من بعيد، سارة ماشية في

المدرسة، كلِّ ما حدَّ يقربُّ منها متعرفوش سواء كان طالب أو مدرس أو دادة حتى،

تخاف وتكشَّ وتبعد. خايفة من كلِّ الناس اللي حوالها. كلِّ ده نهلة بتبصَّ عليها

ومتضايقة.. فطلبت تقابل الميس بتاعة سارة.

- إزيك يا ميس.

- إزيك يا مدام نهلة.

- الحمد لله، سارة عامله إيه معاك؟

- سارة شاطرة وكويسة وهادية.

- طيب هي بتلعب مع أصحابها.. وكده؟

- يعني مش دائماً، بتلعب معاهم لما بنكون في الفصل. بس في الحوش مبتلعبش خالص، بتفضل قاعدة في مكانها.. لو جه حد من أصحابها قعد معاهها ماشي، لو لأ.. بتقعد تتفرج عليهم، وهما بيلعبوا بالزحليقة والعقلة بس مبتحاولش تجرب.

- شكراً يا ميس.

روحت نهلة، وفضلوا على الحال ده، كل يوم سارة مخاوفها بتزيد؛ تخاف تنام بالليل، وتخاف تروح المدرسة، وتخاف من الناس، وتخاف من كل حاجة..... ونهلة تزعلها أكثر، وساعات تعاقبها على جبنها، وساعات تتريق عليها وعلى مخاوفها، وسموها في البيت سارة الجبانة...

كل ده بدل ما يعالج سارة، خلى سارة تخاف أكثر وأكثر، لدرجة إن خوفها بقى مَرَضِي، بقت تقرض ضوافرها، وتعمل على نفسها بالليل.

أحمد ونهلة حاسين بالضغط من اللي سارة بتعمله، ومش عارفين يعملوا إيه، أحمد قال لنهلة:

- إنتِ هتفضلي مسميه سارة الجبانة كده على طول وتزعقلها؟

- ماهي بقت جبانة قوي، وأنا مش عارفه أتصرف معاها أزي!

- أنا حاسس إن اللي احنا بنعمله ده بيخليها جبانة أكثر.

- طيب نعمل إيه؟! أنا خايفة عليها!

- وأنا كمان، أنا حاسس إنها هتبقى مريضة، وعندها فوبيا كده. تعالي ندور

على دكتور متخصص في التربية ولا حاجة يساعدنا بدل ما تضيع منّا.

- طيب ماشي، أنا هدور على دكتور ونروحله.

بعد تدوير كتير لقت دكتور أسامة.

في عيادة الدكتور...

- إحنا عندنا بنت اسمها سارة، سبع سنين، من فترة بقت بتخاف جداً من كل

حاجة، بتخاف من الناس، بتخاف من الضلعة بطريقة مش طبيعية، بتنام في النور،

بتخاف من المدرسة، ومن السلم حتى، تقريباً بقت بتخاف من كل حاجة لحدّ ما

بقينا مسمّينها سارة الجبانة (وحكوا له على كل تصرفاتها).

- بدايةً كده، حكاية إنكوا تطلقوا على الطفل لقب معين أو تسمّوه

بصفة اعتقاداً منكوا إنّ ده كده هيساعد في تقليل الصفة السلبية اللي

عنده ده خطأ كبير جداً. وده بيسموه **labeling** وهو لما تسمّي بنتكوا

مثلاً اسم الجبانة، وتنادوها على طول بالاسم ده أو فلان البطيء أو

البليد، أو أيّ حاجة زي كده، بالطريقة دي بتزودوا عنده الصفة دي

«عندما نقوم بتسمية أطفالنا، فنقوم بتعريفهم دون قصد. فنحدّد لهم مَنْ هم وما نتوقّعه منهم»
د. روبن سيلفرمان

أكثر وأكثر على عكس المتوقّع. ما انتوا خلاص لزقتوا فيها صفة الجبن، حتى لو هي مكانتش حاسّة إنّها جبانة قوي هتقتنع خلاص إنّها جبانة، وتتصرف على أساس كده لحدّ ما تقنع نفسها والّي حوالها إنّها جبانة فعلاً.. فأكبر خطر إنكوا تحطّوا label للأطفال.
- آه عندك حقّ يا دكتور، أنا قلت

لنهلة كده برضه. البنت كانت بتضايق الأوّل من الكلمة دي، وبعدين اتعودت عليها، وكمان بقت بتخاف وجبانة أكثر بعدها.

- الخطأ الثاني الّي ساعات كثير الأهل بيقعوا فيه هو إنّ لما طفلهم بيخاف من حاجة مبراعوش مشاعره ومخاوفه، ويقللوا منها ويحقروها اعتقاداً منهم إنّهم كده بيصغّروا المخاوف دي في عين الطفل، ويخلّوه ميخافش خلاص. بسّ بالعكس الطفل كده بيحسّ إنّ محدّش حاسس بيه، ولا فاهم مخاوفه إيه، فيفضل كاتهما في نفسه علشان لما بيقولها بيتريقوا عليه، فبالتالي بتزيد جواه يوم بعد يوم.

يعني لما سارة تيجي تقول أنا خايفه من الـ **monster** مثلاً، بدل ما تقولوا لها مفيش حاجة اسمها **monsters** أو إيه الكلام الفارغ ده، أو

إنّ كبرى مش بيبي علشان تقولي كده، احضونها أوّلًا علشان دي أكثر حاجة مُمكن تطمّن الطفل وتحسّسه بالأمان، وبعدين اتناقشوا معاها من غير تريقة ولا استهزاء، قولوا لها: «ممكن يكون الـ monster ده فين؟» لو قالت في الدّولاب خدوها وافتحولها الدّولاب، وخلّوها تتأكّد إنّ مفيش حاجة جوّه، إنزلوا تحت السرير وزّوها إنّ تحت السرير فاضي، وده كلّ طبعًا من غير استهزاء أو تقطيم أو جرح مشاعر، يعني بلاش تقولوا «شفت.. أهو مفيش حاجة من الكلام الفارغ ده زي ماقلتلك» حسّسوها إنكوا بتدوروا معاها بجدّ.

لمّا تقول لطفلك إنّ
مفيش حاجة تخوّف وهو
خايف، ده بيخليّ خوفه
يزيد ويكبر جّواه.

أو اسألوها «عندك أفكار نعملها علشان نمشيّ الـ monster ده؟» وخلّيتها تفكّر في حلول بنفسها، زي مثلاً تخليّ جنبها كشّاف نور أوّل ما تحسّ إنها خايفة بالليل تفتحه، أو اقترحوا عليها تجيبولها ونّاسة تتحطّ في الأوضة وهي نائمة، أو

أيّ حلّ هي تقترحه، يعني مثلاً فيه أمّ إدّت لبنتها سبراي فيه مياه، وقالتها ده سبراي سحري بيشيل الـ monsters وبتخليها ترشّ منه في الدّولاب قبل ما تنام وتحت السرير. وعلى فكرة الطرق دي مبتاخدش وقت في العلاج، يعني كام يوم بسّ وهتلاقيها نسيت الحاجة الليّ كانت مخوّفاها، مش هتفضل تدور كلّ يوم في الدّولاب يعني! بسّ لمّا تقولولها إنّ مفيش حاجة تخوّف

وهي خائفة؛ ده بيخلي خوفها يزيد ومشكلتها تكبر جواها.

- أنا بعد كده هتكلم معاها فعلاً، ومش هسيبها تخاف لوحدها كده.

- فيه طريقة كمان مُمْكِنَ تعملها تخليها تقدر نقيّم حدّة خوفها وتفكر مع نفسها إذا كان الموضوع يستاهل الخوف ولا لأ، أسألها إنتِ خائفة قدّ إيه؟ من الأرض لحدّ قدمك ولا لحدّ ركبتيك ولا لحدّ بطنك مثلاً؟ أو لو طفل كبير شوية يبقى يقيّم حدّة خوفه بالأرقام، هو خايف قدّ إيه من صفر لعشرة، على أساس إنّ عشرة تكون أكثر خوف، وصفر أقلّ خوف، زي بالظبط لما الدكتور بيسأل المريض عن شدّة ألمه قدّ إيه. الطريقة دي بتخليّ الطفل يعرف قدّ إيه بالظبط هو خايف، ومُمْكِنَ بعدها كمان تسألها تاني بعد ما تهدى أو بعد ما تهدّيها بالطرق اللي قلناها قبل كده وتشوفي خوفها قلّ فعلاً ولا لأ.

- دي فكرة جميلة جدّاً، سارة هتحبّ تعبّر عن نفسها بيها.

- كويس، من الحاجات المهمّة طبعاً في التربية، وبقولها دايماً هي القدوة، الطفل هو مراية أبويه، لو سارة لقياك بتخافي من أقلّ حاجة هتخاف طبعاً، لو شايفاك مبتخافيش من كلّ حاجة هتعمل زيّك بالظبط. الطفل لما يتولد مبيقاش عارف إيه الحاجة اللي بتخوّف من الحاجة اللي مش بتخوّف، هتلاقي القطة عنده زي الأسد مفيش فرق. الفرق بعد كده ببيجي مع الخبرة في الحياة ومع تقليد الأبوين، يشوفك بتخافي من إيه يبقى ده خطر يبعد عنه، وهكذا.

طبعاََ أحمد ونهلة مقدروش يمسكوا نفسهم وقعدوا يضحكوا وافتكروا الصّرصار اللي نهله شافته.

- لو سارة كانت خايفة من حاجة حقيقيّة زيّ المدرسة أو المرجحة أو السلم مثلاً، اتكلّموا معاها، اعرفوا هي خايفة من إيه بالظبط في المدرسة، واسمعوها كويس للآخر من غير مقاطعة، ومن غير استهزاء بمخاوفها، ومن غير ما تحاولوا تقنعوها بعكس اللي في دماغها.

لو هي كانت خايفة مثلاً من المدرسة خلّوها تخلّص كلامها الأوّل، وبعدين عرفوها القواعد اللي بتتبعها المدرسة لسلامة الطّلاب، يعني مفيش حدّ غريب بيسمحوا له إنه يدخل المدرسة، المدرسة عارفة كلّ الموجودين فيها وأرقامهم وعناوينهم، باب المدرسة مقفول على طول، والأمن بسّ اللي معاها المفتاح، الطفل اللي بيزقّ حدّ من على الزحليقة بيتعاقب، وحتى لو حدّ وقع على الأرض مبيحصلوش حاجة علشان الأرض معمولة بطريقة تمتصّ الصدمات، وحتى لو اتعورّ بيروح عند الممرضة وتعمله الإسعافات اللازمة ويرجع فصله.... وهكذا. حاولوا تطمّنوها بحقائق علمية، مش بسّ تقولوها مفيش حاجة تخوّف وخلص، لازم تكون عارفة إيه آخر أيّ سيناريو مُرعبٍ جه في بالها.

ودوركو امان إنكوا متخوّفوهاش من الناس ومن كلّ حاجة محيطيّة، يعني بدل ما تقولوها «متبعديش علشان محدّش يخطفك» قولوا لها «متبعديش علشان أفضل شايفاك على طول». وخلّوها تمشي بحرية

أكثر وتلعب بحرية أكثر، يعني مش على طول تستخدموا كلمات زي حاسبي و.. هتقعي... الخوف الزايد عليها بيخليها هي كمان خايفة على نفسها، وحاسة بالخطر أكثر.

- أه صح، أنا بخاف عليها قوي، خصوصًا في الشارع.

- هي كبرت وعارفة الخطر، مش لازم تقوليلها حاسبي العمود مثلاً، أكيد هي شايفاه.

- أيوه صح، عندك حق يا دكتور.

- بالنسبة للنوم بقى، خلى عندها روتين يومي ليلي للنوم، اقرئي لها قصة، وبعدين قولوا مع بعض أذكار النوم، وبعدين تبوسها وتسيبها تنام، ممكن في الفترة دي تحكيها قصص عن التعامل مع الخوف، وده يمكن يخليها تأخذ أفكار أكثر للتعامل مع مخاوفها، احكيها قصص الصحابة والرسل، وركزي على شجاعتهم. علميها لما تخاف تستعيز بالله، وتقول آية الكرسي وتأخذ نفس عميق وتطلع ببطء، وهكذا علشان تعرف تتعامل مع مخاوفها لوحدها.

ومينفعش وهي خايفة وعايزة تطمئنها تقوليلها متخافيش أنا معاك، هيبجي في ذهنها إنك مصدر الأمان، ولو إنت مش موجودة يبقى فيه خطر عليها.

- طيب في حاجات معينة نتجنبها علشان البنت تبقى شجاعة؟

- آه، من الحاجات الخطيرة اللي بتحسس الطفل بعدم الأمان هي

خناقات الأمّ والأب قدّام الأولاد، دي بتخلّي الطفل خايف دايماً.
وكمان الفرجة على أفلام رعب أو ألعاب رعب، فلازم تعرفوا هي بتتعرّض
لإيه بالظبط.
- أخيراً الحمد لله في حاجة واحدة مبنعملهاش... ههههه.

الخلاصة

سارة كانت عندها مشكلة زي باقي الأطفال اللي في سنّها، وهي
الخوف، بس لما نهلة وأحمد كانوا بيتّريقوا على مخاوفها ومش
حاسّين بمشاعرها وكمان مسمّيينها سارة الجبانة، ده غير إنّ نهلة
أصلاً مكانتش قدوة لبنتها في الشّجاعة، كلّ ده بدل ما يقلّل
الخوف عندها زوّده أكثر.. وأكثر.



الواجب العملي

الواجب العملي المرّة دي عبارة عن تدريبين تعملهم كلّ يوم، وتعوّد نفسك عليهم، اليوم اللي تعملهم فيه تحطّ علامة صحّ، واليوم اللي تنسى فيه تحطّ علامة خطأ...

اليوم	تجنّب تسمية طفلك بأي صفة مهمّما كانت	بيّن لطفلك إنّك حاسس بيه وبمشاعره، ومتعاطف معاه
السبت		
الأحد		
الاثنين		
الثلاثاء		
الأربعاء		
الخميس		
الجمعة		

- لا.. إنت الليّ كسرتّه، أنا شايقة المضرب أهو على الأرض!!
- لا! ده.. ده.. ده أنا كنت بسّ بجّهزه علشان بكره..
- إنت كذاب! أنا مش قتلتك المضرب ده ميطلعش في البيت؟
- مش أنا، دي القطة! أحلفلك بإيه؟
- خلاص، ادخل أوضتك ومش عايزة صوت.
- طارق صحي من الرّيق طبعًا، وقال:
- ما لك يا هالة؟ صوتك جايب لآخر الدّنيا، فيه إيه! وإيه الإزاز ده؟
- حمزة مسمعش كلامي ولعب بالمضرب وكسر إزاز النيش، وكمان بيكذب زيّ عوايده، ويقوللي القطة الليّ كسرتّه!!
- معلش هدّي أعصابك، عملتِ الغدا؟ أنا نازل كمان شوية.
- جرس موبايل طارق رنّ، ردّ طارق:
- ألو، أيوه يا باشا أنا خلاص أهو في الطريق، عشر دقائق وأكون عندك.
- طبعًا طارق بيحوّر على صاحبه ولسه مغسلش وشّه أصلًا،
- ولا لبس حتى علشان يبقى في الطريق، وحمزة وهالة
- سامعين المكالمة، ومتعودين طبعًا على التحوير ده....
- أنا هنزل دلوقتٍ وهتغدا لما أرجع.
- هالة دخلت قفلت على الأكل لحدّ ما جوزها يبجي، وراحت تلّم
- الإزاز من على الأرض، وبعدين مسكت الموبايل وقعدت على الفيس

بوك علشان تهدّي أعصابها، وحمزة مسك التابلت يتفرّج شويّة على الكارتون اللي بيحبّه، جرس التليفون الأرضي رنّ. هالة قالت لحمزة:

- روح ردّ على التليفون.

- ثواني طيّب.

- ثواني إيه! يلا بسرعة شوف مين، مُمكن تكون حاجة مهمّة!

حمزة راح يردّ على التليفون:

- ألو، الحمد لله.. الحمد لله.. ثواني هشوفها لك... ماما.... ماما، دي طنط

سامية عايزاك.

- قل لها إني نايمة!

- ماما نايمة يا طنط، حاضر.. هبقي أقولها، سلام.

قفل الخط، وقال ملامته:

- هو انتِ ليه مش عايزة تكلمّيها؟

- مش فايقة دلوقتِ، هكلمها بعدين.

- طيّب ده كده مش كذب؟

- كذب إيه! بلاش إنت!! دي اسمها كدبة بيضاء متعتبرش كذب، ده علشان

مينفesch أخليك تقولها هي مش عايزة تكلمك دلوقتِ... فهمت؟

- أه فهمت، أنا خفت بس ليكون كذب ولا حاجة!

عدى اليوم خلاص، وجهُ يوم التدريب.

هالة وصلت حمزة للتدريب، دخل الأوضة جوّه علشان يحضّر

نفسه قبل الماتش، فقابل زميله أحمد اللي هيلعب قدامه، حبّ يغلّس عليه

ويستفزه شوية قبل الماتش، قال له:

- هتقطع النهارده يا أحمد!!

- هنشوف مين اللي هيكسب ومين هيخسر!

- هنشوف!! **You loser**

- بسّ يا حمزة، أنا عايز أركز شوية قبل الماتش...

- بتقول لي بسّ!؟

وقام حمزة مسك في خناقّه، جه المدرب فصل بينهم، وسألهم:

- إيه اللي حصل؟

- حمزة جه يضايقني ويضربني كمان علشان مش عايزني أركز قبل المسابقة.

- لا، أحمد هو اللي بدأ، وكمان قال لي هقطعك و**you loser**!!

- أنا؟!!

- أه، ولما قتلته سييني أركز شوية جه مسك فيا، وعايز يضربني!!

- أنا؟!!

- يلا انتوا الاتنين، اللي هلاقيه بيعمل شغب ثاني مش هيلعب النهارده.

وفصلهم المدرب كل واحد في مكان.. شوية وبدأ الماتش...

لعبوا همّا الاتنين كويس طول الماتش بسّ في الآخر أحمد هو اللي كسب

بفرق بسيط، وحمزة محالفهوش الحظّ، هالة قابلت حمزة بعد الماتش وقالت له:

- معلش يا حمزة، المرّة الجاية هتکسب إن شاء الله.
- لا أنا كنت المفروض أكسب، بسّ أحمد هو الليّ جه قعد يتخانق معايا قبل
- الماتش ويضربني وخلّاني مش مرکز، وحتى في الماتش كذا مرّة كان قاصد يكعبلني
- ويزقني، هو الليّ المفروض يخسر مش أنا... ده مش عدل!!
- معقولة!! طيّب روح اسبقني على العربية، وأنا هتکلم مع المدرّب.
- لا خلاص يا ماما مش مشكلة!
- مش مشكلة إيه؟ ده كده ظلم!
- لا خلاص، خلاص، أنا راضي خلاص، خليه يكسب المرّة دي من نفسه.
- روح بسّ اسبقني وأنا هاجي وراك، خدِ المفاتيح.
- هالة راحت قابلت المدرّب وسألته على الكلام الليّ حمزة قاله، وطبعًا
- اتصدمت لما عرفت إنّ العكس تمامًا هو الليّ حصل، هالة اتنكّدت من كذب
- حمزة الدائم ده، راحت لحمزة في العربية وقالت له:
- إنت ليه بتكذب عليّا وتقول لي إنّ أحمد اتخانق معاك، وانت أصلًا الليّ
- عملت كده؟
- مين قال لك كده؟ ده همّ الليّ كذاين مش أنا!!
- لا.. أنا عارفة إنّك كذاب! ماهي دي مش أوّل مرّة تكذب فيها،
- فاكر الإزاز بتاع امبارح؟! ولا فاكر خناقه الباص الأسبوع الليّ فات؟!!

ولا الليّ الميس قالتهولي الأسبوع الليّ قبله؟!!

- لا أنا مبكذبش، إمبراح قلت لك القطة هي الليّ كسرت الإزاز، والباص
الولاد همّا الليّ بدأوا يتريقوا عليّا وأنا قاعد في حالي، وكمان إنتِ عارفة إنّ الميس
دي مستقصداني من أوّل السنة... إنتِ بتصدّقي كلّ الناس ماعدا أنا... خلاص أنا
بسّ الليّ وحش والباقي كلهم ميغلطوش.

وحمزة قلبها دراما علشان يخلص الموضوع على خير، وخلص فعلاً بالطريقة
دي، وعدّت الأيام وجه وقت امتحانات الميدي تيرم...

حمزة كان مذاكر كويس، بسّ فيه سؤال ناسيه في الامتحان،
حاول يفتكر مش عارف، زميله الليّ قدّامه وقع منه القلم على
الأرض نزل يجيبه، راح حمزة لقط بسرعة إجابة السؤال الليّ كان
ناسيه، بسّ المراقب شافه وهو بيغشّ فقال له:

- حمزة، بصّ في ورقتك، إنتِ بتغشّ؟

- لا أنا مبغشّش!

- الامتحان ده معمول علشان نعرف مستوى كلّ طالب، ملهاش لازمة تغشّ،
ده مش هيدخل في المجموع النهائي.

- يووووه يا مستر.. قتلتك أنا مبغشّش، ده حاتم هو الليّ سألني على السؤال

ده وأنا مرضتش أجابوه.

- أنا شايفك بتغشّ بعيني، عموماً الليّ هلاقيه بيغشّ ثاني هنقصّه في أعمال

السنة. فاهمين؟

خلص الامتحان، والكلام ده وصل لهالة ولطارق، فقعدوا مع حمزة، وسألوه:

- إنت غشّيت ليه يا حمزة؟

- أنا مغشّتش.

- المراقب بيقول إنّ الكلام في ورقتك زيّ الكلام في ورقة حاتم.

- ده هو الليّ كان عايز يغشّ منّي، ولمّا مرضتش بصّ هو في ورقتي وأنا مش

واخد بالي!

- أمال ليه المراقب بيقول كده؟

- هو مستقصدي وانتِ عارفه!!

- إيه يا حمزة! هي كلّ المدرسة مستقصداك؟

- وانتوا كمان مستقصدي، بتصدّقوا كلّ الناس ماعدا أنا!

وقلبها دراما طبعاً كالعاده علشان يعرف يخرج من الموقف، وخلصّ الدراما

ودخل أوضته.

هالة قالت لطارق:

- إنت مش حاسس إنّ حمزة كلّ يوم بيكذب أكثر من اليوم الليّ قبله؟!

- أه، أنا مبقتش بصدّقه في أيّ حاجة بصراحة!

- طيّب نتصرّف معاه ازّاي، ونعمل إيه؟ هنسيبه كده؟!

- مش عارف، أسألي أصحابك على حلّ، أو روحي حتى لدكتور متخصص في التربية يمكن يفيدك.

- صحّ أنا هعمل كده.

سألت هالة أصحابها، ودلّوها على الدكتور أسامة..

في عيادة الدكتور..

- أنا عندي ولد اسمه حمزة، عنده عشر سنين، من فترة كده بقى كل حاجة يكذب.. عمال على بطل، بيكذب في الحاجات الهايفة والحاجات المهمة، محدش بقى بيصدّقه خالص.....

وحكت له هالة على الليّ حمزة بيعمله، وسألته على حلّ للموضوع ده، وده كان ردّ الدكتور أسامة:

* - فيه شوية أخطاء كده بيقع فيها الأهل في التّعامل مع الطفل لما يكذب اعتقاداً منهم إنهم كده بيعالجوا ابنهم من الكذب، وهمّما بالعكس بيضروّوه ويزودوا صفة الكذب عنده.

- زيّ إيه يا دكتور؟

- زيّ تسمية الطفل بصفة الكذاب، أو بيسمّوها الـ **labeling** ، يعني لما تلاقي حمزة كذب قدامك، كسر الإزاز مثلاً، وقال لك مش أنا الليّ كسرتّه، بدل ما تقولي له إنت كذاب أو ليه بتكذب، قولي له أنا عارفة إنّ صعب الواحد يعترف بسهولة بالخطأ الليّ عمله، بسّ هو ده الصحّ، إنّ الواحد المفروض مينكرش الليّ عمله ويعترف بيه، والأهمّ من كده إنه يحاول يصلّح خطأه،

خَلِي زَعْلِكَ مِنْ كَذِبِ
الطِّفْلِ أَكْثَرَ بِكَتِيرٍ مِنْ
الْخَطَا الْمَادِي الَّتِي وَقَعَ
فِيهِ

وتدّيله المقشّة والجاروف يلمّ الإزاز الّلي اتكسر بنفسه،
وكمان يقيس طول الإزاز الّلي اتكسر علشان تعملوا غيره،
وبكده هيعرف إنّ كلّ مشكلة يقع فيها ليها حلّ، ويقدر
يعمله بنفسه، وكمان الكذب مش هو الحلّ للمشكلة
ومش هينجّيه.

- أيوه صحّ، أنا للأسف بزّعقله، وأتهمه إنه كذاب، وكمان في الآخر أنا الّلي
بنضّف وأقيس مش هو...

- والأهمّ من كده كمان إنك تحسّسيه إنك زعلت من إنكار الحقيقة
دي أكثر من كسر الزجاج، يعني خَلِي الأولويات عندك هي الأخلاق
أولاً، وبعد كده أيّ حاجة مادية. يعني يوم ما تزّعقيه أو تعاقبيه
على حاجة تعاقبيه على سوء أخلاق عملها (كذب، شتم، ضرب) مش
على حاجة مادية عملها (كسر حاجة، ضيّع حاجة) وهكذا، الموضوع
ده هيرتب الأولويات عنده الترتيب السليم.

* من الأخطاء الثانية الّلي بيقع فيها الأهل برضه هي إجبار الطفل
على الكذب...

- ازّاي هجبره؟ ده أنا ببهدله لو كذب!!
- مش هتجبريه يعني تقولي له لازم تكذب، لا.. الإيجار هنا معناه
إنك مثلاً شافه المضرب ومتأكّدة إنه هو الّلي كسر الإزاز، متسألش

«مين اللي كسر الإزاز؟» ما انت متأكدة إن هو من غير سؤال، سؤالك ده بيخليه يفكر أزاى يخرج من المشكلة دي، وجاتله فرصة إنه ينكر والمفروض يستغلها. يعني مثلاً بدل ما تسأليه «إنت عندك واجب النهارده؟» قولي له «لما تخلص الواجب هنتفرج شوية على التليفزيون».. وهكذا، متديلهوش فرصة للكذب خالص.

- وإيه كمان باقي الأخطاء؟

- لما الطفل يكذب متقديش تفكره بالقديم والجديد، وإن هو بيكذب طول حياته، مع إن الموضوع خلص من زمان، حلي كل موقف لوحده من غير تذكر المواقف القديمة، الطريقة دي بتخليه يفقد الأمل في إنه يصلح من نفسه. بالذات لو الطفل كمان اعترف بخطأه واعتذر عنه، بلاش التأنيب والجلد، الطفل كده مُمكِن يبطل يعتذر علشان كده كده مش فارقة، وكده كده هيسمعه كلمتين.

وأخطر خطأ بقى على الإطلاق.. هو كذب الأهل بالذات قدام أولادهم.

الطفل هو مراية والديه، فلو لقي والديه بيكذبوا فطبعي جداً إنه

يكذب هو كمان.. ومش قصدي على الكذب التقليدي اللي هو للخروج

من المشكلة بس.. لا، قصدي على الكذب اللي الأهل بيعتبروه مش كذب،

أو زي ما بيسمّوه كذبة بيضاء وكذبة سوداء.. والألوان دي، زي الكذبات

المشهورة طبعاً بتاعة «قول له إني مش موجود» أو «خلاص أنا في العربية

ودقيقة وأبقى عندك»

طبعًا هاله سمعت الكلمتين دول ووشها احمرّ وجاب ألوان وسكتت خالص،
والدكتور فهمّ طبعًا وكملّ كلامه:

- نيجي بقى لشوية حاجات ووسائل كده مُمكن تعمليها علشان تعالجي صفة
الكذب عند حمزة.. أوّل حاجة إنك تعرفي إيه أصلًا سبب الكذب؟!
- إزاي؟

- العلماء حدّدوا أسباب الكذب في ثلاثة أسباب:

أوّل سبب هو إنّ الطفل يكون خياله واسع فبيتخيّل حاجات أو يكون
بيتمنى حاجة تحصل فيقول إنّها حصلت، زيّ مثلاً يقول «أنا رحّت ديزني لاند»،
وده طبعًا مُمكن يكون إساءة تعبير في السنّ الصغير، ودور الأمّ ساعتها إنّها تفهمّ
طفلها الفرق بين الحقيقة والخيال.

والسبب الثاني إنّ الطفل بتكون ثقته بنفسه قليلة، ويحبّ يجذب انتباه اللي
حواليه فيتكلم أيّ كلام، ويزوّد كلام من عنده على الحقيقة علشان بسّ يخليّ الناس
تسمعه وتحسّ بوجوده، وفي الحالة دي لازم تتعالج المشكلة من جذورها، ونساعد
الطفل إنه يكون عنده ثقة أكثر بنفسه.

السبب الثالث وهو ده المشهور، وغالبًا هو ده حالة حمزة، وهو الكذب
للخروج من المشاكل، وطبعًا ساعتها لازم يحسّ زيّ ما قلت لك إنّ الكذب عندك
أخطر من المشكلة نفسها اللي عملها وتدّيله فرصة إنّه لو قال الحقيقة هيكون
مفيش عقاب، وتدّيله دايماً الأمان إنّه يقول الحقيقة علشان عارف إنّك هتقدري
صدقه.

مثلاً موضوع الغشّ في الامتحان، اسأليه ”إنت بتغشّ ليه؟ علشان تبيّن لأصحابك إنك ذكي؟ ولا علشان إحنا نفرح بيك؟« وعرفيه إنّ مفيش فايده من الغشّ، والناس لو قالت عليه شاطر مش هيفيدوه لو ربّنا مش راضي عنه، وبيعمل حاجة تغضب ربّنا. لو اعترفلك بحاجة عملها حتى لو كان عامل مصيبة، أمدحي صدقه وشجّعيه .

- صحّ عندك حقّ يا دكتور.

بلاش تربطوا كلمة إن شاء
الله في ذهن أطفالكوا بإن
كده طلبهم مرفوض

- من الحاجات المهمّة في القدوة برضه إنك لما تقولي على كلمة يبقى تقصديها، وإنّ كلمتك واحدة. مش توعديه بحاجة ومتنفذيهاش بعد كده، لو عارفة إنك مش هتعرفي تنفّذي وعدك يبقى بلاش توعدي من الأوّل، ولو وعدتِ وانتِ في نيّتك إنك توفّي بسّ

حصلت ظروف، لازم تفهّميه الظروف الّي منعتك من تنفيذ وعدك، وميقاش كلّ مرّة طبّعاً.. يعني فيه أطفال لما يطلبوا حاجة من أهلهم ويقولولهم «إنّ شاء الله» يعرفوا خلاص إنّها مش هتتعمل..

- أيوه صحّ، أعرف ناس كده كتير.

- آخر حاجة بقى أقولها لك إنك مُمكن تعرّفي طفلك قيمة وأهميه الصدق وخطورة الكذب عن طريق القصص، زيّ قصة

الرّاعي الّبي كان بيحرس الغنم، وكلّ شوية ينادي على الناس ويقول لهم
الديب هجم على الغنم.. الحقوني، ولما يبجوا يقول لهم إنّّه كان بيضحك
عليهم، وفي يوم هجم الديب فعلاً على الغنم وناداهم تاني علشان ينقذوه،
بسّ خلاص محدّش بقى بيصدّقه ومحدّش راحله ينقذه.... وهتلاقي قصص
زيّ دي كثير مُمكن تدوّري عليها وتشوفي حاجات في مستوى سنّ حمزة،
وقصص وروايات لسنّه عن الكذب هو يقرأها بنفسه.

الخلاصة

حمزة كان عنده داء الكذب، وهالة وطارق كانوا فاكرين إنّهم
كده بيعالجوه لمّا يسمّوه كذاب على طول، ويبينوا له إنّهم مش
مصدّقينه في حاجة، ويفكّروه دايماً بكذباته القديمة، لكنّ همّا
للأسف زودوا عنده الكذب بالطريقة دي، خصوصاً كمان إنّهم
بيكذبوا ويحوروا قدامه.



الواجب العملي

الواجب العملي المرّة دي يخصّ بسّ الأمّ والأب، خطأين خطيرين،
كلّ يوم بالليل هتحاسب نفسك إذا كنت وقعت في الخطأ ده
واللأ لأ...

اليوم	كذبة بيضا بسيطة أو تحوير	عدم وفاء بوعد وعدته لطفلك
السبت		
الأحد		
الاثنين		
الثلاثاء		
الأربعاء		
الخميس		
الجمعة		



ما تمسكش لعبتي تاني

الكريم

كريم وسارة قاعدين بياكلوا على السفرة، ومروة مامتهم قاعدة
معاهم، كريم أكل وشبع خلاص، فقال لمامته:
- أنا شبعت خلاص.

- طيب خلّص باقي الفرخة بتاعتك، دي حته صغيرة.

- لا أنا شبعت ومش عايز.

- طيب روح اغسل إيدك، وانت يا سارة خدي الحته دي كليها
انت.

وحطّلتها حته الفرخة بتاعة كريم في طبقها، راح كريم رجع جري، وخطفها
من طبق سارة، وقال لمامته:

- لا.. لا.. دي بتاعتي، أنا هاكلها، أنا عايزها!!

وأخذها فعلاً كريم وأكلها رغم إنه شبعان، وقاموا كلهم وغسلوا
إيديهم، مروة وقفت تغسل المواعين، وكريم وسارة دخلوا جوّه الأوضة،
بيبصوا تحت المكتب لقوا شيكولاتة kisses واحدة واقعة على الأرض،
كريم نزل بسرعة وأخذها وفتحها وأكلها كمان وهو تحت المكتب من

قبل ما يطلع حتى. طبعًا سارة فاكراه هينزل ويطلعها بحاجة، فأول ما شافته معاه ورقة الشيكولاتة فتحت في عياط هستيري، مروة جت بسرعة وسألت سارة:

- ما لك يا ساره؟ فيه إيه؟

- كريم لقي شيكولاتة واحدة، وأكلها ومدّانيش حاجة!!

- ليه يا كريم؟ هي الشيكولاتة دي بتاعة مين؟

- معرفش!!

- طيب مادّتش حتة لأختك ليه؟

- أنا اللي لقيتها الأول، تبقى بتاعتي.

ومشي كريم وسابهم، ومعدوش أيّ إحساس بالذنب إنه أخذ

حاجة ومدّاش لأخته...

جرس الباب رنّ، كريم جري على الباب علشان يفتحه.

- هيببييه تيته..... إنت جايه إيه يا تيته؟ إيه اللي في الكيس ده؟ حلويات..

هيببييه.

مروة أول ما سمعت كلمة حلويات جت بسرعة، ومن قبل ما تسلّم على

مامتها راحت لكريم وأخذت منه كيس الحلويات وقالت له:

- مفيش حلويات النهارده، إنت لسه واكل شيكولاتة من شوية، هعينهم

وكلّ أسبوع هديلك حاجة منهم!

- أنا عايز أشوف طيبّ إيه هي الحلويات؟ طيب آكل حاجة واحدة بسّ صغيرة!
- قلت لا خلاص، وادخل يلاً جوّه.
- يووووه إيه الظلم ده!!
- إزيك يا ماما.
- إزيك يا مروة، إيه اللي انتِ عامله في الولد ده؟ متسيبيه يفرح بالحلويات!!
- إدّيله حاجة واحدة طيبّ.
- يا ماما، أنا خايفة على أسنانه، وهو عارف كده.
- إنتِ كده مش بتحافظي على أسنانه، إنتِ كده بتحرميه.
- لا يا ماما أنا قرّيت إنّ الحلويات مُمكن تتاكل بسّ كلّ أسبوع مرّة بالكثير، مش كلّ يوم.
- خلاص إنتِ حرّة! أختك هتعددي عليكِ أحمد ابنها بعد شوية يلعب مع كريم علشان عندها مشوار، وأنا هأخذه معايا وأنا مروّحه.
- ماشي، ينور.
- الجرس رنّ، وجه أحمد فرحان، وسلّم على مروة وعلى تيته، وسألهم:
- فين كريم؟
- كريم جوّه في الأوضة، روح إلعب معاه.
- دخل أحمد يلعب مع كريم ومفيش خمس دقائق وسمعوا عياط وخناق، وأحمد جاي يشتكي ويقول:

- كريم مش عايزني أمسك أي حاجة في الأوضة، كل ما أمسك حاجة ياخذها مني، ويقول لي دي بتاعتي، إنت هتبوظها!!
- طيب أنا هدخله.

ودخلت مروة لكريم وسألته:

- فيه إيه يا كريم!! مبتلاعش أحمد معاك ليه في اللعب؟ وبعدين فين القطر الجديد اللي لسه جيباهولك؟ وزيه يلا لأحمد ولتيتة...

- لا بلاش القطر بليبيبيز، هيووووظ!!!

- عيب كده، يلاهات القطر دلوقت، ووزيه لهم.

- خلاص يلعب بباقي اللعب ما عدا القطر الجديد!!

- عيب كده قلت، هات اللعبة الجديدة بتاعتك يلا!!

وفعلًا، طلع القطر الجديد بتاعه بالغضب ولعبوا بيه. وشوية وأحمد بيلعب بيه وقع منه على الأرض وانكسرت حته منه. كريم زعل جدًّا، وحسَّ بالقهر على لعبته الجديدة اللي مبقالهاش أيام، وزعق في أحمد وقال له:

- أنا قلت إنك هتكسرها!! أنا عمري ما هخلي حد يلعب بلعبي تاني، اطلع بره الأوضة!!!

مروة سمعت الزعيق ده دخلت زعقت لكريم وضربته وعملته **time out** كمان علشان زعلان على لعبته اللي انكسرت....

خلص اليوم وتيتة وأحمد مشيوا، وجه أشرف زوج مروة من

الشغل، دخل فرحان ونادى على مروة، وقال لها:

- شفتِ يا مروه الهدية دي! إيه رأيك فيها؟ دي مجموعة كتب حلوة أصحابي جابوها لي في الشغل بمناسبة الترقية الجديدة.

- وزيّني كده! آه حلوين، بسّ في ثلاث كتب عندنا منهم، كده هيبقوا متكرّرين!!

- مش مشكلة، مُمكن أدّيهم لمحمد أخويا، هيجبّهم.

- لا.. لا، ليه نديهم لحد؟! إحنا أحسن نرجّعهم المكتبة، ونجيب مكانهم كتب تانية مش عندنا.

جَه وقت النوم، كريم وسارة ناموا، وقعدت مروة تحكي لأشرف على اللي عمله كريم النهارده، وقالت له:

- إحنا المفروض مكناش نسمّيه كريم، إحنا المفروض كنا سَمِيناه بخيل أحسن!!

- طيّب متفكرّي في أفكار تخليه يتعلّم الكرم شوية.

- أه ماانا بفكر، أنا كنت قريت على النت إنّ لو خَلّيت الطفل يتبرّع بحاجته الليّ مش عايزها هيتعلّم العطاء. أنا بكره إن شاء الله هاخده ونطلّع اللبس الليّ مش عايزينه وتبرّع بيه للفقراء.

جَه الصّبح، مروة نادت على كريم:

- تعالي يا كريم، عايزاك تساعدني نختار اللبس الليّ انتَ مش عايزه وتبرّع بيه للفقراء.

- حاضر.

بدأوا يجمعوا اللبس، كريم قال لها:

- إيه رأيك نوّدي ده يا ماما؟ أنا مبحبّوش ومش عايزه!

- لا.. لا، ده لبس حلو ويمكن تلبسه، هات البنطلون ده.

- بسّ ده مقطوع!!

- مش مشكلة دي حتة صغيرة وهما هيصلّحوه، هات كمان التيشيرت ده.

- ده!!؟

- لا مش ده، التيشيرت اللي باهت عليه لون أحمر ده.

- طيّب خدي الجزمة دي، دي صغرت عليّا.

- لا.. لا.. خليها دي لسّه شكلها جديد، هات الجزمة المقطوع منها حتّة في

الوش دي!

وخلّصوا جمع التبرعات بتاعتهم، أو بمعنى أصحّ لمّوا الزبالة اللي

المفروض يرموها.

بعد ما خلّصوا، سارة جتّ تاخذ العربية بتاعة كريم، راح كريم

قال لها:

- متاخذيش العربية، خدي القطر المكسور العبي بيه!

فضلوا على الحال ده، كلّ يوم كريم بيبقى أقلّ كرم من اليوم اللي

قبله لدرجة إنّه ساعات بيحرج مروة قدام الناس، ويحسّس الناس إنه

محروم، وإنه مش مستعدّ يديّ لحدّ أيّ حاجة.

مروة قعدت مع أشرف وسألته:

- هنعمل إيه مع كريم؟ ده كلّ يوم بيزيد بخله أكثر وأكثر... أمال هيعمل إيه لما يكبر؟!

- مش عارف! أنا حاسس إنّ فيه حاجة غلط بنعملها في تربيته بتخليه كده، أظنّ إنّ الأحسن إننا ناخذ رأي حدّ متخصص.

- طيّب إيه رأيك نروح للدكتور أسامة؟ بيقلوا عليه شاطر جدّا في التربية.

- ماشي، خدي معاد ونروح له إن شاء الله.

في عيادة الدكتور..

حكى أشرف ومروة على كلّ اللي بيعمله كريم، والصفات اللي خايفين منها كلّها، الدكتور قال لهم:

- متقلقوش، صفة الكرم والبخل دي غالبًا في معظم الناس بتبقى صفة مكتسبة،

يعني ممكن لو حاسين إنّ صفة الكرم عنده ناقصة، بشوية مجهود ممكن تنمّوا عنده الصفة دي، خصوصًا إنه لسه طفل صغير، وسهل التشكيل.

- طيّب أزاى يا دكتور؟!

- من أبسط الحاجات وأهمّ الحاجات اللي ممكن تعملوها علشان تنمّوا

عنده صفة الكرم والعطاء إنكوا تخلّوه مش محتاج لحاجة، يعني ممكن بمعنى

آخر ميقاش محروم.

- أَرَايَ يا دكتور؟! ده إحنا مش مخلصينه نفسه في حاجة، وبعدين يا دكتور أنا كنت مرّة قريت من على النت إن مينفعش ندي الطفل كل اللي يطلبه، وإلا كده هيبقى متدلّع ومش مسئول... صحّ ولا أنا غلطانة؟

- أيوه صحّ، مش لازم الطفل لما يتمنى أي حاجة مهمّا كانت تلبّوا طلبه على طول من غير تفكير، وبرضه في نفس الوقت ميبقاش نفسه في حاجة فعلاً متجيبوهاش اعتقاداً منكوا إنه كده هيبقى متريّ وقوي. الوسطيّة هي أحسن حاجة. بالمناسبة، مُمكن تفهموه الفرق بين إنه عايز حاجة **want** ومحتاج حاجة **need** . عايز حاجة زيّ مثلاً عايز لعبة علشان عجبته، ومُمكن يكون عنده منها أو لأ.. بسّ هي مش مهمّة دلوقتٍ، ودي مُمكن تتأجلّ ومتجيبوهاش على طول، ممكن تقولوا له إن دي هنجبهالك هدية، أو ممكن تخلّوه يحوّش من مصروفه ويجيبها. لكن محتاج حاجة دي بتكون الحاجات الصّورية اللي مينفعش يستغنى عنها، زيّ اللبس والأكل وهكذا... وفيه فيديوهات كثير على اليوتيوب لتعليم الأطفال الفرق بين الـ **wants** والـ **needs** مُمكن تفرّجوه عليها لو تحبّوا...

نرجع بقى لموضوعنا، كُنّا بنتكلّم على إنكوا تلبّوا رغباته حتى لو بعض الحاجات اللي عايزها مش ضرورية دلوقتٍ. زيّ مثلاً لو طلب منكوا لعبة، وانتوا قلتوا له حوّش من مصروفك علشان تجيبها، وهو أصلاً المصروف على القدّ، أَرَايَ هتطلبوا منه يديّ فلوس للمحتاج من

فلوسه اللي بيحوّشها علشان يجيب بيها اللعبة؟ ماهو هيخاف عليها تخلص وهو لما صدّق يجمّع شوية..... أو مثلاً الحلويات، لو هو محروم من الحلويات تمامًا ومبيشوفهاش خالص، إزاي هتطلبني منه إنّه لو معاه شيكولاتة يقسمها مع حدّ؟! وهو لما صدّق شافها....

- مانا قريت على النتّ إنّ الحلويات خطر عليه وعلى أسنانه.

- يا دي النتّ اللي هيوّدينا في داهية ده يا مروة.

- أكيد يا أستاذ أشرف الحلويات الكثير خطر على الأطفال، بسّ زيّ ما قلت

التوسّط في كلّ حاجة هو الأحسن. متمنعوهاش على الآخر لدرجة إنّه يبقى

محروم منها، ولا في نفس الوقت يفطر ويتغذى ويتعشى حلويات لحدّ ما أسنانه

تسوّس... فهمتوا قصدي؟!!

- أه يا دكتور.

علشان تطلب من إنسان
إنه يعطي لازم يكون في
الأول مش محتاج إلی
يعطيه

- الحاجة الثانية المهمة طبعا في التربية هي

القدوة، الطفل يقلّد ويتعلّم من والديه، لو لقاكوا

بتحبّوا تدّوا هدايا للأقارب والأصدقاء هيتعلّم يدي

هدايا ويحبّ يهادي، لو لقاكوا بتفضلوا نفسكوا وتحبّوا

تاخذوا كلّ حاجة لنفسكوا وتستخسروا تدّوا للغير هيعمل زيّكوا أكيد. تصدقوا قدّامه

للمحتاجين وإديه فلوس في إيده يتصدّق بيها هو، اطبخي حاجة مثلاً في يوم وابعتيه

بيها للجيران كهدية، اجمعي اللبس والألعاب اللي مش محتاجينها وإديها للمحتاج...

واختاري فدّامه الحاجات الكويسة اللي ممكن تُستخدم مش تنقي الحاجات اللي خلاص بايظة أو مقطوعة وهي دي اللي تتصدّقي بيها وتستخسري الحاجات الكويسة حتى لو انتوا مش محتاجينها... اعملوا صندوق طعام في البيت، كل شوبنج تجيبوا حاجة زيادة وتحطّوها فيها، وآخر الشهر تدّوا الحاجات دي لأي محتاج... وهكذا، فيه أفكار كثير حاولوا تفكّروا فيها وتعملوها معاه، وتعلّموه بيها العطاء من غير مقابل.

- طيّب بالنسبة للـ **sharing** يا دكتور! هو مبرضاش يخلي حدّ يلمس لعبة ولا يقربلها، حتى كنت جايباله قطر جديد، وكنت فاكره هيبقى عايز يورّيه لأصحابه ويفرح بيه لقيته خايف حدّ يشوفه، موراهوش لحدّ غير لما ضغطت عليه!
- إنتِ لو لسّه جايبه مثلاً عربية جديدة، هتبقي عايزه تديها لأصحابك يجربوها شوية ويلفّوا بيها لفّة، والأ هتبقي خايفة عليها؟!!

- أكيد مش هديها لحدّ...

- طيّب هو كمان نفس الكلام، عنده حاجة جديدة وخايف عليها إن حدّ يبوظها، لازم ساعتها تحترمي رغبتك في كده.. لازم تحترمي خصوصية الطفل في إنّه يخبي الحاجات اللي بيحبّها وخايف عليها.
- يعني لما يجيلنا ضيوف أقولهم متلعبوش بالحاجات الجديدة وناخذها نخبيها؟

- لا من قبل ما يبجي الضيوف بتتفقي مع ابنك، وتسألينه إيه هي الحاجات اللي خايف عليها ومش عايز حدّ يمسكها؟ وخبّوها في مكان آمن، واتفقي معاها إن باقي الألعاب دي المفروض يخلي أصحابه يشاركوه فيها عادي... بكده هيحافظ على حاجاته الغالية عليه، ومش هيبقى خايف وهما موجودين.

- طيب ده بالنسبة للضيوف، لكن أخته بقى ميخليهاش تمسك حاجته، ولو فيه مثلاً شيكولاتة واحدة ياخدها هو وميديهاش أي حاجة!

- بدل ما تديله محاضرة في الكرم والعطاء أو توصفيه بالبخل والأنانية أو ترغقيه، أسأليه هو متوقّع يكون إحساس أخته إيه دلوقتٍ وقولي له: «تفتكر أختك دلوقتٍ حاسّة بيايه لما إنت أكلت الشيكولاتة كلّها ومدتهاش ولا حته؟! تفتكر لو إنت مكانها هتحسّ بيايه؟ هتعمل إيه لو مكانها؟» خليه هو اللي يتخيّل نتيجة فعله من غير تدخل منك، الأسئلة دي بتزود عنده الإحساس بمشاعر الآخرين، وبتخليه يتخيّل خطورة اللي بيعمله، ويحاول يصلح غلطه، أو ميعملوش تاني من باب إحساسه بالآخرين مش من باب الخوف من العقاب.

وفي الآخر لازم يفهم أهميّة الكرم وثواب الكرم عند ربنا، وممكن تعملوا كده عن طريق القصص اللي بتحكي على الكرم والبخل.

الخلاصة

قصة كريم بيّنت إنّ إحساس الطفل بالحرمان لما كانت مامته حارماه من الحلويات، والخوف من ضياع الأشياء اللّي يحبّها لما مامته أجبرته إنّهُ يطلع القطر الجديد بتاعه لأحمد، مع عدم وجود القدوة الحسنة ليتعلّم منها ازاي يبقى كريم هي اللّي خلّت كريم مش كريم.



الواجب العملي

* دي شوية أسئلة تسألها لنفسك إذا كنت بتعملها مع طفلك واللا لآ؟

- هل طفلك فيه حاجة نفسه فيها جدًا، وحاسس إنه محروم منها؟ وإيه هي؟

- هل لما بتجمعي حاجات تتبرّعي بيها بتختاري أوحش حاجة وأقدم حاجة؟

- هل لما ببيجي لك أطفال تانيين يلعبوا مع طفلك بتسمحي لطفلك يخبّي اللعب اللي بيحبها وخايف عليها؟

- هل إنت حاسّة إن طفلك بيحسّ بمشاعر اللي قدامه، ولا مش فارق معاه؟ ولو مش فارق معاه بتعملي إيه علشان تخليه يحسّ باللي قدامه؟

- أنهي جُملة أحسن؟

* إنت أخذت كلّ البونبوني ومسبتش حاجة لأختك! إنت أناني!

* مينفعش إنك تأخذ كلّ البونبوني، تفتكر أختك كده حاسّة بإيه؟

الطريقة دي هي اللي هتخليّ جودي متغلطش أبداً، وتبقى برفكت في كل حاجة،

فطلع لها الصالة وأخذ التابلت من إيديها وقفله، وقال لها:

- إنتِ سمعتِ ماما بتقول إيه؟ أوّل ما تسمعيها تروحي على طول، وتقفلي

الزّفت ده، هي ماما مش هتستنى لحدّ ما تخلّصي اللي بتعمليه... بعد كده أوّل ما

أسمعها بتناديكِ ألاقكِ قايمة جري على طول... فهمتِ؟!

- حاضر. (بتقولها وهي خايفة طبعًا).

راحت لمامتها وشافتها عايزه إيه وجهّزوا السفره، وجه وقت الأكل، مامتها

بتسألها:

- أغرفلكِ شوية رز؟

- ماشي.

جودي مبتحبّش الرز، بسّ أخذته علشان متزعّلس مامتها وعلشان

خايفة تقول لها لأ، فضل الرز بتاعها زيّ ما هو ومقرّبتهلوش،

مامتها قالت لها:

- مبتاكليش رزّ ليه يا جودي؟

جودي بصّت لمامتها ومردّتش.

- لما انتِ مش عايزة الرزّ قلتيلي أغرفلكِ ليه؟

باباها كمّل:

- بعد كده لو حاجة مش عايزاها تقولي مش عايزاها، حرام نحتّ الأكل في

الطبق ونرميه.

مامتها قالت لها:

- خلاص أدام مش هتاكلي الرزّ كلي حتّة اللحمه دي كمان!

- لا مش عايزه، شبعت!

- يعني إيه لأ؟! إنتِ مأكلتيش الرز، هتتغدي إيه؟! وبعدين مينفعش البنت

الشاطرة تقول لمامتها لأ وتكسفها.

أخذت جودي اللحمه وحطّتها جنب الطبق، باباها قال لها:

- أدام أخذتِ حاجة وحطيتها في الطبق يبقى تاكليها، يا إمّا مكنتيش تاخديها

من الأول، إحنا لسّه قايلين إيه؟ حرام نحطّ أكل ونرميه.

أخذتها جودي وهي شبعانة، وحاولت تاكلها علشان خاطر

مامتها وباباها، بسّ مش قادرة، وفجأة قامت جريت على الحمام

ورجّعت.

- شفتِ أديكِ بترجّعي علشان قاعدة تاكلي من أول الأكل من غير نفس لحدّ

ما سدّيتِ لنا نفسنا كلّنا... إنتِ بقيتِ صعبة قوي يا جودي.

جودي طول الوقت ساكنة، وبتبصّ لهم بس.

تاني يوم، راحت جودي المدرسة، جودي شاطرة في المدرسة، وهادية، وبتسمع

كلام الميس أكثر واحدة في الفصل، الميس بتحبّها علشان مبتعملش مشاكل أبداً.

في وقت الفسحة، جت سلمى صاحبها في الفصل، وقالت لها:

- تيجي تلعبى معنا سباق؟

- ماشي.

مع إنَّ جودي من أسبوع كانت بتجري ووقعت على رجلها وأتلوت، والدكتور قال لها تريِّح فترة ومتعلمش مجهود برجلها، راحت جودي جريت مع أصحابها مع إنَّها مش قادرة، وهي في نصَّ المسافة رجلها أتلوت تاني ووقعت على الأرض.. وفيه شويّة أولاد ضحكوا عليها كمان أمّا وقعت.. زعلت جدًّا جودي من الموقف ده (زعلت لإنَّها معملتش اللي الدكتور قال عليه، وكده الدكتور ومامتها هيزعلوا، وكمان زعلت إنَّ الولاد بيضحكوا عليها، وكمان زعلت إنَّها معرفتش تعتذر لأصحابها ومتلعبش معاهم، ده غير إنَّها رجلها واجعاها جدًّا).

راحت للدكتورة بتاعة المدرسة، والدكتورة كلّمت مامتها وطلبت منها تيجي تاخدها وتودّيها عند دكتور عظام يعمل لها أشعة. راحتها مامتها بسرعة وأخذتها للدكتور، وهي في الطريق للدكتور مع جودي، قالت لها:

- مش أنا قلت لك متجريش لحدّ ما رجلك تخفّ؟ إنَّتِ مش فاهمة إنَّها أتلوت قبل كده؟

سكتت جودي كالعادة.

- متردّي عليّا، مش أنا بكلمك؟!

- أصل سلمى صاحبتني جتّ قالت لي ألعب معاها سباق.

- وإيه يعني!! متقولي لها لأ علشان رجلي واجعاني!

- ماهي كده مُممكن تزعل منّي، ومتلعبش معايا تاني!

- نعم!! تقومي تكسري رجلك علشان خاطرها؟
- سكنت جودي وراحو عند الدكتور، والدكتور جبّس لها رجلها... وبالليل جودي راحت قالت لمامتها:
- ماما، أنا مش عايزة أروح المدرسة بكرة!
- ليه؟
- مبحبّهاش.
- يعني إيه مبحبّهاش؟ مفيش حاجة اسمها كده! لازم تحبّي المدرسة.. إيه اللي حصل النهارده؟
- فيه ولاد أتريقوا عليّا!
- باباها ردّ عليها وقال لها:
- وهو لو ولاد أتريقوا عليكِ يبقي متروحيش؟ إيه شغل العيال ده!!
- طيّب أغيب بكرة بس!!
- لا مش هينفع.
- ليه؟
- هو إيه اللي ليه؟ إنتِ هتتناقشي معايا؟ مفيش بنت شاطرة بتقعد تتجادل مع باباها كده، قلت لأ يبقي خلاص مفيش غياب!
- دخلت جودي أوضتها وقعدت تعييط، دخلت لها مامتها وقالت لها:
- إنتِ بتعيطي ليه دلوقتِ؟
- مردّتش جودي وكملت عياط..

- خلاص اسكتي ومش عايزة عياط، مينفعش حدّ يشوفك بتعيّطي، إنتِ بيبي
 علشان تعيّطي؟ قومي يلا اغسلي وشك وبطلي عياط!
 كتمت جودي عياطها وراحت غسلت وشها، وراحت تاني يوم المدرسة وهي
 خايفة حدّ يتريق عليها علشان الجبس.

وعدتّ الأيام، وكلّ يوم جودي بتسكت أكثر وأكثر، وتسمع كلام الميس
 وأصحابها إذا كان الكلام صحّ أو غلط، ومتتكلّمش مع مامتها وباباها أكثر وأكثر،
 ومبتعرفش ترفض أيّ طلب يُطلب منها حتى لو مش عايزاه، وفضلت كاتمة
 مشاعرها جواها ومبتقولهاش لحدّ أبدًا.. ومع الوقت بدأ يظهر عليها الحزن
 والكآبة، وبقت نادرًا ما بتضحك.

مامتها وباباها لاحظوا كده، وحاولوا يخرجوها ويفسّحوها، بسّ
 مفيش فايده، مبتحكيش أيّ حاجة ولا بتقول رأيها في أيّ حاجة
 وأي طلب يطلبوه منها تنفّذه وهي ساكنة.

مامتها وبابها خافوا عليها، وحسّوا إنّ في حاجة غلط، قالوا لبعض:

- هي جودي ما لها؟!!

- أنا خايفة ليكون عندها اكتئاب.

- اكتئاب إيه بسّ في السنّ ده؟ دي لسّه سبع سنين!

- أمّال تفسّر بيايه إنها بقت سرحانة وزعلانة على طول؟ أنا مبتقتش بشوفها

بتضحك.

- معرفش، شوفي إيه اللي مزعلها.
- ماهي مبتحكيليش أي حاجة ولا بتتكلم، أنا بدأت أنسى صوتها.. أنا عايزة أودّيها لدكتور يشوفها!
- طيب أديك رايحة لدكتورالعظام بتاعها، اسألها!
- عظام إيه؟! أنا عايزة دكتور يفهم في نفسية الأطفال.
- ودورّت على دكتور متخصص في سلوك الأطفال، ولقت الدكتور أسامة، وحجرت معاه معاد.
- في عيادة الدكتور...
- حكّت كلّ الأعراض اللي عند جودي، وكلّ اللي بتعمله، وسألته:
- تفتكر يا دكتور هي كده عندها اكتئاب ولا إيه؟
- مش شرط الأعراض دي تكون أعراض اكتئاب، ممكن تكون حاسة إنّ محدّش بيسمعها، ولا ليها رأي مهمّ في حاجة؛ فضّلت السكوت أكثر.
- ازاي يا دكتور؟ ده أنا بتحايل عليها تتكلم!
- ولما بتتكلم بتسمعها؟
- آه طبعاً، بسمعها على طول!
- آباء وأمّهات كثير بيعتقدوا إنهم بيسمعوا أولادهم كويس، لكن في الحقيقة همّا بيكونوا السبب في إنّ أولادهم ميتكلموش.
- إزاي؟

- يعني لما بتيجي تكلمك أو توريك حاجة وانتِ ماسكة الموبايل أو بتتفرجى على التلفزيون وتقوليلها كملي أنا سامعاك، يبقى كده مبتسمعيهاش... لما تكلمك وانتِ باصة الناحية الثانية وتقوليلها أنا معاك، يبقى

لما بتسمع طفلك بودانك

بس من غير قلبك يبقى

كده مبتسمعهوش

كده مبتسمعيهاش... لما تسمعيها للآخر وانتِ محضرة الرد اللي هترديه عليها من قبل ما تكمل كل اللي جواها، يبقى كده مبتسمعيهاش... لما بتقاطعيها وهي بتتكلم علشان تديها نصايح من غير ما تخلص كلامها يبقى كده مبتسمعيهاش.- طيب أعمل إيه يا

دكتور؟

- أوّل حاجة لازم تاخدي بالك منها هي إنّ الطفل ده بني آدم برضه، عنده مشاعر، وعنده رأي زيّنا بالطّبط، لازم تحترمي مشاعره، وتسيبيه يعبر عن رأيه حتى لو كان غلط... لما الطفل بيكون ليه رأي وصوت مسموع في البيت (مش لازم يتنفذ، بس المهمّ يتسمع ويتقدّر) ده بيديله إحساس إنّه له قيمة، وساعتها كمان هيعبر عن رأيه براحتة برّه البيت، لكن لو كان في البيت على طول بتسكتيه ومبتديش أهمية لرأيه هيخاف يقول رأيه برّه البيت علشان عارف إنّ رأيه مش مهمّ، ومش هيضيف جديد.

ونفس الكلام في المشاعر وده كمان الأهمّ، المفروض تسيبي الطفل

يعبر عن مشاعره براحته ومتحريش عليها.. يعني مثلاً بنتك لما بتيجي تقول لك «أنا مش عايزه أروح المدرسة، أو أنا مبحبش المدرسة»، تسألها هي ليه بتقول كده، وتسمعيها بقلبك للآخر من غير ما تكوني مجهزة لها رد، وقاعدة تفكري ازاي تقنعيها بأهمية المدرسة، هي أكيد عندها سبب أو موقف حصل لها، وخلي عندها شعور بعدم حب المدرسة، وفي الوقت ده مش بتكون محتاجة نصيحة أو إرشاد، هي في الوقت ده بتبقى محتاجة حد يسمعها ويقدر مشاعرها وكمان يتعاطف معاها و ده اسمه **active listening** وبعد ما تعملي كل ده، وجه وقت الحل تقعدوا إنتوا الاتنين وتفكروا في حل مع بعض يرضيكوا إنتوا الاتنين.

وطبعاً أخطر حاجة إنك بعد ما تسمعيها وتعرفي إيه المشاعر اللي جواها، تسفهي وتقللي من قيمة المشاعر دي، يعني لو هي زعلانة مثلاً علشان القلم بتاعها اللي بتحبّه ضاع، متجيش تقولي لها «ده حتة قلم هجيبلك غيره» هي مش عايزه غيره، هي عايزك بس تقولي لها «معلش أنا عارفه إنك بتحبيه».

أهم حاجة إنك تسيبها تعبر عن مشاعرها براحتها وتعرفيها إننا عادي تحس بمشاعر سلبية.. مش غلط إننا تعيط، مش غلط إننا تزعل، مش غلط إننا تحس في لحظة إننا مبحبش حد معين، المهم بس تعلميها ازاي تتخلص من مشاعرها السلبية دي بطريقة صحيحة من غير ما تؤذي حد.

- فهمت يا دكتور، طيّب بالنسبة للتعبير عن الرأي، أخلّيها عادي تقول رأيها وأنا مش موافقة عليه؟

- أه طبعًا، هي لازم تقول رأيها بحرية، وبلاش الكلام زيّ «أنا قلت لأ يبقى خلاص مفيش نقاش»، أو «مينفحش تجادلي مع بابا».

- طيّب كده لما أسيبها تقول رأيها براحتها، أسيبها بقى تعمل كلّ اللي هي عايزاه حتى لو كان غلط؟

- لا طبعًا، كلّ شيء وله حدود. المفروض الطفل يعبر عن رأيه بس يكون بأدب، ويلتزم بالقواعد المسموح بيها. يعني مثلاً إنتوا عندكوا قاعدة في البيت وهي إنّ المفروض لما ترجع من المدرسة تحلّ الواجب على طول قبل اللعب، علشان إنت عارفة إنّها لو لعبت مش هتركز باقي اليوم ومش هتحلّ الواجب، لو هي اعترضت على القاعدة دي اللي حطّاها، اسمعها الأوّل وبعدين فهميها ليه إنت حاطة القاعدة دي بهدوء، وعرفيها إنّها لازم هتتنفّذ، وممكن لو عايزه تخليها تجرّب يوم الرأي بتاعها علشان تثبتيلها إنّ القاعدة اللي حطّتها هي الأنسب براحتك، بس إنت مش ملزمه بكده.

لازم برضه تتعلّم إنّها تقول رأيها بأدب وبدوق، وفي الوقت المناسب، وإنّك لو قلت لها إنّ ده مش الوقت المناسب لإبداء رأيها فالمفروض إنّها تسكت لحدّ ما ييجي الوقت اللي تطلبلي فيه رأيها، وساعتها تسمعها كويس بقلبك قبل ودنك.

لازم تعرّفها برضه إن رأيها مهمّ، بسّ مش هو أهمّ رأي في البيت، لو اعتبرتيه
إنه أهمّ رأي، وإنه لازم يتنفّذ يبقى إنتِ كده بتدلّعيها مش بتحلّي مشكلتها،
وبتنمّي عندها صفات أسوأ زيّ الأناية.

- طيّب مفيش أفكار كده أعملها تخلينا نتعود أنا وهي على إنها تتكلم وإني
أسمعها؟

- أه فيه أفكار حلوة ومسلية مُمكّن تمارس فيها إبداء رأيها، زيّ مثلاً إنكوا
تقعّدوا مع بعض كأسرة وتفتحو موضوع معين وكلّ فرد من الأسرة مطلوب منه
يقول رأيه في الموضوع ده، والباقي يسمعه كويس ويهتّم برأيه.

وفيه فكرة كمان إنكوا تعملوا كراسة للعائلة **family journal** أو
حتى ليك إنتِ وهي بسّ، وكلّ واحد منكوا لو حصل له موقف
معين أثر فيه أو عنده مشاعر معينة عايز يعبّر عنها أو عايز
يقول حاجة لحدّ يكتبها في الكراسة دي، وأي حدّ منكوا مُمكّن
يقرأها عادي.

برضه مُمكّن كلّ فترة تسألها أسئلة عادية تقول فيها رأيها، زيّ مثلاً... إيه رأيك
أعمل مع الأكل رزّ ولا مكرونة؟ تفتكري الدنيا هتمطر النهارده ولا لأ؟ وهكذا... وفيه
أفكار كتير غير كده مُمكّن تألّفها.

- طيّب فيه مشكلة كمان، جودي مبتقدرش تقول لأ لصاحباتها
حتى لو جت على نفسها علشان خايفة إنهم يزعّلوا منها وتخسرهم.

أعمل لها إيه؟

- فيه أطفال كتير بتخاف تعارض الأعراب علشان زيّ ما قلتِ متخسرهمش، أو علشان حتى بتخاف تخرجهم، في الحالة دي مُمكن تعلّمها كلمات تستبدل بيها كلمة «لأ» زيّ «إيه رأيك مثلاً في كذا أحسن؟» أو «معلش مش هقدر أعمل كذا دلوقتِ، مُمكن مرّة تانية» وهكذا. وعرفّ فيها إنَّ اختلاف الرأي بينها وبين أيّ حدّ ده حاجة طبيعية مش دليل على العداوة، ومش لازم علشان تحبّك يكون عندها نفس رأيك.

- صحّ يا دكتور، اختلاف الرأي لا يفسد للود قضية.

- من الحاجات المهمة برضه إنك تديها مساحة تغلط وتصلّح غلطها، مش لازم تعلقوا على أيّ تصرف كبير أو صغير، وحتّي نفسك مكانها، إنتِ مثلاً عملتِ حاجة غلط غصب عنك أو عملتِ الحاجة الغلط وأدركتِ بعدها إنها غلط، ولسّه هتحاولي تصلّحي غلطك لقيتِ حدّ مراقبك وبيلومك على أيّ تصرّف بتعمليه، هتحتسي بإيه؟

- هحسّ إني خايفة أعمل حاجة ثاني قدام حدّ.

- بالطّبط، هي كمان نفس الكلام، مش معنى كده إنك تسيبها تغلط براحتها ومتوجّهيهاش، بسّ قصدي إنك تديها مساحة من الحرية في إنّها تصلّح غلطها بالذات في الأخطاء البسيطة ومتتوقّعيش منها إنّها تكون برفكت طول الوقت، وملاك مبيغلطش أبداً.

آخر حاجة هقولها لك إنك ممكن تعلميها يكون عندها رأي عن طريق إنك تكوني قدوة ليها.

- إزاي؟

استخدموا كلمات زي «متهياي» و«أعتقد» و«أنا فاهم إنك قصدك....»
علشان تعرف إن كل واحد رأييه يحتمل الصواب والخطأ. وكمان لو مثلاً قلت لها على حاجة هي مش موافقة عليها وبعدين سمعتها واقتنعت فعلاً برأيها، فعادي إنك تغيري رأيك، متعبريش ده ضعف، ده بيخليها تتعلم إن الحكمة ضالة المؤمن.

الخلاصة

جودي مامتها وباباها مبيسمعوهاش أبداً، ومبيسمحولهاش تقول لأ على حاجة، ومفيش نقاش بينهم، ده غير إنهم بيعلقوا على أبسط فعل بتعمله، كل ده خلاها مش قادرة تعبر عن رأيها، ولا عن إحساسها، وخلاها دائماً كاتمة مشاعرها.



الواجب العملي

* دي شوية مواقف.. فكّر هتتصرّف فيهم إزاي:

- لو ابنك جاي يورّيك قصة كتبها في المدرسة وانت بتتفرّج على ماتش في التلفزيون.

- لو بنتك جت تقولك إنّها بتكره أختها البيبي.

- لو كلكوا قرّرتوا تروحوا جنيّة الحيوانات، وابنك مصمّم إنه عايز يروح الملاهي.

- لو لسّه قايل لابنك ميقولش كلمة معينة، وبعد شوية لقيته قالها بسّ افكر في النصّ وسكت على طول.

- لو كنت بتحلّي الواجب مع بنتك، وفيه سؤال بتجاوبه لها وهي مصرّة إنّ الميس جاوبته بطريقة تانية، وبعد شوية اكتشفت إنّها هي اللي صحّ.



مفيش إنسان كامل

تقبل النقد

* نور راجعة من المدرسة، ومعها الصورة اللي رسمتها النهارده، دخلت من الباب وهي زعلانة جداً، سها مامتها شافتها زعلانة فسألتها:

- ما لك يا نور يا حبيبتي؟ زعلانة ليه؟ حصل إيه في المدرسة؟
- رسمت الصورة دي، وكنت فاكرة إني هبقى المركز الأول في الفصل، بسّ الميس قالت إن سارة هي المركز الأول.
- أمال إنتِ المركز الكام؟
- ولا أيّ مركز، الميس مقالتليش حاجة على الرسمة!
- إزاي؟ طبّ وريني كده... الله! دي صورة حلوة جداً، دي أكيد أحسن رسمة في الفصل من غير ما شوف الباقي، ازاي الميس متخليكيش الأولى!! إنتِ رسامة وأنا كده هشتكي الميس بتاعتك علشان مش عارفة تفرّق بين الرسم الحلو والوحش.

دخلت نور أوضتها، وفرحت بكلام مامتها..

رجع باباها من الشغل، نور أخذت الصورة، وراحت تورّيها
لباباها علشان عايزه تسمع كلمتين حلوين يعوّضوها عن اللي
حصل في المدرسة.

- إيه رأيك يا بابا؟

- حلوة، دي إيه بقى؟

- إيه ده! هي مش باينة؟

- لا باينة.. ده بيت وده شجر، صح؟

- لا يا بابا دي صورة جنينة الحيوانات، كده!!

- معلش مأخدتش بالي، بس إنتِ مش راسمة حيوانات.

- ماهو فيه أسد وفيل وزرافة أهو، إنتِ مش شايفهم؟

- لا كنت بحسبهم شجر في الخلفية!!

سها سمعت الكلام ده، جتْ بسرعة وقالت:

- إزاي تقول كده يا أحمد؟ دي صورة حلوة وأحسن صورة كمان! ده أنا أوّل

مرّة أشوف حدّ في سنّها رسّام كده.

سكت أحمد وبصّ للرسمه تاني يمكن مش واخد باله ولا حاجة، وبدأت نور

تشكّ في كلام مامتها، بسّ حاولت تصدّقه وخلص علشان متزعّلتش نفسها.

دخلت نور أوضتها وسرّحت شعرها بطريقتها وعلى قدّ سنّها

طبعًا، طلعت الصالة وسألت مامتها:

- إيه رأيك يا ماما في التسريحة بتاعتي دي؟

- الله! دي تحفة! جميلة جدًا، ازاي عملتها؟!

فرحت نور ودخلت عند بابها الأوضة، أول ما شافها بابها قال لها:

- ما لك يا نور منعكشة شعرك كده ليه؟ متخلي ماما تسرحك كويس!

طلعت نور برّه الأوضة وقعدت تعيط وهو مش فاهم هي بتعيط ليه..

جّت سها ودخلتله الأوضة، وقالت له:

- إنت ازاي تقول كده لنور؟

- أنا قلت إيه؟

- بتقول لها منعكشة، مع إنها جاية توريك تسريحة هي عاملها لنفسها!

- وأنا هعرف منين؟!

- إنت جرحتها وخليتها تعيط، البنت حساسة، خد بالك بعد كده!

جه الصبح وراحت نور المدرسة، ميس نهى إدتهم حاجات

يحلوها وتصححها لهم، لما جه الدور على نور، الميس قالت لها

الغلطات اللي عندها وشرحتهم للفصل علشان الكل يستفاد، نور

قعدت مكانها وفضلت تعيط، الميس قالت لها:

- بتعيطي ليه يا نور؟ أنا بقولك على أخطائك علشان متغلطيش فيهم تاني!

وطول الوقت أيّ حدّ يصلح حاجة لنور، أو يقول لها أيّ إرشادات؛ تزعل نور
وتعيّط...

في يوم، سها جالها تليفون من ميس نهى:

- ألو، إزيك يا ميس نهى.

- إزيك يا مدام سها، أنا كنت محتاجة أتكلّم معاك شوية.

- خير!! فيه حاجة؟

- خير إن شاء الله، بس كنت عايزه ألفت نظرك لشوية حاجات بخصوص

نور.

- ماشي حاضر هجيلك النهارده إن شاء الله.

ميس نهى بتعرف تتعامل مع الأطفال كويس، ومتخصّصة في

مجال التربية، والكلّ بيحبّ ياخذ منها نصايح علشان يربي ولاده.

راحت سها المدرسة وقابلت ميس نهى.

- إزيك يا مدام سها؟

- الحمد لله، ما لها نور؟! طمّنيني!

- متخافيش، نور كويسة الحمد لله، وشاطرة.. بس هي عندها مشكلة

واحدة تعبها...

- إزاي؟ أنا بنتي كويسة جدًّا، ومعندهاش أيّ مشاكل.

- بنتك كويسة آه، بس مفيش طفل معندوش مشاكل أو عيوب،

أكبر خطر هو إنَّ الأهل
ميشوفوش أو يتجاهلوا
عيوب أولادهم

أكبر خطر هو إنَّ الأهل ميشوفوش أو يتجاهلوا
عيوب أولادهم، طول ما الواحد عارف إنَّ ابنه فيه
عيب عايز يتصلح يعرف على طول إنَّه ماشي في
الطريق الصحّ.

- طيّب أنا عارفه إنَّ نور بسّ حساسة شويّة، وبتتأثر بأيّ نقد، هو ده العيب؟
- بالطّبط، هو ده اللي كنت عايزه أكلمك فيه.
- طيّب أعملها إيه؟ هي حساسة علشان كده بخاف أوجّه لها أيّ نقد!

- مش هو ده الحل، لو إنتِ موجهتهاش، هي كده مش هتعرف
الصحّ من الغلط، والأهمّ من كده إنَّها هتواجه نقد كثير في
حياتها برّه البيت، بسّ ساعتها مش هتقدر تتقبّله علشان هي
مش متعودّة على التوجيه من حدّ.. والمشكلة هتزيد وتتأثر أكثر
وأكثر!

- طيّب إيه الحل؟

- أوّل وأهمّ حاجة لازم تعملها إنك تبقي صريحة معاها، تقوليها
على الحلو حلو.. وعلى الوحش وحش، يعني متخافيش توجّهها أو
تنتقديها علشان يكون هو ده الطبيعي... والمدح أو النقد يكون على
قدّ اللي عملته من غير مبالغة، يعني رسمت صورة بدل ما تجاملها
وتقولي لها دي تحفة وخطيرة أو تحببها وتقوليلها دي وحشة، قوليلها

أنا عجبني في الرّسمة البيت ده أو الألوان هنا حلوة أو الشجرة دي عجبتي، بسّ كنت محتاجة تلونها بألوان تانية، وهكذا... بحيث يكون النقد أو المدح مفيد ليها فعلاً.

- آه فهمت قصدك، يعني مأفورش.

- أيوه بالظبط، ولما تحبّي تديها إرشادات وخايفة متتقبلهاش مُمكن

تستخدمي لغة جسد مناسبة توصلها اللي عايزه تقوله من غير حساسية.

- إزاي؟ أنا محتاجة حاجة زيّ كده فعلاً!!

- مثلاً وانتِ بتكلميهما انزلي لمستواها مش

تبقي بتكلميهما وانتِ واقفة وهي شايفة رجلك بسّ،

حطّي إيدك على كتفها وانتِ بتكلميهما، بصّيلها في

عينها، وبابتسامه حلوة في بداية الكلام، وبلاش

تربّعِي إيدك وانتِ بتكلميهما... الحاجات دي بتخلّي

الطفل يتقبّل اللي بتقوله أكثر، ومن غير حساسية.

- مممم..

- وتركزي على حاجة واحدة مهمّة وانتِ بتربّيها، إنها تكون

بتعمل الصحّ علشان ترضي ربّنا وترضي ضميرها، مش الهدف

من إنّها تعمل الصحّ إنّها تكون مستنّيه حدّ يمدحها، أو إنّ الناس

تتكلم عنها حلو.

«مشكلة معظما أنا
نفضّل أن يدمّرنا المديح
على أن ينقذنا الانتقاد!»
نورمان فيسنست ييل

- طيّب أّزاي أعلمها الكلام ده في سنّها الصغير ده؟
- مثلاً بدل ما تقولي لها «أنا فخورة بيك» قولي لها «المفروض تكوني فخورة بنفسك». استخدمني أسئلة زيّ «تفتكري إيه الحاجة الكويسة اللي انتِ عملتها؟»، «تفتكري إيه اللي لو كنتِ عملتيه كان هيبقى حلّ أحسن؟»، «إيه اللي عايزه تعمليه المرّة الجاية علشان تحسّني الرسة؟» وهكذا.... وده مش بس هيخليها تعمل الصحّ عشان ترضي نفسها، ده كمان هيخليها تعرف تقيّم وتنتقد نفسها، وتعرف أخطاءها قبل ما أيّ حدّ يقولها لها.

- كلام حلو، وعندك حقّ في كلّ اللي قلتيه، أنا غلطانة إني خفت بزيادة على مشاعرها بطريقة مبالغ فيها، أنا بعد كده هبهدلها نقد!!
- ههههه. الأطفال بني آدمين زيّنا بالطّبط ليهم مشاعر وبيحسّوا، فقبل ما نقول لهم حاجة تجرح مشاعرهم نحطّ نفسنا مكانهم الأوّل.. فلما نضطرّ ننتقدهم أو نوجّههم، لازم يكون النقد ده في مصلحتهم وبكلام مفيد ومفهوم بالنسبة لهم، وكلام واضح وبسيط علشان الأطفال مبيفهموش وبيتوهوا من الكلام الكثير المرسل.

وشروري ميكونش نقد وخلص علشان نفرغ بيه شحنة سلبية جّوانا، يعني مش واحدة تبقى متخانقة مع جوزها تروح تطلّعه على ولادها.. والأهمّ من كده إنّ النقد يكون للصفة أو الموقف اللي الطفل عمله، مش للطفل نفسه.

الخلاصة

نور عمرها ما بتسمع أيّ نقد على حاجة بتعملها، بل بالعكس على طول بتسمع مدح عمّال على بطّال، والموضوع ده خلاها مش متقبّلة أيّ نقد، أو حتى إرشاد يتوجّه لها.



الواجب العملي

* دي شوية مواقف، فكري هتتصرّفي فيهم أزاى:

- بنتك جايه توريك بروجكت حلو عملته في المدرسة، بس ملوناه بطريقة وحشة وأقل من قدراتها.

- لو بنتك جت قالت لك «أنا أخذت الدرجة النهائية في الامتحان، بس الميس مادّتنيش ستيكرز، ومقالتيش شاطرة ولا حتى سقفتلي».

- لو لسه متخانقة مع زوجك، وطلعت من الأوضة لقيت الولاد موسخين الصالة اللي انت لسه منصّفاها.



سلمي على طنط...

الاجتماعية

سلميم وأميرة كانوا خارجين في يوم الأجازة يفسّحوا بنتهم فرح،
راحوا الحديقة، وقاعدين مبسوطين والجوّ حلو، فرح قاعدة
جنّبهم ومبتلعش بلعب الأطفال، مع إنّ فيه مراجيح وزحاليق
كثير، هي قاعدة بتتفرّج بسّ على الأطفال وهما بيلعبوا.. أميرة
قالت لها:

- روجي العبي بالمراجيح زيّ باقي الأطفال بدل ما انتِ قاعدة كده!
- لا مش عايزه.
- ليه مش عايزه؟ إحنا قرّبنا نمشي خلاص، وانتِ لسّه ملعبتيش!
- طيّب تعالي معايا!
- آجي معاك فين وأنا كبيرة كده؟ كلّ الأطفال بيلعبوا لوحدهم!
- فرح فضلت قاعده، ونفسها تلعب بسّ خايفة تروح لوحدها،

أميرة قالت لها:

- خلاص براحتك متلعبيش، بس متجيش تعيطي أما نروح وتقولى ملعبتش.

سليم قال لفرح:

- تعالي طيب وأنا هوذيك.

فرحت فرح وراحت مع باباها عند الزحليقة، وطبعاً فيه أطفال
كثير على الزحليقة، فضلت ماسكة إيده ومش عايزه تطلع
وتختلط بالأطفال الثانية، وهو قاعد بيرقها، ومفيش فايده، جت
بنت أكبر منها شوية قالت له:

- عمو أنا ممكن أمسك إيديها وأطلعها معايا الزحليقة.

- ماشي أمسك إيديها.

فرح قلبها بيدق بسرعة، وخايفة، ومش عايزة البنت تقرب لها، أول ما سابت
إيد باباها اختفى على طول بسرعة، موقفش حتى يشوفها هتعمل إيه، بصت فرح
وراها ملقتهوش (الإحساس اللي جالها ساعتها إنه ما صدق خلص منها ومشي)
خافت فرح وفتحت في العياط، والبنت الكبيرة اتخضت وسابتها... جت أميرة
وقالت لها بنرفزة وزعيق:

- بتعيطي ليه؟ إنت على طول كاسفاني كده؟ أنا غلطانة أصلاً إني بفسحك...

خلاص خليك قاعدة جنبي ومتلعبيش... حاجة تخنق.

وهي بتزغق لبنتها لقت مها صاحبها بالصدفة في الحديقة:

- إزيك يا مها؟

- إزيك يا أميرة، عامله إيه؟ إزيك يا فرّوحه يا حبيبتى؟

فرح حَبَّت وشَّها في مامتها ومردّتش على مها.

- عامله إيه في المدرسة؟

فرح مبتدّش، أميرة قالتلها:

- متردّي على طنط! عيب كده!!

- خلاص سيببها براحتها، إنتوا إيه أخباركوا؟

- أهو زيّ مانتِ شايقة، فرح لازقة فيّا على طول ومش عايضة تكلم حدّ ولا

تلعب مع حدّ، وكاسفاني على طول... مش عارفة أعملها إيه!

- معلش بكره تكبر وتلعب لوحدها، ومش هتعرفي توقفيها تاني.

فرح سامعة مامتها وهي بتشتكي منها كالعادة، وماسكة في هدوم مامتها جامد.

راحت أميرة بصّت لها وبعدت إيديها عنها بعنف، وقالت لها:

- خلاص بقى، أبعدى شوية وبلاش اللزقة دي، هتفضلي جبانة كده؟! يا ساتر!

بعدت فرح شوية، بس زعلانة، وحاسّة إنّها مش مرغوب فيها.

أميرة خلّصت الكلام مع صاحبته، وبصّت جنبها ملقتش فرح، دورت حواليتها

لقيتها قاعدة بعيد شوية لوحدها، راحت لها وقالت لها:

- مش قلت لك قبل كده متبعديش عنّي علشان محدّش يخطفك؟! فيه ناس

كثير مُمكن تخطف الأطفال ومشوفكيش تاني!!

أترعبت فرح من الكلام ده، وخافت من الناس أكثر ما هي.
خَلَّصُوا فسحتهم ورَوَّحُوا البيت.

تاني يوم، فرح راحت المدرسة، فرح ملهاش أصحاب خالص، قاعدة لوحدها طول الوقت. ميس نهى ملاحظة الانطوائية بتاعة فرح، وبتحاول تدخّلها في أنشطة جماعية علشان تشجّعها يكون عندها صداقات، بس هي أول ما حدّ يقرب لها أو يتكلّم معاها أو الميس تنادي اسمها؛ بتحسّ إن قلبها بيدقّ بسرعة، وبتنهدا بتوجعها، وفي الآخر بتفضل قاعدة ساكنة ومبتشتركش في أيّ حاجة.

خلصت السنة، وجه وقت حفلة نهاية السنة اللي بتعملها المدرسة وبيشارك فيها كلّ الأطفال، والأهالي بيحضروا الحفلة وتوزيع الهدايا.

جّت أميرة علشان تحضر حفلة بنتها وهي فرحانة وقاعدة في المكان المخصّص للمدعوين. فرح داخلة هي وكلّ الأطفال من جنب الأهالي علشان يسلموا عليهم ويصوّروهم قبل ما يطلعوا على المسرح وبيبدأوا الحفلة.. فرح عدّت جنب مامتها بس بدل ما تسلّم عليها وتكلم وتروح المسرح فضلت مع مامتها وماسكة فيها، ومش عايزة تسيبها.. أميرة قالت لها:

- روعي يلا على المسرح!!

- لا مش عايزه!!

- هو إيه اللي مش عايزه؟ الأطفال كلهم على المسرح! إنت هتلقيني فيا هنا

كمان؟

- خايفة أروح!

- مش بمزاجك هو، يلا بسرعة علشان هيبدأوا!! إنت هتكسفيني هنا كمان؟

قعدت تزفها علشان تروح على المسرح، وفرح تقاوم، والدموع في عينيها.

شافتهم ميس نهى، راحت لأميرة وقالت لها:

- مش لازم فرح تشارك على المسرح، فرح ليها وظيفة تانية تعملها في الحفلة.

وأخذت فرح من إيديها وودّتها على أوضة جوّه فيها الأطفال اللي

بيساعدوا في تنظيم الحفلة، وخلّتها ترتّب معاهم الـ **projects**

اللي عملوها طول السنة علشان أولياء الأمور يتفرّجوا عليها آخر

الحفلة. ورجعت ميس نهى لأميرة وقالت لها:

- كنت عايزه أتكلّم شوية معاك بعد الحفلة لو فاضية.

- أه طبعًا، هجيلك إن شاء الله.

خلصت الحفلة، وراحت أميرة مكتب ميس نهى..

- خير يا ميس نهى؟ فرح عامله إيه معاك؟

- كويسة، بس هي مشكلتها إنّا هادية خالص، ومبتحبش تشترك

في أيّ نشاط اجتماعي من أوّل السنة.

«كلّ الأطفال لديهم
القدرة ليكونوا أطفالاً
عظيمة، وظيفتنا هي
توفير عالمٍ عظيمٍ لتنمية
هذه القدرة»
ستانلي جرينسبان

- آه عارفة، أنا غلبت معها والله، زيّ ما انتِ شايقة؛ كنت بزقّها علشان تطلع على المسرح وهي لازقة فيّ على طول!!

- آه شفت، بسّ موضوع المسرح ده مش مشكلة كبيرة، فيه أطفال بطبيعتها بتحبّ الظهور، وتحبّ الناس

تشوفها، وفيه أطفال متحبّش حدّ يتفرّج عليها وتحبّ تكون مش باينة، وتتكسف لو لقت حدّ بيبصّ عليها، وفرح من النوع ده، فمش لازم تضغطي عليها علشان متزوّدش عندها الموضوع ده ويقلب معها بخوف، حاوي تسيبها براحتها وتشجّعها إنها تعمل أنشطة تانية هي بتحبّها وتستريح فيها، ومع الوقت ومع سنّها لما يكبر هي مُمكن تبقى أجراً، وممكن تشوفها بعد كده بقت بتعمل الأنشطة اللي انتِ نفسك تشوفها فيها. - يا ريت، بسّ مش موضوع المسرح بسّ! حتى أماً بنروح أيّ مكان فيه أطفال مبتراضاش تلعب معاهم، وتفضل لازقة فيّ، لحدّ ماسمينها اللزقة بتاعتنا!!

- فرح بنت خجولة، وإلى حدّ ما انطوائية، بسّ مش صحّ إنك تعترفي بكده، وإنك تسمّيها بصفة سلبية، كده الصفة دي هتكبر عندها... علشان طول ما انتِ بتوصفيها بيها، هتفضل مقتنعة إنّها كده فعلاً، وهيبقى صعب تغيير الصفة دي بعدين، وده اللي بيسمّوه الـ **labeling** فحاوي تتجنّب الموضوع ده علشان خطير، وكمان متحاوليش تجربها

إنَّها تبقى اجتماعية، أو إنها تلعب مع الأطفال بالعافية، إديها وقتها لحدّ ما تتأقلم على المكان وخليك جنبها. وافتكري إنك كل ما هتركزي على الصفة دي كل ما هتزيد معاها، يعني طول ما انت بتدفعيها إنَّها تلعب مع الأعراب، هتخاف أكثر وتحسّ بعدم الأمان أكثر وأكثر، لو كانت هتاخذ ساعة علشان تتعوّد على المكان هتاخذ عشر ساعات، وهكذا...

- يعني خلاص أسببها كده براحتها، وأقول مفيش أمل؟

- لا فيه طرق تانية كثير مُمكن تعمليها تساعد فرح إنَّها تكون اجتماعية أكثر.

- زيّ إيه؟

- أوّل حاجة إنك تتكلّمي معاها، وتسمعيها كويس، وتجاوبي معاها، اسألها إيه اللي بيخوّفها من الأعراب! واسمعي اللي بتقوله، وأقبله زيّ ما هو من غير لا نصح ولا إرشادات، ومش بسّ كده؛ إنّت كمان المفروض تتعاطفي معاها، ومع اللي بتقوله. ده هيخليها مش تحت ضغط إنَّها لازم تتغير دلوقتٍ وهتعرف إنك متقبّلاها زيّ ما هي، وكمان متعاطفة معاها، وده هيسهل عملية تغييرها.

- ماشي أحاول أتعاطف معاها، مش مشكلة.

- خليها تخرج كثير وتقابل ناس كثير، متعزليهاش ومتخوّفيهاش من الناس.

- أخوّفها إزاي؟

- زِيٌّ مثلاً إنَّكَ تقولي لها إنَّ مُمكن حدَّ يخطفك، ممكن حدَّ يسرقك.
 - طَيِّبٌ أقول لها إيه علشان متبعدهش، إنتِ شايقة حوادث الخطف كثير
 إزاي؟

- قولي لها مثلاً «متبعديش عني علشان أفضل شايفك»
 - آه، فكرة فعلاً.

- ولما تخرَّجيتها كثير وتخليها تختلط بناس كثير؛ خليكِ معاها وجنبها علشان
 تفضل حاسَّة بالأمان، عرِّفها إنَّكِ على الأطفال التانية، متجربهاش إنَّها تلعب مع
 حدَّ متعرفهوش. ولو حسَّت بالأمان هتلاقيها واحدة واحدة بتتغيَّر.
 - طَيِّبٌ ساعات ببقى مضطَّرة أمشي وأسيبها، مش على طول هبقى معاها،
 أعمل إيه ساعتها؟

- لو اضطرَّيتِ تسيبها لوحدها مع الأعراب لازم تهَيِّئها لكده الأول،
 تعرِّفها إنَّكِ لازم تسيبها وتسألها «ممكن عملي إيه لو حسَّيتِ إنَّكِ
 قلقانة؟» اتَّفقي معاها تأخذ الدبodob أو البطانية أو الكتاب أو الحاجة اللي
 بتحبُّها ومتعلِّقة بيها وبتحسُّسها بالأمان، ولو خافت أو قلققت في أيِّ وقت
 تطلِّعها وتمسكها شوية، مُمكن تطمئنَّها أكثر.

- أه فعلاً، هي عندها بطانية بتطمئن بيها، بس أنا محرَّجة عليها متطلِّعهاش
 برَّه البيت، خلاص مُمكن نستخدمها في المواقف دي.

- وفي الآخر خليكِ قدوةً ليها، هي لو شافتك ليكِ أصحاب وبتكلمهم

«عندما يكون الآباء
منزعجين، يكون الأطفال
منزعجين أيضًا.
فالأطفال يرون العالم من
خلال أعين آبائهم»
د/ براد جستنسون

كويس هي هتحاول تقلدك.وعلمها الردود
المناسبه لكل موقف علشان هي مش هتعرفهم
لو حدها من غير تعليم، يعني تسلّم بإيديها، لما
تكلم حدّ أو حدّ يكلمها تبصّله، تبتم في وشّ
اللي بيتكلم، تردّ بصوت مناسب... وكلّ ده
هيجي بالتدريب والممارسة إن شاء الله...
متستعجليش.

الخلاصة

فرح بنت خجولة بطبعها، وبتحتاج وقت أطول علشان تتعوّد
على الناس، لكن لما مامتها كانت بتضغط عليها تغير طبيعتها دي
بالعافية وبتشتكي دائماً إنها انطوائية، ده بدل ما يخليها اجتماعية
خلّاها بقت انطوائية أكثر.



الواجب العملي

* دي شوية مواقف، اکتبي هتتصرّفي ازاى لو اتعرضت ليهم:

- في العيد، والعائلة كلّها مجتمعة، وعايزين الأطفال اللي في العائلة كلّهم
يغنّوا أغنية العيد مع بعض، بسّ بنتك مكسوفة ومش عايزة.

- قابلت واحدة صاحبك، وبنتها عايزة تكلم بنتك وتصاحبها، بسّ بنتك مش
بتردّ عليها.

- ابنك يقول لك «أنا خايف من الأعراب».

- بنتك رايحة أول يوم في المدرسة الجديدة، وعايضاك تفضلي معاها.



لازم أضحي علشان إبنِي ينبسط

الإحساس بالآخرين وعدم الأنانية

- * في المصيف على البحر، كانوا قاعدين.. إبراهيم وعلا وابنهم سيف.
- * سيف كان قاعد بيلعب بالرّمْل ويرميه حواليه، ومش واخذ باله ببيجي على حدّ ولا لأ.

إبراهيم باباه قال له:

- خدْ بالك متمرّيش الرّمْل علشان مُمكن بيجي على حدّ!

علا ردّت عليه وقالت:

- سيبه يلعب براحتة، مش كفاية قاعد بيلعب لوحده! وبعدين

محدّش اشتكى.

كَمَل سيف رمي الرمل، جه شويّة رمل في عين الولد اللي جنبه وقعد يعيظ،

مامته راحت لعلا، وقالت لها:

- مُمكن لو سمحتِ تخلي ابنك ميرميش رمل علشان جه في عين ابني!

- معلش، أنا آسفة جدًّا.. بس يا سيف.

سيف بطل رمي الرمل، وشوية ورجع يرمي رمل ثاني، ولد ثاني أصغر
منه شافه بيعمل كده فحبّ يقلّده، فأخذ شوية رمل ورماهم على
سيف، جه الرّمْل في عينه فقعد يعيِّط، علا وإبراهيم قاموا جري
عليه، راحوا زَعَقُوا للولد اللي رمى عليه الرّمْل، وعلا راحت لمامته
وقالت لها:

- مُمكن تاخدي بالك من ابنك! مش معقولة كده! ساياه يرمي رمل على
الناس، مُمكن يعوّر حدّ!

شويّة وهما قاعدين على الشاطئ، عدّى راجل يبييع ألعاب بحر.
سيف راح لبابه وقال له:

- أنا عايز الجردل والجاروف دول.

- إحنا مش لسّه جايبينك امبارح؟ هو كلّ يوم!!

- لا اللي يبيعه ده على شكل برق بنزين وأنا معنديش!!

- لا مش هجيب، مُمكن وقت ثاني.

- لا أنا عايزها دلوقتٍ (وبدأ يعيِّط).

- لا قتلتك أنا لسّه جايبك امبارح!

علا لقيته بيعيِّط، قالت لإبراهيم:

- حرام متسيبش سيف يعيِّط كده، هنحرمه ليه من حاجة بيحبّها أدام نقدر

نجيبها! جيبه اللي هو عايزه، دي حاجة بسيطة، أنا عارفه إنّه بيحبّ فيلم

كارز قوي.

وراحت وَقَفَتِ الرّاجل، واشترت له الجرّدل، أخذه سيف وراح يلعب بيه،

إبراهيم قال لعلا:

- إنتِ مدلّعة الولد قوي، وكده هتبوّظيه!!

- مدلّعا فين بس! هو لازم أقول له لأ على الّلي بيطلبه علشان مبقاش

مدلّعا؟! وكمان مش معقولة في وقت المصيف وهو مبسوط هنكد عليه، أنا نفسي يبقى مبسوط على طول، ويعيش حياة أحسن من حياتنا واخنا في سنّه.

جّه وقت المرّواح، إبراهيم وعلا نادوا على سيف علشان يروّحوا:

- يلاً هنروّح البيت.

- لا مش عايز!

- يلاً علشان الدنيا بدأت تضلم!

- لا مش هروّح (وبدأ يدبّ على الأرض).

- هنمشي ونسيبك كده!!

سيف مرّدش عليهم، وكمل لعب..

- يلاً قلت، طيب لو جيت دلوقتِ هجيلك آيس كريم واخنا مروّحين.

- هيبويه.....

قام سيف جرّي، وروّح معاهم.

روّحوا البيت، فتح سيف التلفزيون وقعد يتفرّج على كارتون فترة طويلة،

باباه قال له:

- هات بقى الرّموت نتفرّج على حاجة تانية غير الكارتون، كده كفاية!

- لا، أنا عايز أتفرّج على الكارتون ده!

علا قالت لإبراهيم:

- سيبه يتفرّج على الكارتون، إحنا في مصيف، أهمّ حاجة سيف ينبسط حتى

لو كان على حسابنا.

زهق إبراهيم، ودخل نام.

سيف معليّ التلفزيون على الآخر، والوقت متأخر، وكمان باباه نايم، علا

قالت له:

- وطيّ التلفزيون شوّبة علشان بابا مش عارف ينام!

- لا، مش هسمع حاجة.

- يا ابني، الناس نائمة!

سيف مش مهتمّ، طنّشت علا، وعملت نفسها مش واخدة بالها كالعادة.

وعدّى المصيف ورجعوا بيتهم تاني.

علا دخلت الشقة قالت:

- ياااااه.. البيت مليون تراب ومحتاج تنظيف جامد، أنا عايزاكووا تساعدوني

بقى في التنضيف.

دخل سيف أوضته وكرانه مسمعش حاجة، وأخذ اللعب بتاعته وفرشهم على

الأرض، وسابهم ومسك التابلت.

باباه دخل أوضته، وقال له:

- إنت ليه مش بتساعد ماما؟

- تعبان!

- ماهو كلنا تعبانين، وكلنا بنساعد بعض علشان نخلص.

- لا.. مش قادر.

دخلت علا أوضته اتخضت!!

- يعني أنا بقول لك تعالى نضف معايا تروح توسخ أوضتك أكثر، على الأقل

نضف أوضتك طيب!

- حاضر.

وكمّل لعب بالتابلت عادي طول الوقت لحدّ ما علا فقدت الأمل

وخلصت تنضيف الشقة، ودخلت نضفت أوضته كمان.

جه وقت العشاء، وقعدوا ياكلوا وخلصوا أكل، علا قالت:

- أنا خلاص اتهديت النهارده، كل واحد ياخذ طبقه ويحطه في المطبخ!

سيف كانه مسمعش حاجة وقام، علا نادته:

- سيف، أنا بقول لك شيل طبقك.

مردش عليها.

- شيل طبقك علشان أجيبك آيس كريم!

راح شال طبقه من غير نفس، وحطه في المطبخ.

- شاطر يا سيف، شفت يا بابا سيف جميل وبيساعدني إزاي!! سيف ده شاطر جدًّا.

وفضل سيف حاله كده، مبيساعدش حدّ، مبيسمعش كلام حدّ، مامته وباباه مُلزمين إنهم يسمعوا كلامه ويلبّوا له كلّ رغباته، حاسس إنّ الدنيا كلّها ماشية تحت أمره.

في يوم، راحت علا مع سيف عند صاحبته شيرين علشان يلعب مع ابنها أحمد.

دخل سيف يلعب مع أحمد جوّه في الأوضة، كلّ ما أحمد يمسك لعبه تحلّو في عين سيف، ويروح يقول له ورّيني كده، وياخذها منه، ولو رجع طلبها أحمد ميديهاالوش، فضل كده أحمد مش عارف يلعب، وسيف واخذ كلّ اللّعب جنبه، مع إنها لعب أحمد أصلاً.

زهق أحمد، وطلع يشتكى لمامته قدام علا، علا قالت له:
- معلش يا أحمد، هو بسّ علشان اللّعب بتاعتك جديدة بالنسبة له فهو عايز يلعب بيها.

جّه سيف من جوّه، ومعاه عربية برق بنزين، وقال لمامته:

- أنا عايز عربية زيّ دي!

- مش أنا لسّه جايالك عربية!

- لا مكانتش زِيّ دي، دي كانت ماطم وأنا عايز برق بنزين!
- طيّب هبقى أشوف.
- لا أنا عايزها دلوقتِ يا إِمّا آخذ دي!
- دي بتاعة أحمد هتاخذها إزاي!
- مليش دعوة! أنا عايزها (ورمى نفسه على الأرض وبدأ يفتح في العياط).
- خلاص.. خلاص، ادخل دلوقتِ وأنا هبقى أجيبها لك.
- النهارده.
- طيّب واخنا مروّحين نبقى نعدّي نجيبها.
- دخل سيف كَمَل لعب، علا قالت لشيرين:
- شفتِ سيف! بقى صعب قوي، كلّ حاجة عايزها دلوقتِ.. عايزها دلوقتِ!!
- إنتِ بسّ شكلك مدلّعا شوية.
- يووووه.. إنتِ هتعملي زيّ إبراهيم! كلّ شوية يقوِّي مدلّعا وهيبوظ، هو أنا يعني علشان مش عايزه أزغله، وعايزاه يعيش عيشة كويسة ومش عايزه أنكد عليه وهو مبسوط؛ أبقى مدلّعا؟! وبعدين لما بتقولي لطفلك لأ كثير إنتِ كده بتقلّي ثقته بنفسه ويببقى معقّد، وأنا أحرّمه ليه أصلاً من اللّي هو عايزه أدام أقدر أعملهوله؟

- مُمكن يكون اللي بتقوليه صحّ، بسّ في حدود برضه، إنتِ عارفه أزاى تعرّفي
 إذا كنتِ مدلّعة ابنك فعلاً واللّا لأ؟ فيه أربع كلمات كده يعرفوكِ إذا كان ابنك
 متدلّع فعلاً ولا لأ....
 - إيه همّا؟

- أوّل كلمة «لا» لو مبيستحملش يسمع كلمة لأ تتقال له على
 أيّ طلب؛ يبقى متدلّع.

تاني كلمة «دلوقتِ» لو مبيستحملش إنّ طلبه يتأجلّ شوية ولازم
 يتنفذّ في الحال.

ثالث كلمة «عايز» لو على طول بيحبّ ياخد وميديش،
 ومبيقدّرش كمان اللي بتديهوله.

رابع كلمة «أنا» لو حاسس إنّ هو أهمّ واحد في الكون، والكلّ
 موجود حواليه علشان يلبيّله رغباته وبسّ.

لو لقيتِ حاجة من الأربعة دول موجودة فيه؛ يبقى تعيدي نظر تاني في
 معاملتك معاه.

- إنتِ بتتكلمي على سيف، ده عنده كلّ الصفات دي... بسّ هو كده من
 زمان من غير ما أدلّعه ولا حاجة، شكل الحاجات دي مولود بيها ولا وارثها معرفش

منين!!

- فيه صفات كثير فعلاً بتيجي بالوراثة، أو بيكون الطفل مولود بيها، بس دي

بالذات صفة مكتسبة من المعاملة، ومفيش جين اسمه جين الدلع.

- طيب أعمل إيه؟ خلاص كده الولد هيبوظ؟

- لا طبعاً أكيد فيه حلول...

- زي إيه طيب؟

- ابدئي قولي له كلمة «لأ» عادي من غير تأنيب ضمير، عمر ما كلمة «لأ»

كانت سبب في تقليل ثقة الطفل بنفسه، أو إنها تعقده إلا إذا كانت طبعاً عمال

على بطال، لازم يكون فيه حدود، وفيه حاجات مسموح بيها، وحاجات لأ..

- أصله بيصعب علياً قوي إني أقول له لأ وأزعله، إنت عارفه هو ابني الوحيد.

- وازني بين حبك ليه غير المشروط بأي حاجة وبين الحدود والقواعد اللي

المفروض يمشي عليها. يعني بتحببه أه مهما عمل وتبينني حبك ليه، بس ده

ميمنعش إنك تقولي له لأ لما يعمل حاجة غلط، أو يطلب حاجة وانت مش عايزه

تجيبها له، وعلى فكرة مش لازم كل مرة تبقي مجبرة إنك تقويله وتقنعيه بسبب

رفضك.. وكل ده مياثرش على حبك ليه، والطفل ذكي وبيحس بحب والديه كويس.

إنتِ ليكِ حقوق لازم
تاخديها علشان تقدري
تكملِي المشوار، زِي
ما طفلك ليه حقوق
بالظبط.

- ده أنا باجي على نفسي كتير علشانه وعلشان
أخليه مبسوط!

- إحنا مش مخلصين عيال علشان نتعذب، زِي
ما الطفل له حقوق، إنتِ كمان ليكِ حقوق.. ليكِ

حقّ إنّه يساعدك في البيت، ليكِ حقّ إنك تتكلمي مكاملة مهمّة في التلفزيون
وميقاطعكيش فيها، ليكِ حقّ تنامي براحتك من غير ما يجبرك تيجي تنامي جنبه
في سريره الصغير.. متتنازليش عن حقوقك علشان فاكده إنّ التضحية دي هتساعده،
بالعكس إنتِ كده بتساعديه إنّه يكون أناني.

- خلاص هحاول، طيب متعرفيش أزاى أخليه يحسّ بيّا وباللي حوالبه؟ أنا
بحسّ إنه عايش في عالم لوحده، يعني أقول له وطي التلفزيون علشان بابا نايم
يقول لي مش هسمع، ومش فارق معاه الناس الثانية، المهمّ هو بسّ ينبسط!

- هو ده برضه غالباً بسبب تضحيتك الدائمة، وإنك عايزه تلبيله كل طلباته فأعتقد
إنّ الدنيا كلها مخلوقة علشان راحتته. في الفترة الجاية حاولي تساعديه يشوف الناس
ومطالبهم أكثر، يعني بدل ما تقولي له «وطي التلفزيون شوية» قولي له «تفتكر بابا
حاسس بإيه دلوقتٍ وهو نايم؟» خليه هو يفكر في شعور الآخرين، قولي له «تفتكر
أحمد مُمكن يحسّ بإيه لو أخذت لعبته؟» خليه لما تبقوا في مول مثلاً يمسك الباب

لحدّ ما الكلّ يعدّي، علّميه ميقيمش في الطريق وانتوا ماشيين علشان الناس تعرف
تعدّي كويس، قولي له «أحمد هو اللي عليه الدّور وبعدين أنت» عرّفيه إنّ الناس
التانية عندها مهارات مختلفة وقولي له «أحمد رسمه حلو، تعالي نقول له يرسم
لنا رسمة».... وهكذا، خليه يعرف إنّ فيه ناس في الدنيا غيره.

- أه عندك حقّ بدل ما هو عايش في الدنيا لوحده كده!

- وانتِ كمان اعلمي قدّامه كده، خليه يشوفك بتشيلي الأذى عن الطريق،
بتفتحي الباب للناس، بتساعدي حدّ في الشارع حتى لو بتوصفيله الطريق، بتعملي
أكل وتبعّتيه للجيران... كده.

وكمان متمدحيهوش على كلّ حاجة بيعملها، يعني فيه حاجات واجب عليه إنّ
يعملها، مش معقولة أمّا يشيل هدومه تسقيله وتجبيله هدية، متمدحيهوش عمال
على بّطال، أمدّحيه بسّ على الحاجات اللي تستاهل.

الخلاصة

علا مدلّعة سيف قوي، وبتهتمّ دايماً إنّها تنفّذ له كلّ اللي هو
عايزه، حتى لو كان على حساب الآخرين اعتقاداً منها إنه كده
هيبقى سعيد وهييعرف إنّها بتحبّه، لكن بالعكس ده خلاه بقى
أناني أكثر، ومبيفكرش غير في نفسه، وفي أوّل موقف هتقول له
«لأ» فيه هيشكك في حبّها ليه.



الواجب العملي

* دي شوية أسئلة تسألها لنفسك وتجاوبها بصراحة:

- هل طفلك مبيستحملش يسمع كلمة لأ تتقال له؟

.....

- هل طفلك لما بيكون عايز حاجة مبيستحملش إنك تأجليها؟! عايزها

دلوقت!

.....

- هل طفلك على طول بيطلب بسّ، لكن لما حدّ يطلب منه حاجة ميرضاش

ينفّذها؟

.....

- هل طفلك حاسس إنه أهمّ واحد في البيت، وكلّ حاجة تتأجل علشان

خاطره؟

.....

- هل بتقدري تقولي لطفلك لأ على حاجة عايزها، ولا بتخافي من زعله

وعياطه؟

.....

- تفتكري إنك لما بتقولي لطفلك لأ على حاجة هو عايزها كده هيحس إنك

مش بتحببته؟

- لو كنت بتتفرّجى على حاجة في التلفزيون جه ابنك عايز يغيرها ويحبب

الكارتون اللي بيحبّه بتعملي إيه؟

- هل ابنك بيراعى شعور اللي حواليه، ولا مش شايف حدّ غير نفسه؟



مش عارفه
أختار إيه؟!

القدرة على اتخاذ القرار

* نادية بتنادي على نادين بنتها:

- نادين، يلاً بسرعة علشان هنتأخر، لبستِ؟!!

- لأ لسه يا ماما!

- طيب يلاً اختاري اللبس اللي انتِ عايزاه، والبسي بسرعة علشان
نلحق ننزل قبل المغرب.

فضلت نادين واقفة قدام الدولاب فترة طويلة، وفي الآخر أخذت اللبس اللي
اختارته ولبسته وطلعت لمامتها، أول ما نادية شافتها قالت لها:

- إيه العكّ اللي انتِ لابساه ده؟ إنتِ مفيش مرّة تختاري حاجة عدلة؟!!

تعالى أجيب لك لبس كويس شوية!

وراحت اختارت لها لبس تاني وختلّتها تلبسه.. نزلوا مع بعض المول علشان
يجيبوا لبس العيد.

- يلاً يا نادين عايزين بقى نختار أحسن فستان علشان تبقي أجمل بنّوتة

في العيد!

- الله!! بَصِّي ده! الفستان ده جميل قوي، ينفع ناخده؟
- إيه ده! ده مقرف قوي!
- طَيِّب بَصِّي ده يا ماما؟! أنا عايزه واحد هایش.
- ده فَلَاح قوي، إِنْتِ بتختاري حاجات غريبة جدًّا، سييك انتِ أنا هختارك
واحد يعجبك... بَصِّي الفستان ده!
- بسّ أنا كان نفسي في واحد هایش!
- بسّ بلاش الاختيارات بتاعتك الخايبة دي، ادخلي إلبسي ده بسّ.
دخلت نادين لبستّه.
- الله ده حلو عليكِ، يَلَّا ناخده.
وجابته نادية، ونادين رضيت بيه.
وهما ماشيين في المول نادية قالت لها:
- تعالي نشرب حاجة، تحبِّي تشربي إيه يا حبيبتي؟
- مش عارفة!
- يعني إيه مش عارفة! أمّال مين اللي عارف؟
- خلاص هاخذ بييسي.
- لا البييسي مش حلو ليكِ، أنا هجيلك عصير مانجو.
رضيت نادين بالعصير، وشربته من غير مناقشة.
جَه يوم العيد، كلّ العائلة بتتجمع في بيت أمّ نادية بعد صلاة العيد، الكلّ
إدّي لنادين العيدية، وبقي معاها فلوس كتير، نادية نادتها:

- نادين، تعالي علشان نخرج ونشتري حاجة بالعيدية بتاعتك، تحبّي تشتري

إيه؟

- معرفش!!

- خلاص تعالي ننزل وتختاري.

- لا.. بكره!

- يعني مش عايزه تجيبي حاجة بيهم النهارده؟ النهارده العيد!

- لا هحوّشهم أحسن.

ودخلت نادين جوّه في الأوضة، استغربت نادية من ردّ فعل نادين

.٥٥

جّت دينا خالة نادين ومعاها آيس كريم:

- جبتلوكوا آيس كريم، كلّ واحد يختار النوع الليّ عاوزه.

جّه وقت اختيار نادين، دينا قالت لها:

- تحبّي تاخدي آيس كريم بالشيكولاتة ولا الفراولة ولا الفانيليا؟

فضلت واقفة نادين حيرانة ومش عارفة تختار، نادية قالت لها:

- إيه؟! ساعة عشان تختاري حتة آيس كريم، يلا بسرعة علشان الآيس كريم

هيسيح، والكلّ عايز يختار!!

- خلاص اختاريلي إنتِ.

- إدّيه يا دينا بالفانيليا.

فرحت نادين وأخذت الآيس كريم ودخلت جوّه، كإنّها استريحت

من همّ الاختيار.

استغربت دينا قوي من الموقف ده، وقالت لنادية:

- هي ليه نادين خايفه تختار؟ إنتِ بتختاري لها كل حاجة واللا إيه؟

- شفتِ اللي أنا فيه؟! كل حاجة أطلب رأيها فيها متعرفش تختار، ويوم ما

تختار بتختار حاجة زفت!

- ولما بتختار الاختيارات الزّفت اللي بتقولي عليها دي بتعملي إيه؟

- بختار أنا وخلص علشان نخلص!

- طيب ما يمكن يكون هو ده السبب.

- إزاي؟

- المفروض لما تيجي تختار أي حاجة مهمما كانت حلوة أو وحشة تشجّعها

على إنها اختارت، يعني قوليلها «برافو عليكِ علشان اخترتِ، بس إحنا محتاجين

نختار حاجة تانية علشان ده فيه المشكلة كذا وكذا»، إوعي تترقي على اختيارها...

لو أتريقتِ على اختيارها إنتِ كده بتخليها تخاف تختار حاجة قدامك تاني.

ولو حصل واختارت حاجة كويسة إوعي تفوّتي الفرصة دي،

شجّعها وقولي لها «يااه اختيارك جميل، أنا لو مكانك كنت

اخترت كده برضه».

وحتي كمان فيه أوقات ممكن تنفّذي لها اختيارها اللي انتِ مش شايفاه

مناسب قوي، بس مفيش فيه ضرر كبير، يعني لو بتختار مثلاً نوع عصير، ممكن

زَيِّ وانتوا بتشتروا لعبة أو لبس جديد هيقعد معاها فترة، فتفكّر أكثر شوية، والقرار الكبير زَيِّ مثلاً هتختار التدريب اللي هتلعبه في النادي طول الصيف، فالقرار ده تفكّر فيه أكثر ومنتسرّعش... فلما يبجي وقت اختيار الأكل ولقيتها محتارة قولي لها إن الاختيار ده من النوع البسيط يعني مش هيحصل ضرر كبير لو اخترتِ غلط... وهكذا.

- جميلة قوي الفكرة دي برضه، إنتِ عندك أفكار حلوة أهو...

- وممكن حتى تعلميها طريقة الاختيار عن طريق القدوة، يعني أما تيجي تشتري حاجة قدامها، فكري بصوت عالي. يعني مثلاً بتجيبى لي هدية فقولي بصوتِ عالي «أجيلها الشنطة دي ولا دي؟! دينا بتحبّ البني، وكمان دي سعرها حلو، يبقى مُممكن نختار دي أحسن» وهكذا... يعني تعرّفها ازاي طريقة اتّخاذ القرار بتحصل بالخطوات.

الخلاصة

نادية مبتديش فرصة أبداً لنادين إنها تختار براحتها حتى في أبسط الحاجات، ويوم ما نادين بتختار اللي هي عايزاه، نادية بتتريق على اختيارها، وتختار هي في الآخر، وده خلّى نادين مبقاش عندها قدرة على اختيار أبسط حاجة، حتى لو كان نكهة الآيس كريم اللي هتاكله!!



الواجب العملي

- * لو شايقة طفلك متردد في الاختيارات هتعملي معاه التلات خطوات
دول كل ما تلاقيه متردد:
- * سهلي عليه الاختيار، واڏيله بس خيارين يختار بينهم.
- * قولي له على نوع الاختيار ده، هل هو بسيط ولا متوسط ولا كبير.
- * لو اختيارة كويس امدحي اختيارة، ولو اختيارة خطأ اشكريه على تعبته
إنه اختار، وقولي له عيوب اختيارة بهدوء.



خليهم براحتهم، دول لسه
صغيرين!

الحياء

* ليلي ومازن أخذوا الأجازة، وخلص قعدوا في البيت، أمل مامتهم واقفة في المطبخ مشغولة كالعادة.. مازن راح لها وقال لها:

- إحنأ زهقانيين...

- طيب روحوا إلعبوا مع بعض.

- تعالي العبي معانا!

- أنا مش فاضية دلوقت، أمأ أخلص.

مشي وراح لليلي، ومفيش دقيقتين وبدأوا يتخانقوا ويعيطوا، أمل راحت لهم، بس هي مشغولة في الطبخ، ومفيش وقت تشوف مين الغلطان ومين اللي عنده حق، فعلشان تريح نفسها وتنجز قالت لهم:

- خدوا التابلت اتفرجوا عليه لحد ما أخلص.

فتحوا اليوتيوب وقعدوا يقبلوا في الـ home واختاروا الفيديو اللي لفت انتباههم، خلص الفيديو وجابوا غيره.. وفيديو ورا فيديو

وقاعدين مُنْسجمين جدًّا وهاديين، أمل خُلصت الطبخ وقالت لنفسها:

- ياااه أخيراً العيال هاديين!! فين فكرة التابلت دي من زمان؟! أمّا أروح بقى
بسرعة أعمل كام مكاملة مهمّة قبل ما يزهقوا وييجوا لي تاني.

دخلت أوضتها تتكلّم براحتها في الهدوء، وهما قاعدين في أوضتهم يتفرّجوا
على الليّ همّا عايزينه من غير أيّ رقيب.

جهّ أشرف باباهم من الشغل وأكلوا وقعدوا بالليل شوية في الصّالة، مازن
وليلي قاعدين معاهم في الصّالة ومعاهم اللعب بتاعتهم.

أشرف فتح التلفزيون وقعد يقلّب في القنوات لحدّ ما استقرّ
في الآخر على قناة أفلام، وقعدوا يتفرّجوا على الفيلم، الفيلم
فيه مشاهد خارجة كتير، ورقص وألغاز مش مناسبة إنّه تدخل
البيت، أمل قالت له:

- غيرّ الفيلم ده علشان العيال قاعدين!

- همّا فاهمين حاجة؟! دول لسه صغّيرين، وكمان قاعدين بيلعبوا بألعابهم
أهو...

همّا كان معاهم ألعابهم بسّ كانوا بيتفرّجوا على التلفزيون معاهم
وبيلقوا الليّ يلقطوه.

جهّ اليوم الليّ بعده، وكان الويك إند، أشرف قال لهم:

- إحنا هنروح النادي النهارده وهنقابل عمّكوا أحمد وأولاده!

- هيببييه!!!

أحمد عمّهم عنده ولد وبنت في نفس سنّهم، ويحبّوا يلعبوا معاهم.
أمل طلّعت لهم لبس علشان يلبسوه، ليلي لابسة تيشيرت قصير وشورت
قصير خالص.. أشرف قال لأمل:

- اللبس بتاع ليلي ده قصير كده ليه؟

- خليها تلبس براحتها، دي لسه صغيرة، إنت عايزنا نخنقها ولا نحجبها من
دلوقة؟!

راحو النادي وقابلوا ولاد عمّهم، وقعدوا يلعبوا معاهم، معظم الألعاب اللي
يلعبوها فيها مسك بالأيدي وأحضان، وأولاد مع بنات مش فارقة.. خلصوا يومها
وانبسطوا وروّحوا.

وفضل السيناريو ده يتكرّر طول الأجازة، الصبح على اليوتيوب وبالليل أفلام
ويوم ما يخرجوا، الولاد بيحتكّوا بالبنات أكثر من اللازم.

خلصت الأجازة وبدأت الدّراسة، عدى الأسبوع الأوّل، أمل قاعدة في البيت
جالها تليفون من المدرسة:

- ألو، أنا ميس نهى، وكنت عايزه أقابلك.

- خير؟!

- خير إن شاء الله، أنا بس كنت عايزه أتكلّم معاك شوية.

- حاضر هجيلك!

راحت أمل المدرسة، وقابلت ميس نهى:

- خير! ما لهم مازن وليلى؟

- ليلي ومازن أطفال كويّسين ما شاء الله، بسّ السنة دي لاحظت إنهم متغيّرين كثير عن السنة الليّ قبلها، فكنت عايزه ألفت نظرك لسبب التّغيير الليّ حصل.

- متغيّرين إزاي!؟

- مازن كان هادي ومحترم جدًّا، ومبيشتمش ولا بيضايق حدّ، السنة دي بقى بيقف عليّ الديسك ويرقص بطريقة وحشة جدًّا، ويقول ألفاظ سيّئة لأصحابه، ويعمل حركات وإيحاءات غريبة ومش محترمة، ده غير إنّه كذا بنت في الفصل اشتكت منهّ إنه كلّ شوية يحضنها، ولعبه مع البنات بقى غريب ومش بريء. وليلى السنة الليّ فاتت كانت بريئة وهادية ورقيقة، السنة دي بقت صوتها عالي، وبتقول ألفاظ وحشة قوي، وتشتّم أصحابها ولعبها مع الأولاد بقى غريب ومش طبيعي!!

- يا خبر!!! كلّ ده؟! أنا مش واخدة بالي من كلّ ده... طبّ وإيه السبب؟
إيه الليّ حصل؟

- ماهو ده الليّ كنت عايزة أكلمك فيه، أنا بتخيّل إنّ ممكن ده يكون تأثير مشاهد وفيديوهات وأفلام مش مناسبة اتعرّضوا ليها طول الأجازة.. صحّ؟

- أنا مش عارفة بالظبط همّا كانوا بيشوفوا إيه على اليوتيوب!!

- لازم تتابعي كلّ حاجة بيشوفوها حتى لو كانت كارتون، فيه كارتون كثير فيه أفكار ومشاهد بتسّم عقول الأطفال، وطبعًا الأفلام، مش محتاجة أقولك إنها مش مناسبة ليهم، ويستحسن أصلًا إنّ الأفلام

اللّي من النوعية دي تتقطع خالص من البيت.

- آه عندك حقّ.

- حاولي كمان تقللي الاختلاط بين الأولاد والبنات، عرفيهم إنّ البنات ليهم ألعاب معينة مناسبة ليهم، والأولاد ليهم ألعاب تانية، بلاش يكون الاختلاط زيادة عن اللزوم بحجّة إنهم لسّه صغّيرين.

- طيّب مفيش عندك أفكار تانية أعملها لهم تزوّد من حياءهم اللّي اتضرب طول الأجازة؟

- بصّي، لو اتعرضتوا لأي منظر أو مشهد أو حتى تصرّف مش مناسب

"من يستحيي من الناس
و لا يستحيي من نفسه
فلا قدر لنفسه عنده"
الثعالبي

في الشارع وأولادك شافوه، حاولي تتكلّم لي معاهم وتعرفيهم إنّ ده غلط وميرضيش ربّنا، متتغافلش عنه وتعملي نفسك مش شايفة. اربطي أيّ حاجة بيعملوها بإرضاء ربّنا، يعني متقوليش عيب أو ميصحّش، قولي حلال وحرام. وخليهم دايمًا متذكّرين إنّ ربّنا شايفهم حتى لو انت مش معاهم،

وشايفهم بيعملوا إيه وبيتفرّجوا على إيه. قولي لهم إنّ سيدنا محمد هو قدوتنا، لو كان معانا دلوقت كان هيعمل إيه ويتصرّف إزاي؟! كان هيعجبه الحاجات اللّي بنشوفها في التلفزيون واللا لآ؟

- يعني أحاول أخليهم يراقبوا الله في تصرّفاتهم مش الناس.

- بالظبط، وبالنسبة لليلي علشان هي بنت تاخدي بالك هي بتلبس

إيه، ميبقاش اللبس بتاعها مكشوف قوي بحجة إنها لسه صغيرة، هي بتكبر مع الوقت من غير ما تحسّي، بس بتكون خلاص اتعوّدت على النوع ده من اللبس، وصعب تغييره بعد كده.

الخلاصة

أمل علشان تريّح دماغها في الأجازة من دوشة ولادها فبتديهم التابلت طول اليوم يتفرّجوا على الليّ همّا عايزينه من غير رقابة، وكمان أشرف علشان يستمتع بوقته بعد ما يرجع من الشغل فيتفرّج على الليّ هو عايزه في التلفزيون، ومش مهتمّ إذا كان ولادّه بيتفرّجوا ولا لأ. ده غير إنهم مستصغرين ولادهم فمش بيدقوا قوي على لبسهم، ولا على طريقة لعبهم مع الجنس الآخر. كلّ ده أثر على حياء ليلي ومازن بطريقة ملحوظة.



الواجب العملي

* دي كذا حاجة هتاخدي بالك منها ضروري، ومتطنشيهاش أبدًا:

- الكارتون اللي أطفالك بيشفوه، وياريت يشغّوه على التلفزيون علشان كده هتعرفي تتابعيه أكثر من لو هيشوفوه على موبايل أو تابلت.
- الحاجات اللي انتوا بتتفرّجوا عليها في البيت وأولادك قاعدين.
- ملابس أطفالك، بالذات البنات.



إنّتي إليّ بإيدك تفرحي نفسك
بنفسك

السَّعادة

آية قاعدة على التابلت في الصّالة كالعادة، وحنان مامتها في
المطبخ ولايسه جلايية شغل البيت زيّ كلّ يوم، وضاربة شعرها
كعكة، علاء جوزها رجع من الشغل، ودخل البيت قال:

- السّلام عليكم.

محدّش طبعا فاضي له يردّ عليه وكإنّه مجاش، عدّى على حنان في المطبخ،

قالت له:

- إنت جيت؟ جيتلي اللي طلبته منك؟

- لا نسيت، هبقى أجييهولك بالليل وأنا راجع.

- نعم؟! إنت نازل تاني؟

- آه هاكل برّه مع أصحابي.

- طبّ والأكل اللي واقفة بعمل فيه ده، وتعبانة من الصبح؟!!

- خَلِيه يوم تاني!

- إنت على طول كده؟! أصحابي أصحابي.. ولا كأنّ فيه بني آدمة في البيت،

أَمال إنت اتجوّزنتي ليه؟

- يووووه، هنبداً بقى في المَوَال بتاع كلّ يوم!

- وكمان مش عاجبك كلامي؟! (وبدأت تعيْط).

- يووووه، ده إيه العيشة النُّكد دي!! أنا سايبلك البيت وماشي.

وخرج علاء ورزق الباب وراه، حنان طلعت الصالة وقعدت

تعِيْط ، كلّ ده آية شايفاهم وسامعاهم زيّ خناقة كلّ يوم، بسّ

متكلّمتمش أيّ كلمة، وكَمَلت فُرجة على التابلت، حنان ملقمتش

قدّامها غير آية تطلّع نرفزتها عليها، زَعَقتلها وقالت لها:

- ما تقومي من على الرّفّت الليّ إنتِ قاعدة عليه ده من الصبح، روجي

اغْملي حاجة تانية بدل ما آخده أكسرهولك!!

دخلت آية أوضتها وقفلت الباب عليها، ومسكت قلم وورقة ورسمتْ

رسومات صغيرة على طرف الورقة، وكلّها ألوانها غامقه قريية من الإِسود.

خلص اليوم، ورجع علاء بالليل بعد ما الكلّ نام..... وهكذا كلّ يوم ينزل علاء

الشُّغل ويفطر هناك ويتعدّى مع أصحابه ويخرج معاهم ويرجع بالليل، ولو رجع

البيت وحنان صاحية لازم يعملوا خناقة، وآية بقت لما تسمع إنّ فيه خناقة هتبدأ؛

بقت تدخل أوضتها وتقفل عليها، وتنزل تحت البطانية يمكن متمسّعش حاجة.

في يوم، أمل أخت حنان طلبت منها تجيب آية تقعد مع بناتها يومين تعيّر جو، ووافقت حنان.

من أول يوم، أمل لاحظت إن آية سلوكها غريب، مبتضحكش أبدًا، قاعدة ساكتة على طول ومشغولة بس بالتابلت طول اليوم، أمل قالت للبنات:
- إيه رأيكوا تساعدوني نعمل كيكة حلوة النهارده علشان نحتفل بآية؟
استغربت آية جدًّا، وقالت في سرّها:

- أنا عمري ما ماما خلّنتني أعمل حاجة معاها في المطبخ، ازاي طنط أمل واثقة إننا تدخّلنا المطبخ عادي كده؟ وكمان أنا عمري ما حدّ احتفل بيّا!!!

وقفت آية معاهم في المطبخ بتبص من بعيد وخايفة تمسك أيّ حاجة، معندهاش الثقة إنّها تقدر تعمل حاجة صحّ. والبنات التّانيين بيشتغلوا في الكيكة ومبسوطين. أمل قالت لها:

- تعالي يا آية يا حبيبتي إكسري لنا البيضة دي.

- مش هعرف!

- طيب جرّبي، أنا متأكّدة إنك هتعرفي.

جرّبت آية، وكسرتها فعلاً..

فرحت آية شوية بعد التجربة البسيطة دي، بس برضه رجعت تاني زيّ ما

هي.

جّت حنان بعد يومين علشان تأخذ آية ويروّحوها، جت وهي ضاربة بوز،

أمل قالت لها:

- ما لك يا حنان؟
- مفيش، لسه متخانقه مع علاء قبل ماجي.
- إنتوا لسه بتتخانقوا برضه؟
- أيوه أنا زهقت، بمقاش عاجبه حاجة بعملها خالص، وعلى طول مع أصحابه، بيجي ينكد عليا ويمشي!!
- طيب وآية؟
- ما لها آية؟
- بتشوفكوا وانتوا بتتخانقوا؟
- مبخدش بالي، أنا ببقى فاضيالها!! أنا ببقى في إيه ولا في إيه!!
- إنت عارفه إن خناق الوالدين ده بيأثر جامد على الطفل؟
- بيأثر فين؟ ماهي زي القردة أهه!
- قردة إيه؟ إنت شكلك مش عارفة آية، ومش حاسه بيها! إنت مش شايقة هي عاملة ازاي؟! آية داخله على مرحلة اكتتاب، ده إذا مكانش عندها أصلاً!
- نعم!! اكتتاب من دلوقت؟ ده إيه المصايب دي يا رب!
- يا بنتي، اسمعيني بدل ما تقعدني تندبي كده.
- أهو سامعاك.

إنَّ السَّعادةَ تنتقل
بالعدوى.. لا تنتظر
عدوى أحد.. كنَّ حاملًا
لهذا الميكروب“
أنيس منصور

- آية مبتضحكش خالص، قاعدة لوحدها
- منطوية على طول، دايمًا حاسة بالتشاؤم، وخايفة
- تعمل أي حاجة علشان متفشلش، نفسها مسدودة
- خالص، وبت رسم صور صغيرة جدًا في زاوية في

متستئش حدّ يفرّحك،
لازم تفرّحي نفسك
بنفسك

الصفحة، وكمآن بتلوّن بالإسود أكثر حاجة.

- طيّب ماهي كده على طول!

- ماهي دي أعراض الاكتئاب عند الأطفال.

- طيّب أعمل إيه؟ ساعديني.. خلاص البنت

هتروح منّي كمان؟!!

- أولاً، لازم إنتِ الأوّل تبقي سعيدة علشان البيت كلّه يبقى سعيد.

- وأنا أفرح إزاي؟! إنتِ مش شايقة علاء بيعاملني إزاي؟!!

- متستئش حدّ يفرّحك، لازم تفرّحي نفسك بنفسك.. قري من

ربنا أكثر، غيّري من نفسك وشكلك، اعلمي نيو لوك هيغيّرلك المود،

اعلمي حاجة مفيدة بتحببها علشان ترجعلك نشاطك تاني، اخرجوا

خروجة حلوة لوحدكوا تجددوا بيها نشاطكوا... هتلاقي أساليب

كثير تسعدي بيها نفسك، ومتلوميش حدّ إنّه سبب تعاستك. ولما

انتِ هتحمسي بالسعادة الداخلية هتعرّفي تنشريها في البيت.

- ماشي هحاول أسعد نفسي.

- ولو حصل واتخانقتوا يبقى بينكوا وبين بعض، مش قدّام آية علشان ده

أخطر حاجة على نفسيّتها.

ثانياً بقى خليّ آية تساعدك في أيّ حاجة مفيدة في البيت، خليها تحسّ إنّها

تقدر تعمل حاجة بنفسها علشان هي معندهاش ثقة إنّها تقدر تعمل حاجة

أصلاً.

- ماهي قاعدة على طول على التابلت! هتعمل فين؟!!

- هي قاعدة عليه علشان معندهاش حاجة تانية تعملها، والتابلت ده أصلاً كفيلاً إنه يجيب اكتاب للأطفال، إنتِ عارفة إنَّ الأكاديمية الأمريكية لطب الأطفال (American Academy of Pediatrics APP) بتقول إنَّ المفروض الطفل ميقعدش أكثر من ساعتين في اليوم قدام الشاشات؟! وأصلاً لما الأطفال بتلعب وبتتحرك وبتخرج برّه ده بيخليهم أنشط وأسعد.

- خلاص هبقى أمرمطها في شغل البيت.

- ومن الحاجات الكويسة كمان إنَّ الأسرة كلها تاكل مع بعض، مش كل واحد ياكل لوحده، أو في مكان تاني. الموضوع ده بيبيني أسرة سعيدة فعلاً.

- ماهو علاء هو اللي مبيقعدش معنا!

- مانا بقولك بقي من النهارده متلوميش حدّ وابدئي إنتِ التّغيير وكلّ حاجة هتتغيّر بعد كده.

الخلاصة

حنان منكدّة البيت داهياً ومستّنيه إنَّ زوجها هو اللي يسعدّها ويخليّ البيت مبسوط، لكن بالعكس هو بيرجع من الشغل ويتخانقوا مع بعض قدام آية، وبعدها تطلع غضبها على آية لحدّ ما آية بقت تستخبي من الخناقات دي. وكمان آية حاسّة إنها مبتعملش أيّ حاجة مهمّة في البيت، وقاعدة بس بتتفرّج على التلفزيون طول اليوم. كلّ الحاجات دي أثّرت على نفسيّتها وبدأ يظهر عندها أعراض اكتاب.



الواجب العملي

* دي شوية أفكار مَّا تحسِّي إنك متضايقة أو مش في المود أو أولادك متضايقين تقدرني تنفذهم، وكمآن فيه مكان تزودي فيه أفكار زيادة مناسبة ليك:

- إتوضي وصلي ركعتين.

- اقرئي قرآن.

- إنزلي امشي شوية لوحك، أو مع أولادك، أو مع حد بتحببه.

- العبي رياضة.

- اعلمي حاجة بتحببها زي القراءة أو الرسم أو التلوين.

- اعلمي أكلة جديدة في المطبخ أو حلويات، وخلي أولادك يشاركوك.

- العبي مع أولادك كأنك طفلة.

.....

.....

.....

.....

.....

.....



إنت مش عارف إنت بتكلم
مين؟!

البساطة وعدم التباهي

* جه وقت التّقديم للمدارس، إنجي عايزة تغيّر مدرسة بنتها ميار، فقعدت مع زوجها أشرف بتقول له:

- ها.. قلت إيه؟ هنقدّم في المدرسة اللي قلت لك عليها؟

- دي غالية قوي وبعيدة جدًّا، ما لها بس المدرسة اللي هي فيها دلوقت؟

- كل أصحابي حطّوا ولادهم في مدارس إنترناشيونال ومدارس ألمانية، عايزهم

يقولوا عليّا إيه؟ مدخله مدرسة خاصّة علشان مستخسرة في بنتي؟!

- لا يا ستيّ، خلينا نستلف علشان محدّش يقول علينا مستخسرين في بنتنا!

وقعدت تقنع أشرف بالمدرسة الإنترناشيونال الغالية، وفي الآخر قدّمت لها

فيها.

في يوم ويك إند، راحوا الملول علشان عايزين يجيبوا شوية هدموم لميار تليق بالنادي

الغالي اللي مُشتركين فيه، إنجي شافت فستان، وقالت لأشرف:

- الله! إيه رأيك في الفستان البولوده؟

- ده غالي قوي.

- بس متقولش كده قدام ميار! إنت عايز تحسّسها إن إحنا مش

قادرين نجبلها الحاجات الكويسة اللي نفسها فيها؟

- نفسها فيها فين؟ هي شافته أصلاً؟ وبعدين شوفي ده زيّه

بالظبط، بس من غير علامة البولود!

- عايز بنتي متلبسش ماركة؟! أصحابها يقولوا عليها إيه؟

خلصت الأجازة، ودخلت ميار المدرسة الجديدة، ولّسه ملهاش أصحاب

وبتحاول تختار أصحاب، ميار بتشوف الأول البنت لابسة جزمة ماركة إيه علشان

تقرّر إذا كانت تقدر تكلمها ولا لأ.

في الفسحة لقت بنت معاهاش لانش بوكس، راحت لها وقالت لها:

- إيه ده! إنت ازاى مامتك مجابتلكيش لانش بوكس؟

وقعدت تتريق عليها لحدّ ما البنت مشيت وسابتها.

عدى شهرين في المدرسة، ميس هبة كانت بتحضّر لعرض مدرسي، وبتختار

الطلاب المناسبين.

ميار كانت واثقة إن الميس هتختارها، بس للأسف محصلش والميس اختارت

أطفال تانيين.. ميار زعلت جدّاً وروحت البيت وقعدت تعييط لمامتها، مامتها طبعاً

زعلت، وقالت:

- ازّاي يعني متخاركيش؟ هي مش عارفة إنت مين وبنت مين؟! أنا هروح

لها بكره!

راحت إنجي المدرسة علشان تقابل ميس هبة، وقالت لها:

- ميار جت امبارح البيت معيّطة وزعلانة جدًّا.

- ليه؟ خير!!

- علشان ماخترتيتهاش في العرض واخترت أطفال تانيين أقلّ منها.

- مين قال لك إن اللي اخترتهم أقلّ منها؟

- إحنا دافعين قدّ كده في المدرسة علشان في الآخر ترجعلي ميار زعلانة!؟

- كلّ الطلاب اللي في المدرسة دافعين زيّكوا بالظبط، وأنا اخترت الأطفال

المناسبين علشان عملتهم اختبار **performance** بسيط أشوف مين هينفع للعرض

ده، مُمكن ميار تشترك في العرض الجاي إن شاء الله.

- لا.. لازم ميار تشترك في العرض ده! إنت مش عارفة أنا مُمكن أعمل إيه!!

- اهدي بسّ يا مدام إنجي، أنا مُمكن بكلّ بساطة أقول لك خلاص هو ده

اختياري واعملي اللي انت عايزاه! بسّ أنا كان عندي شويّة ملاحظات كنت عايزه

أقول لك عليهم.. أنا واخده بالي إن ميار ملهاش أصحاب في المدرسة، وفيه أطفال

كثير بتتجنّب تكلمها.

- ليه بقى إن شاء الله؟

- ميار بتبصّ لكلّ اللي معاها في الفصل بتعالى، وحاسّة إنّها

قال رسول الله صلى الله عليه وسلم: «لا يدخل الجنة مَنْ كان في قلبه مثقالُ ذرَّةٍ من كِبَرٍ»

أحسن منهم، مع إنَّ تقريبًا كلَّ المدرسة مستوى واحد الحمد لله، ميار بتتريق على أصحابها اللي مش جايين شنطة أو جزمة ماركة، أو معاهمش لانث بوكس، ميار بتقيّم زمايلها باللي معاهم والي لابسينه.. ودي مشكلة كبيرة يا مدام إنجي

ممكن تكوني مش حاسة بيها دلوقتِ، بس هتحسّي بيها بعدين لما تلاقي ميار مش مهتمة غير بالشكليات، ومش فارق معاها أي حاجة تانية... إنَّ عارفة إنَّ الدراسات أثبتت إنَّ الطفل اللي أهله بيحبوا له كلَّ حاجة وأحدث حاجة علشان خافين على نفسيته وبيجيلهم إحساس بتأنيب الضمير لو أصحابه عندهم حاجة وهو معندهوش بيكون في الآخر أقلَّ سعادة وأكثر قلق من باقي الأطفال، ده غير إنَّه مبيبقاش عنده قدرة إنَّه يتصرّف صحّ في الأزمات، وبيكون حاسس بعدم الأمان ومعندوش ثقة بنفسه، وأقلَّ كرم، والأهمّ من ده كله إنه بيكون في النهاية غير راضي عن أهله، وبيجادل معاهم أكثر من الطفل الطبيعي.

- كلَّ ده؟! طيب أعمل إيه؟

- لازم تبديّ بنفسك يا مدام إنجي الأوّل، لازم تعرفي وتعلّمي بنتك إنَّ الإنسان مش بفלוسه ولا بلبسه ولا بماركاته، الإنسان بأخلاقه،

إوعي تحسّي بتأنيب الضمير إنّ فيه حدّ عنده حاجة زيادة عن بنتك، دي حاجة طبيعية أكيد.

اصرفي على بنتك وقتك أحسن من إنك تصرفي عليها فلوسك، هي لما تكبر مش هتفتكر الجزمة السكتشرز اللي جبتها لها في أولى ابتدائي، بس هتفتكر الوقت الحلو اللي قضيتيه معاها ولعبتوا وضحكنا مع بعض فيه.

حاولي تخليّ بنتك مميزة في حاجة، علشان تحسّ بنفسها ومتحتاجش إنّها لازم يكون عندها حاجة معينة تظهر بيها.

خليها تساعد الناس المحتاجة، مُمكّن تشتركوا في جمعية خيرية وتساعدوا الناس علشان تعرف إنّ الدنيا فيها ناس كثير محتاجة.

علميها ازاي أما حدّ يعمل لها خدمة لازم تشكره، ولما يكون فيه حدّ أحسن منها في حاجة معينة تتواضع وتعترف بكده، ولما تزعل حدّ تعرف تعتذر له.... وهكذا.

الخلاصة

مشكلة ميار المرّة دي في مامتها، هي علمتها إنّ الإنسان بفلوسه ولبسه وبالماركات اللي لابسها مش بشخصه ولا بقدراته، وده عمل عندها مشكلة في تقبل الآخرين والتكبر عليهم.



الواجب العملي

* المزة دي الواجب العملي كله يخص الأم، هتسألني نفسك الأسئلة دي وتجاوبها بصراحة:

- آخر مرة خرجت تشتري حاجات ليك، جبت ماركات علشان أصحابك يقولوش عليك مش بتلبي حاجات ماركات؟

.....
- لما دخلت ولادك مدرسة، اخترتها علشان ولاد أصحابك فيها ولازم تكوني نفس المستوى؟

.....
- لما بتلاقي واحدة متواضعة، ومش لابسة حاجة ماركه، أو مش مشتركة في نادي بتبصّي لها أزاى؟

.....
- لما ولادك بيعملوا حاجة غلط قدام الناس بتتكسفي الناس هتقول عليهم إيه، ولا بتزعلي علشان عملوا الحاجة الغلط عمومًا؟

.....
- لما بتلاقي واحدة صاحبك بتحكي عن ممتلكاتها، وقد إيه هي غنية بتبهرني بيها وبتتمني تكوني مكانها؟

.....



متزهقش من أسئلة طفلك

القدرات الذهنية

* بلال أخذ الأجازة وقاعد على التّابلت بيلعب، ومامتة قاعدة جنبه ماسكة الموبايل، قال لها:

- ماما، هي إيه الكلمة دي؟ أنا مش فاهم هو عايز إيه في اللعبة!
- نعم يا بلال، مش عارف تقرأ الكلمات الهايفة دي!! فيه حدّ في سنّك مش عارف يقرأ كلمة **arrange**؟ ماهو انتّ لو كنت بتعمل حاجة تانية مفيدة طول النهار، مكانتش دماغك اتمسحت كده! سيّب بقى الزّفت ده الليّ انت ماسكة طول النهار، وقوم هات قصّة اقرأها ولا حاجة.

طبّعًا بلال قال في سرّه:

- أنا إيه الليّ خلّاني أسألها؟! يا ريتني ما سألتها على حاجة!
جه الليل وباباه رجع من الشغل وقاعد معاهم وماسك موبايله، بلال قال له:
- بابا، أنا عايز أسألك على حاجة.
- اتفضّل يا حبيبي اسأل براحتك.
- مش انت بتشتغل مهندس؟
- آه.

- مش المهندس ده بيبنى البيوت والعمارات؟ إنت ليه بقى مش بتبني؟
 - لا.. فيه مهندسين بيعملوا حاجات تانية مختلفة كتير.
 - زيّ إيه؟ طب وانت بتعمل إيه؟ و....؟ و.....؟
 - خلاص بقى يا بلال أنا تعبان طول النهار في الشغل، كفاية أسئلة بقى! أنا صدّعت.

سكت بلال وفي دماغه 100 سؤال.....

اليوم اللي بعده قعد بلال مش لاقى حاجة يعملها، مامته مشغولة في التنضيف وباباه في الشغل، راح فتح التلفزيون وفضل قاعد قدامه طول النهار، مامته أول ما خلّصت، راحت لبلال وقالت له:
 - كفاية بقى تلفزيون، إحنا هنقضي كل الأجازة على التلفزيون ولا إيه؟ ما تقوم تعمل أيّ حاجة مفيدة تانية.

دخل بلال أوضته وقعد يدور على أيّ حاجة يعملها، لقي علبة صلصال في الدرج فتحها وقعد يلعب بيها، وعمل أشكال جميلة.
 دخلت مامته الأوضة.. بلال فرح وقال في سرّه:
 - أنا ماما هتلاقيني بقى مش بالعب بالتابلت وبعمل حاجة مفيدة وكمان بعمل أشكال حلوة؛ أكيد ماما هتنبسط.

لكن للأسف أول ما مامته فتحت الأوضة وشافت الأرض عاملة إزاي، زعّقت وقالت:

- إيه اللي طلّع القرف ده من الخزانة؟! بصّ الأرض بقت عاملة إزاي؟!
 الصلصال ده يترمى حالاً في الزبالة.

بلال طبعًا جاله إحباط من ردّ فعل مامته، كان نفسه يا عيني مامته تشوف الأشكال اللي عملها الأوّل على الأقلّ، رجع ثاني للتليفزيون والتابلت، أهو أيّ حاجة مبتوسّخش الدنيا، ومامته سابتة يقعد براحته علشان يسيب الشقة نظيفة. خلصت الأجازة، وبدأت الدّراسة ودخل بلال ثالثة ابتدائي.

بلال كلّ يوم يروح المدرسة يحفظ كلّ اللي الميس بتقوله حتى لو مش فاهم حاجة، يرجع ينقش الواجب بسرعة بسرعة ويخلّص ويقوم، ومامته فرحانة إنّه بيخلّص الواجب بسرعة، وكمان مبيسألهاش أيّ أسئلة.

جت حصّة الـ **Math**، الميس كتبت لهم مسألة على السبورة يحلّوها مختلفه شوية عن اللي في الكتاب اللي بلال حافظها وقالت لهم:

- الامتحان قرب، ودي مسألة شبه اللي هتيجي في الامتحان، اللي مش عارف بتتحلّ ازاي يقول لي علشان أفهمها له كويس.

بعض الأطفال راحوا سألوا الميس، لكن بلال مسألش وحلّها أيّ حلّ وقفل كراسته.

جت حصّة الـ **science**، الميس سألت الفصل سؤال:

- تفتكروا إيه الحاجة الـ **acid** اللي موجودة عندنا في البيت، ولو حطيناها

على الـ **baking soda** تعمل **reaction** وتفور؟

الكلّ قاعد يفكّر، سألت بلال:

- ها.. يا بلال تعرف؟

الولد اللي جنب بلال وشوشه، وقال له:

- الشيكولاتة!

راح ردّ بلال على الميس من غير تفكير، وقال:

- الشيكولاتة!

كلّ الفصل قعد يضحك عليه، وبلال قعد مكسوف.....

خلص الترم الأوّل وامتحاناته، وظهرت النتيجة، مامة بلال اتفاجئت بالنتيجة على غير المتوقّع، هي شايفه بلال مبيسألش على حاجة، وبيحلّ الواجب بسرعة، يعني فاهم كويس، لكن الدّرجات بتاعته وحشة جدّا، يا دوب درجة النجاح.

راحت على المدرسة تسأل إيه الدّرجات دي، دي أكيد مش درجات بلال.

الميس قالت لها:

- بلال شاطر في الحفظ، لكن هو عنده مشاكل تانية.

- مشاكل إيه؟

- بلال لو مش فاهم حاجة معينة عمره ما يبسأل، أو يقول أنا مش

فاهم، كإنه مكسوف أو خايف يسأل، وحتى لما يسمع أيّ معلومة بيصدّقها

على طول من غير أيّ مناقشة، يعني بسهولة لو أيّ حدّ قال له معلومة غلط

ممكن يجاوب بيها من غير تفكير حتى لو إجابة باين إنها مش منطقية.

- طبّ وده كله من إيه تفتكري؟

- بلال محتاج تنمّي عنده قدراته الذهنية أكثر، يعني ميبقاش معتمد على

الحفظ بس.

* - إيه القدرات الذهنية دي بقى؟

- يعني مثلاً تنمّي عنده التفكير النقدي اللي يقدر يخليه يحلّل

اللي بيسمعه وميقبلش بأي معلومة من غير تفكير، وتنمّي عنده التفكير الإبداعي اللي يخليه مُبدع في تفكيره، ويفكر برّه الصندوق.

- طبّ ازاي أميهم؟ عندك أي أفكار؟

- شجعي بلال إنه يسأل ويتحاور داها، إوعي تصديه لما يسأل كثير، بالعكس

حاوي تخليه يسأل أكثر، ومتتريقيش على أسئلته مهما كانت ساذجة وتافهة، وجاوبيه بكلّ بساطة من غير استهزاء. مش بس كده ده إنت تسأليه أسئلة على شكل حوار ظريف علشان تتأكدي إذا كان فاهم ولا لأ.

- أه فهمت قصدك.

- كمان فيه شويّة نشاطات كده، ممكن تعملها معاها.. مثلاً اسأليه أسئلة تنشّط

مخّه، وخليه يتوقّع ممكن تكون إيه الإجابة زيّ «تفتكر ازاي النبات بيكبر؟»، «تفتكر ازاي بيصنعوا الجبنة؟» أي أسئلة تخليه يسعى إنه يجيب إجابة.

لما تحكيه قصة خليه يتوقّع هو النهاية، وقولي له «تفتكر هيحصل إيه في

الآخر؟» أو «إنت كنت عايز النهاية تكون إزاي؟».

لأعبيه لعبة «ماذا لو» أسأليه «ماذا لو الإنسان يطير؟»، «ماذا لو الدنيا كانت بتمطر أكل بدل مطر؟»..... وهكذا. الألعاب التي زيّ دي بتوسّع تخيّلها، وتزوّد عنده التفكير النقدي والإبداعي التي قلت لك عليهم.

- حلوة الألعاب دي، هبقى ألعبها معاه إن شاء الله.

- من الحاجات كمان التي بتقتل التفكير الإبداعي عند الأطفال هي التلفزيون، القعدة الكثير على التلفزيون بتخلي الطفل يتلقّى بس من غير تفكير.

ومن الحاجات بقى التي بتنمي التفكير الإبداعي هي إنك تديله فرصة يلعب بالألعاب الاستكشافية والإبداعية زيّ الصلصال، الرّمل، الألوان..... خليه يلعب براحته ومتهتمّيش بالنضافة قوي بحيث تكون عندك أهمّ من تنمية قدرات بلال لأنّ الدنيا كده كده بتنضف بعد كده، بس ابنك هو الأهمّ في الآخر.

الخلاصة

بلال كان طفل ذكي، بسّ علشان مامته وباباه مبيتقبلوش أسئلته واستفساراته، وممكن يسفّهوا منها، فخلّوه يبطل يسأل ثاني وبقى يحفظ من غير فهم ده غير إنّ مامته مش بتشجّعه إنّه يلعب بالألعاب التي بتزوّد قدراته العقلية. كلّ ده خلى مستواه الدراسي يقلّ بشكل واضح.



الواجب العملي

* كلَّ يوم هتختاري لعبة من الألعاب دي، وتلعبها مع طفلك وحتي
كمان أفكار من عندك:

- لعبة ماذا لو؟! (واسأليه أسئلة خيالية).

- اسأليه أسئلة واقعية تنشط مخه.

- احكي له قصة وخليه يحط نهاية من تأليفه.

- الصلصال أو الرمل.

- رسم وألوان.

- مكعبات.

- يعمل crafts.

..... -

..... -

..... -

..... -



أنا شايفك.. إنت مبتصليش!!

العبادات

* أذان المغرب بيأذن، وأحمد قاعد بيتفرّج على التلفزيون، صلاح باباه جه لقاها فاتح التلفزيون فرعق له، وقال:

- لما تسمع الأذان تقفل التلفزيون على طول، وتقول ورا المؤذن، إنت فاهم؟
مش عايز أكرّر الكلام ده مرّة ثانية!

قفل أحمد التلفزيون لحدّ ما الأذان خلّص ورجع فتحه تاني. صلاح ناداه وقال له:

- يلاً قوم صلّي.
- طيب هخلّص الكارتون ده الأوّل، وأقوم أصليّ.
- لا تخلّص إيه! الصّلاة أهمّ طبعًا، أوّل ما الأذان يؤذن تسيب كلّ اللي بتعمله وتقوم تصليّ.

قام أحمد وقفل التلفزيون علشان خايف من باباه، باباه كمّل:

- ادخل اتوضّي الأوّل، أنا شايفك.

دخل أحمد الحمام، وقفل على نفسه، وفتح الحنفية وبّل حتّة من

شَعْرَه كده بالمِيه عِلشان يَبقى كَأنه اتوَضَى وقعد شوية في الحَمَام وطلع، دخل الأوضة بتاعته، وقفل الباب اللي فيه جزء منه زجاج، ووقف وراه، وقعد يعمل شويّة حركات للصلاة كَأنه بيصلي وطلع.

صلاح قال له:

- صليت؟

- أه.

- طيب تعالى يلا عِلشان نحفظ آيات القرآن بتاعة النهارده.

- يا بابا، مُمكن بعد شوية بسّ عِلشان مش قادر؟!

- (بزعيق) لا.. مفيش شوية، لما حدّ يقول لك تقوم تقرأ قرآن يبقى تقوم على

طول، يلا هات المصحف وتعالى من غير كلام كثير.

قام أحمد وجاب المصحف، وبدأ صلاح يقول له الآية، وهو يقول وراه.

بسّ أحمد قاعد بيحرك، ومش ثابت في مكانه وهو بيقول، صلاح اتترَفَز من منظر

الحركة الكثير دي، راح ضربُه كَفّ جامد على ظهره، وقال له:

- اقعد عِدِل، وكلّ ما تتحرّك افتكر الضربة دي، يا إمّا هتضرب تاني! فاهم؟

فضل أحمد قاعد زيّ الألف وخايف يتحرّك، ويبرِدّد وراه ونفسه الوقت ده

يخلص بأي شكل كَأنه همّ على قلبه... خَلَصُوا الآيات بتاعة النهارده، وصلاح قال

له:

- بكره هسمّعهملك إن شاء الله، إنت عارف بقى لو لقيتك مش حافظهم

هعمل إيه؟!

جِه اليوم اللي بعده، صلاح في الشغل، أحمد قاعد بيلعب ونسي طبعًا

القرآن والصلاة وكلّ ده، ومامته مشغولة طول النهار في الشقّة وفي المطبخ.

رجع صلاح من الشغل، جه وقت المغرب، ونادى على أحمد:

- حفظت النهارده؟

طبعًا أحمد محفظش حاجة، وخايف يقول لبابه لأ.

- أه حفظت.

- طيب يلا سمّع لي.

- بسم الله الرحمن الرحيم... آه، هي إيه أوّل الآية؟

- والشمس...

- والشمس....

طبعًا أحمد مش حافظ ولا كلمة، صلاح لقيه مش حافظ راح نزل فيه ضرب،

وهو قعد يعييط جامد، قال له:

- علشان بعد كده لما متحفظش القرآن تفتكر الضرب ده، وتحفظ كويس.

الأذان بدأ يؤذّن، قال له:

- يلا قوم اتوضّ دلوقتِ وصليّ.

دخل أحمد الحمام ومتوضّاش، ودخل الأوضة ومصلاش كالعادة، بسّ في

النصّ دخل عليه باباه واكتشف إنه مبصليش، زعق، وقال له:

- إنت مبصليش كلّ يوم وتقول لي إنك بتصليّ؟!!!

- لا بصليّ.

- إنت كذاب، إنت ربنا هيدخلك النار وتتحرق وتتشوى فيها عشان بتكذب

ومبصليش، وحتى متحفظش قرآن، أكيد ربنا مش بيحبك وهيوديك جهنم.

اتخضَّ أحمد من الكلام ده، وزعل قوي وفضل خايف، وفضلوا
على الحال ده كلَّ يوم.....

في يوم كانوا معزومين عند ناس أصحابهم... أول ما خلصوا أكل،
جه وقت الصلاة، أول ما صاحب البيت قام وأقام الصلاة، كلَّ
أولاده سابوا اللعب وجُم جري علشان يصلّوا لكن أحمد مجاش،
صلاح ناداه، وقال له:

- يعني الكلَّ جه علشان يصليّ، اشمعنى إنت ماجتش؟
جه أحمد ووقف مع أصحابه وصلّوا كلّهم، بعد الصلاة كلّهم قعدوا شوية
يقولوا أذكار الصلاة كمان من غير ما باباهم يقول لهم حاجة، وبعدها راحوا
يلعبوا.

استغرب صلاح، وقال لصاحبه:

- همّا أزاى يبجوا يصلّوا لوحدهم كده من غير ما تقول لهم ولا تتحايل عليهم ولا
تزَعَق لهم؟ ده أنا لازم أحمد يقوم بالزَعيق والضرب علشان يصليّ.
- عُمر الصلاة ولا القرآن كان يبجي بالعافية، حاول تحبّب أحمد في الصلاة
والقرآن، ومبيقاش قايم يصليّ غضب عنه أو علشان خايف منك وإلا أبسط حاجة
هيعملها إنّه هيصليّ بس قدامك، ولو إنت مش موجود مش هيصليّ أو هيعمل
نفسه بيصليّ.

- أه فعلاً هو بيعمل كده من دلوقتِ، أقول له يصليّ يقوم يدخل الأوضة
ويعمل نفسه بيصليّ ويطلع يقول لي صلّيت!

- لازم يعرف الأوّل إنّه بيصليّ علشان ربّنا مش علشانك، ولازم يحبّ ربّنا،
ويتمنى إنّه يدخل الجنة، وده هيحصل بإنك تكلمه كثير عن ربّنا وعن الجنة
وتخليّه يحبّها.

وبلاش في السنّ ده تخوّفه من النار ومن عذاب النار علشان لما يعبد ربّنا يبقى حبًّا له مش خوفًا منه.

عرّفه إنّ ربّنا موجود وشايفه في كلّ مكان، حتى لو انت مش موجود فرّبنا موجود، ويحبّ يشوفه بيطيّعه، فممكن تسأله سؤال تقول له «إنت لو عايز تعمل حاجة غلط، ومش عايز ربنا يشوفك، ممكن تستخبّي فين؟» وتخليه يفكر إيه المكان اللي ربنا مش هيشوفه فيه.

- أه فكرة فعلاً.

- ومهمّ برضه إنّك متسيهوش يصلي لوحده، صلّوا جماعة في البيت، وخليّه يصلي جنبك، أو خليه يصلي معاك في المسجد، فيتعود إنّّه يصلي معاكوا دائماً.
واعملوا مكان مخصوص في البيت للصلاة، ويا ريت لو كان ليه سجّادة صغيرة مخصوصة ليه.

وخلّوا كلّ الأحداث مرتبطة بالصلاة، يعني قول له «هنخرج بعد صلاة العصر»، «هنزور فلان بعد صلاة العشاء» وهكذا...

ولما يصلي كويس معاكوا شجّعه وامدحه على إنّّه صلي، وقل له إنت كده أكيد ربّنا بيحبك علشان صليت كويس.

ومفيش مانع إنّ كلّ فترة تجيب له مكافأة مادّية علشان بيصلي كويس، بس من غير ما تقول له صلي علشان أجيب لك مكافأة يعني ميقاش هدفه من الصلاة هي المكافأة.

وشجّعه إنه ينصح أصحابه ويدعوهم إنهم يصلّوا معاه.

- طيّب بالنسبه للقرآن!! ده بالذوق مش نافع وبالضرب مش نافع.
 - متخليهوش يكره القرآن، ويبقى مرتبط في ذهنه وقت القرآن بوقت الزّعيق والضرب، أولاً عادي جداً إنَّ الطفل يتحرّك كثير وهو قاعد يقرأ القرآن، الطُّفل عنده طاقة ومبيعرفش يقعد ساكن زينا.

إدّيله مصحف هدية ليه يحفظ منه.

ويا ريت لو يشترك مع أطفال تانية في الحفظ ومبيقاش لوحده، يعني خليه ينزل حلقة في المسجد علشان الأطفال بيشجّعوا بعض.

احكي له قصص القرآن ومعاني علشان يحفظ أسرع، وجاوب كلّ أسئلته مهما كانت معقدة

أو تافهة بطريقة بسيطة ومنطقيّة يفهمها علشان تثبت له معاني القرآن.

ممكن كلّ ما يحفظ سورة من القرآن تسجّل له فيديو وهو يقولها، ده بيشجّعه أكثر ويخليه يحفظ أكثر.

ومفيش مانع برضه إنك تجيب له هدية كلّ فترة لما يحفظ كام سورة، أو تعمل له حفلة لما يخلّص جزء من القرآن.

الخلاصة

صلاح زيّ أيّ أب نفسه ابنه يبقى من حفظة القرآن، ويصليّ كلّ الفروض، بسّ للأسف هو بدل ما يستخدم أساليب تحبّبه في القرآن والصلاة كرهه فيهم عن طريق الضرب والزّعيق والتخويف من النار.

متخليش طفلك يكره
 القرآن ويبقى مرتبط في
 ذهنه وقت القرآن بوقت
 الزّعيق والضرب



الواجب العملي

* دي شوية أسئلة تسألها لنفسك، وتشوف إذا كنت بتحبّ ابنك في الصلّاة والقرآن واللّا بتنفرّهم منها:

- لما بييجي وقت الصلاة، بتطلب منه يقوم يصليّ لوحده، ولا بتقوموا تصلّوا
لكلّوا جماعة؟

- لما طفلك بيصليّ الفروض أو بيحفظ قرآن، هل بتشجّعه بالكلام ولا
مبتتكلمش خالص؟

- هل فكّرت قبل كده تجيب له هدية علشان حفّظ كذا سورة؟ أو علشان
صليّ كذا يوم؟

- هل لما بييجي يقعد يحفظ قرآن بتجره إنّه يفضل قاعد ثابت ولا بتسييه
براحته؟

- هل فكّرت في مرّة تجيب له مصحف خاصّ بيه هدية وتزوّفه أو تعلمّه
إهداء؟

- هل لما يبسألك عن معاني في القرآن بتجاوبه إجابات بسيطة ومُقنعة، ولا

بتقول له مش وقته؟

- هل بتجيب له قصص القرآن وتحكيها له أو تفرّجه عليها كارتون؟

- هل فكّرت تسجّل له فيديو وهو بيصلي، أو وهو بيقراء سورة لسّه حافظها

جديد؟

- هل فكّرت تعمل له حفلة لو حفّظ جزء من القرآن، وتكون أحسن من

حفلات عيد الميلااد؟

كلمة أخيرة..

بعد ما قرأت الكتاب، واكتشفت بعض الأخطاء الّلي بتعملها مع أطفالك، وازاي هي خطيرة، وممكن تأثر تأثير كبير في شخصيتهم، أكيد قررت التغيير.

* **بسّ قبل ما تبدأ في التّغيير لازم تعرف حاجتين:**

الحاجة الأولى هي إنّ التربية الصحيحة محتاجة صبر ومثابرة وهمّة وعدم يأس، يعني طفلك الّلي عنده دلوقت سبع سنين وانت بتعامله طول السّبع سنين بطريقة معينة، وبعد ما قررت التّغيير غيّرت طريقتك معاه، متتوقّش إنه هيغيّر سلوكه الخاطئ ويصلّحه من موقف واحد أو اتنين اتصرّفت فيهم صحّ، مفيش عصاية سحرية بتحوّل سلوك الطفل من سلوك سلبي لإيجابي... الموضوع محتاج وقت طويل ومواقف كثير تتعرّضوا لها علشان تبدأ تحسّ بالتّغيير في شخصية الطفل.

الحاجة الثانية الّلي لازم تفتكرها وانت بتغيّر طريقة تعاملك مع الطفل هي إنّك بشر وممكن تغلط عادي، مش معنى إنّك خلاص قلت أنا هيغيّر طريقتي لكنّ في يوم حصل موقف ونسييت واستخدمت

طريقتك القديمة؛ إنّ كده خلاص كلّ اللّي بنيتّه اتهدّ، متخافش.. اللّي بيأثر في شخصية الطفل هو الاستمرارية في نفس طريقة التّعامل. موقف واحد مش هياثر في شخصية الطفل قوي لو كان عارض.

وفي النهاية، تربية الأطفال هي توفيق من عند الله، استعينوا بالله على تربيتهم، وادّعوا لأولادكوا، وادّعوا بالتوفيق، وأخلصوا النية، وربّنا هيوفقكوا إن شاء الله.

فهرس المحتويات

- 5 ليه أتجهت للتخصّص في مجال تربية الأطفال؟
- 6 أنواع التربية
- 11 اسمعي لطفلك بقلبك قبل أذنك
- 29 ما تفعله صوته أعلى مما تقوله
- 45 مفيش حاجة تخوف
- 59 ماما بتقولك إنها مش موجودة
- 75 ما تمسكش لعبي تاني
- 89 قلت لأ يعني لأ.....
- 105 مفيش إنسان كامل
- 115 سلمي على طنط
- 127 لازم أضحى علشان إبنى ينسبط
- 141 مش عارفه أختار إيه؟!
- 149 خليهم براحتهم، دول لسه صغيرين!
- 157 إنتي إيلي بإيدك تفرحي نفسك بنفسك
- 165 البساطة وعدم التّباهي
- 173 متزهقش من أسئلة طفلك
- 181 أنا شايفك!! إنت مبتصليش!!
- 189 كلمة أخيرة..

تعريف بالمؤلف

شيماء عادل..

دكتورة صيدلانية، تخصصت في مجال تربية الأطفال منذ حوالي ثلاث سنوات.

حصلت على عدة «كورسات» في مجال التربية من كندا، مثل: **Right from**

. **COPEing with toddler behavior** و **the start**

قرأت وبحثت في العديد من كتب التربية؛ العربية والأجنبية.

لها العديد من الأنشطة مع الأطفال.

وهي- حالياً- تقوم بتدريس كورس «صاحب طفلك» المعتمد من **Texas**

institute of behavior research للامهات العرب في الولايات المتحدة.

لها صفحة متخصصة على «الفييس بوك» في حل مشاكل الأطفال باسم

(مشروع طفل).

* **رابط الصفحة:**

<https://www.facebook.com/%D9%85%D8%B4%D8%B1%D9%88%D8%B9-%D8%B7%D9%81%D9%84-1502580149755195/>